

IONI

Iesu Valana 'Atumaina Ioni 'ana kilukiluma

Ioni tamu Iesu yana tovetutuyamavo 12 'adi 'aila'a 'wainega. Taunina tutuya fuedi Iesu taiadi i yabayaba bega yana folova i 'isedi wata yana ve i nogaidi. We'e Malika, Madiu wata Luke i kumeta i kiluma, mulieta Ioni i vemuli i kiluma.

Ioni yana veifufu ta na 'iseni 'wa da vo tamu tomogo i da kiluma we'e mogitana 'asa'aiana taunina i kiluma. Siwe kebu nuanuana taunina i na awa'ai'aia begaidi i vo, Yana tovetutuyamavo i vona,” we'e mogitana i da vo, Yana tovetutuyamavo 'a vona.”

Malamala fuedi i 'a'ava tomotoga nuadi i fani Iesu yana wafa, yana tovoi-vaitugana wata yana laka abame faifaidi. Faifainanina Ioni nuanuana Iesu ifufuna i na kilumi tomotoga fueda faifaida. Vonanidi i kilumidiga 'Anu'anunu 'Atumaina yana 'aivaita 'wainega, vonanidi 'ada fata 'waidiega ta na vetumagana.

Yana kiluma 'eba velamu 'waineye Ioni i kiavemageta Keliso lamuna faifaina, Kelisonina nagamidiotoga Yaubada taiadi i miamia mulieta Tamana i voneni i mai fwayefwayeye. Yaubada i kiavemageta 'waideye Keliso 'wainega taunina yana 'aseto faifaina, bega Keliso 'ana 'eba 'ainana tamu, Yaubada 'ana Tokiavemageta. Wata Ioni i veifufu Iesu 'eba nuavogana wata 'eba nua'ewa i 'idewadiga faifaidi, bega ta na lu'iawawai nika ta na 'aseto-atumaia Iesu mogitana Yaubada Natuna. We'e me Diu fuedi i baila kebu nuanuadi Iesu bega i luvefafai. Iesu yana wafa yana tovi-vaitugana wata yana souyagi enavo 'waidie faifaidi i kiluma. Ioni 'ana kilukiluma nageneye i vo,

Iesu folova toketokedi fuedi 'eba nuavogana wata 'eba nua'ewa i 'idewadi yana tovetutuyamavo matadie, siwe kebu matatabuna 'adi kilumaga de'e bukinina 'waineye. Naninidi 'akonadi kilukilumidi 'wa na lu'iawawadi bega 'wa na vetumagana Iesu Keliso taunina Yaubada Natuna wata 'ana Venua'ivina. Vetumagananina 'wainega mia 'ivauna wata 'atumaina 'wa na veluagai Iesu 'wainega. (Ioni 20:30-31)

Keliso taunina Yaubada yana Tokiavemageta i vetomotogaotoga.

1 ¹Basenadiotoga Yaubada fwayafwaya wata abama bola kebu i da 'idewadiga, nagamidiotoga yana Tokiavemageta i miamia. Tokiavemagetanina Yaubada yana nuanua matatabuna 'ana tolu'ivona. Taunina Yaubada 'ana labilabina wata taunina 'asa'aiana Yaubadanina. ²Tutuya 'eba velamunina 'waineye Tokiavemageta Yaubada taiadi i miamia. ³Yaubada yana nuanua 'wainega Tokiavemageta nani matatabuna i 'idewadi abame wata fwayefwayeye, kebu tamu nani taunina i da souye-maimaigeni. ⁴Taunina miamia-vagina yawaida lamuna wata 'wainega mia 'ivauna wata 'atumaina ta veluagai, bani'odi mageta 'waideye. ⁵Tomotoga yadi sauluva sakoidi 'wa da vo bani'odi dudubala 'ana tomia, siwe Yaubada yana Tokiavemagetanina i magemagesedi, we'le tomotoganidi kebu 'adi fata i na vetoketoke magetanina i na luve'weuya.

⁶⁻⁷Yaubada nuanuana tomotoga magetanina i na 'asetai, begaidi yana tomata'aulele i vetunei bega i na lu'ivona 'waidie. Tomogonina 'ana wagava Ioni Tobafitaiso, i mai i lulu'ivona magetanina faifaina, bega tomotoga i na vetumagana 'waineye. ⁸Ioninina kebu taunina mageta, i vetolu'ivonamo mageta faifaina. ⁹Yaubada yana Tokiavemagetanina 'asa'aiana taunina mageta mogitana, fwayefwayeye i obuma matatabuda nuada i kiavemagetadi.

¹⁰Yaubada yana nuanua 'wainega Tokiavemageta fwayafwaya i 'idewai mulieta i obuma i vetomotogaotoga, siwe 'asa'aiana taunina Iesu Keliso. I miamia siwe tomia fwayafwaya kebu i da 'asetai taunina 'adi to'idewadewa. ¹¹I mai taunina yana 'awalaweye siwe yana 'aila'a i baila. ¹²fSiwe 'ifwaidi yana mai faifaina i sosoana i vetumagana taunina Keliso, Yaubada 'ana Venua'ivina begaidi Yaubada i tauyedi taunidi natunavo. ¹³Tomotoganidi bani'odi i tubeve'ivau. Tubeve'ivaunina kebu tomogo ma yana vavine 'waidiega, wata kebu tamu tomogo yana nuauyega, tubuganina Yaubada 'wainega yana 'aila'a faifaina.

Nuakalikali bwaikina i mai Keliso 'wainega.

¹⁴hKeliso i obuma i vetomotogaotoga taiadi 'a miamiana. 'Ifwaima 'a 'iseni taunina magemagetana, yana sauluva tonovaotogidi wata ma yana nuakalikali i vevesauluva 'atumaina 'waideye. Fai Yaubada Natuna tubu'eana begaidi Tamana yana toketokena i veleni bega taunina magemagetana.

¹⁵Ioni Tobafitaiso i maiga bonana bwaikinega i lu'ivona 'aila'a 'waidie Keliso faifaina i vo, Sino taunina, kumanina faifaina a lulu'ivona 'waimie

a **1:1** Ion 1:1-2; Ve 19:13 b **1:3** Kol 1:16-17; Ibu 1:2 c **1:4** Ion 5:26 d **1:5,9** Ion 8:12
 e **1:10** Ion 17:25 f **1:12** Gal 3:26; Kol 2:6 g **1:13** Ion 3:3-6; 1 Fit 1:23 h **1:14** Fil 2:7; Ibu 2:14; Luk 9:32,35

a vo, Avinodi yau a kumeta, taunina i mimai mulikuye, siwe taunina bwaikaotogina yau kebu bani'odiga fai yau bola kebu a da tubugaga nagamidiotoga taunina i miamia.”

¹⁶ ⁱ Keliso tonuakalikali mogitana, tutuya fue di i nunuakalikaliwata wata i vevesauluva-'atumaieda. ¹⁷ Basenadiotoga Mosese ve'etoboda Yaubada 'wainega i veleda, we'e nuakalikali bwaikaotogidi wata sauluva tonovidi i mai Iesu Keliso 'wainega. ¹⁸ ^j Kebu tamu aitoi Yaubada i da 'iseniga, 'aiseotogina Natuna Keliso fai 'ana labilabina Tamana i sivemageseni tomotoga 'waideye, Kelisonina siwe 'asa'aiana taunina Yaubada.

Ioni Tobafitaiso yana lau'age.

¹⁹ Me Diu to'edakumetavo i miamiani Ielusalema 'waineye nuanuadi i na 'asetai Ioni Tobafitaiso aitoi, begaidi tomotoga 'ifwaidi i vetunedi i nagoi 'waineye i velutolieni. Tomotoganidi tovelomu 'ifwaidi wata vanuga 'eba velu'ui 'ana to'isave'avinavo. ²⁰ Ioni yadi velutoli kebu i da vedumwe'ai'aieni nani matatabuna i lu'ivoneyedi i vo, Yau kebu Keliso, Yaubada 'ana Venua'ivinaga.” ²¹ ^k Bega i velutolieni i vo, We'e 'omu aitoi? 'Alo 'omu Ilaitia 'u vilamu Yaubada 'wainega?” Ioni i vo, Kebu.” Wata i velutoli i vo, 'Alo 'omu tolu'ivonanimu, kumanimu faifaimu basenadiotoga Yaubada i lu'ivona Mosese 'waineye, i vo, Bola i na mai?” Nika wata i vo, Yau kebu kumanikuga.” ²² Wata tovelutolinidi i vo, Vetuma 'omu aitoi? Nuanuama taunimu 'u na lu'ivonemu bega 'a na vilama 'a na nagoi 'ama tovetune 'waidie 'a na veifufu.” ²³ Bega Ioni yadi velutoli i tutuli i veifufu 'waidie i vo,

Yau tovegolegole sali'avu'avuyega kumaniku a vo,

'Auvea yana 'eda 'wa na vusia, wata 'wa na sivetonovidi yana 'eba nago.”

Vonanina de'e Ioni taunina faifaina i lulu'ivoneyeniga, basenadiotoga Yaubada yana tolu'ivona 'ana wagava Aisea i kilumi.

²⁴⁻²⁵ Tovelutolinidi Falisi i vetunediga wata Ioni i velutolieni i vo, 'U vonaga 'omu kebu Keliso, kebu Ilaitia, wata kebu Yaubada yana tolu'ivona bwaikina, siwe awale tutuya fue di tomotoga 'u bafitaisodi?” ²⁶ ^m I vonedi i vo, Yau ufa 'aisena 'wainega tomotoga a bafitaisodi, we'e tamu tomogo lilivamie siwe 'wa bavuyeni, sai'afoga yana folova i na velamu 'waimie. ²⁷ I mimai mulikuye siwe taunina toketokeotogina, yau kebu bani'odi. Kebu i da lubwaineku 'waineye a na vetofolova fai taunina bwaikina a bunumayaga.”

²⁸ De'e bani'odi Ioni i veifufuyedigga Bedani 'waineye, Ufa Iolidani we'e no'o bega, wata bei tomotoga i bafitaisodi.

ⁱ 1:16 Efe 3:19 ^j 1:18 Ion 6:46; Mad 11:27 ^k 1:21 VeL 18:15; Fol 3:22 ^l 1:23 Ais 40:3
^m 1:26 Ion 1:33

Iesu taunina Yaubada yana Sifi Siaina.

29ⁿI 'atai Ioni i veveifufu 'aila'a 'waidie nika Iesu i 'isanaweni i mimai i vonedi i vo, Sino tomogonina, Yaubada yana Sifi Siaina i mai 'wainega. Taunina yana wafa 'wainega tomia fwayafwaya matatabuda yada sakona i na 'ewayavuledi. Tomotoga yadi sakona 'adi nuatavuna faifaidi sifi i nikenikedi i vevelomuyedi Yaubada 'waineye, we'e Iesu taunina yawaina i na tauyeni yada sakona 'adi 'u'uma faifaidi. 30Kumanina basenadi faifaina a lu'ivona 'waimie a vo, Avinodi yau a kumeta, taunina i mimai mulikuye, siwe taunina bwaikaotogina yau kebu bani'odi fai yau bola kebu a da tubugaga nagamidiotoga taunina i miamia.” 31Yau basenadi bavubavuku a vo, Keliso aitoi?” Siwe a mai a lalau'age wata tomotoga fuedi a bafitaisodi ufayega bega me Isileli Kelisonina i na 'asetai.”

32^oWata Ioni side bani'odi i lu'ivoneyedi tomotoga 'waidie i vo, Bei a 'iseni 'Anu'anunu 'Atumaina Iesu i age-vagaseni 'ana 'isa'isa bani'odi bunebune abamega i obuma i toa 'waineye. 33'Ai'edi kebu a da 'iseniga bola a da bavubavu, siwe a 'iseni nika nuaku i 'anita'ia bei a nuani, basenadi tutuyanina Yaubada i vetuneku a na bafitaiso ufayega i voneku i vo, Tamu tutuya 'u na 'iseni 'Anu'anunuku i na obu tamu tomogo i na age-vagaseni 'u na 'asetai kumanina 'awaie 'Anu'anunu 'Atumaina tomotoga i na veledi i na agedi 'wa da vo i da bafitaisodi 'Anu'anununina 'wainega.” 34Tauniku matakuyega a 'iseni, a vona mogitana taunina Yaubada Natuna.”

Iesu yana tovetutuyamavo kumekumetadi.

35-36^pI 'atai Ioni Tobafitaiso yana tovetutuyamavo 'adi 'ailuga taiadi i tototovoi, nika Iesu i 'iseni i mai i nunago. Bega Ioni i vonedi i vo, Sino tomogonina Yaubada yana Sifi Siaina.” 37'Adi 'ailuga yana vona i nogai Iesu mulineye i nagoi. 38Iesu i sivilai i 'isedi i velutoliedi i vo, Tamu ava'ai yami nuanua faifaina 'wa mimaia?” Velutoliega yana velutoli i tutuli i vo, Tove, ava'aibe bei yamu vanuga?” 39Iesu i vo, 'Wa maia ta na nagoi a na vemi.” Taiadi i nagoi yana 'eba mia i vedi. Fai 'akonadi i lavia, bani'odi 4 kiloki, bei i miamiani nika i lovani.

40Tomotoganidi 'adi 'ailuga Ioni yana vona i nogai bega Iesu taiadi i nagoiga, tamu 'ana wagava Anidulu, Saimoni Fita taina. 41Anidulu Iesu taiadi i veifufu'a'ava, tonovina i nago nika tatana i veluagai i voneni i vo, Saimoni, 'ima 'akonadi Keliso, Yaubada 'ana Venua'ivina 'a veluagai.” 42^qBega i vagavaia taiadi i maia Iesu 'waineye. Iesu Fita i 'iseni i vo, 'Omu Saimoni, Ioni natuna, a na golemu Sifasa’.” Sifasa 'ana saivila Fita, me Guliki bonadiega.

ⁿ 1:29 Ais 53:6-7; 1 Fit 1:18-19 ^o 1:32 Mad 3:16 ^p 1:36 Ion 1:29 ^q 1:42 Mad 16:18
^r 1:42 Fita (me Guliki bonadiega) wata Sifasa (me Diu bonadiega) 'adi saivila Kileu.

Iesu nuanuana Filifi wata Nataniela.

⁴³I 'atai Iesu nuanuana i na nago 'awalawa Galili, Filifi i veluagai i voneni i vo, 'U mai taiadi ta na nago yaku tovetutuyama.” ⁴⁴Filifi 'ana tuvada Bedasaida, 'atamananina 'wainega Anidulu wata Fita bega i maia. ⁴⁵Filifi Iesu yana vona i nogai Nataniela i veluagai i voneni i vo, 'U na nuani basenadiotoga Yaubada i vona'awaufaufa 'awaie yana tomogo tamu i na vetunei i na mai, bega Mosese wata 'ifwaidi tolu'ivonavo i kiluma Yaubada yana Buki 'waineye tomogonina faifaina. Tomogonina 'akonadi 'a veluagai, 'ana wagava Iesu, Iosefa tomogo Nasaledi natuna.” ⁴⁶'Nataniela yawaina i lovoga i vo, Vona mogitana? Kebu tamu nani 'atumaina 'ana fata i na mai 'atamananina Nasaledi 'wainega.” Yana vona Filifi i tutuli i vo, 'U mai ta na nago 'u na 'iseni.”

⁴⁷Tutuyanina Iesu Nataniela i 'iseni i mimai tomotoga i vonedi i vo, Sino taunina mogitana tomogo Isileli, yana sauluva matatabuna tonovi'avadi.” ⁴⁸Nataniela Iesu i velutolieni i vo, Bani'odi 'u munega 'u 'asetaku?” Iesu i vo, Nagami a 'isemu 'ala'ai lamuneye 'u tovtovoi mulieta Filifi i lu'ivona 'waimuye faifaiku.” ⁴⁹'Nataniela i vo, Tove, 'omu mogitana Yaubada Natuna, wata me Isileli yama Kini.” ⁵⁰Iesu i vo, Ma yamu subisubia 'u vetumaganeku fai a 'asetamu wata yamu 'eba mia a lu'ivoneyeni. Yamu 'eba mia a lu'ivoneyeniga sai'afo nani siaina, siwe 'awaie nani bwaikidi 'u na 'isedi, 'eba nuavogana wata 'eba nua'ewa a na 'idewadi. ⁵¹'A vona mogitana, bola 'u na 'iseni abama i na 'anikililia, Yaubada yana anelose 'u na 'isedi i na lakalaka wata i na obuobuma yau a vetomotogaotoga 'waikuye.”

Sakali nagi faifaina Kena 'waineye.

2 ¹'Aiata 'ailuga i 'a'avana, tamu tomogo nagi sakalina i 'idewai 'atamana Kena 'waineye, 'awalawa Galili nageneye, bega Iesu inana i nago. ²Tonisakali Iesu wata yana tovetutuyamavo i vonedi i vo, 'Omi wata 'wa na waia.” ³'Ani 'waineye 'adi ufa oine i 'a'ava, Iesu inana i voneni i vo, Natuku, oine matatabuna i 'a'ava.” ⁴'Iesu i vo, Inaku, ava'ai nuanuami a na 'idewai kebu 'wa na vonekuga. Yaku folova 'ana tutuya bola.” ⁵Siwe inana 'ani'ani 'adi to'idewadewa i vonedi i vo, Ava'ai Iesu i na voneyediga, 'wa 'idewadi.”

⁶Diu totafalolo yadi sauluva nimadi i 'i'ilekoa-dewadi wata i tatafalolo bega igodi yadi nuanua vunavunagidi Yaubada mataneyeye, begaidi vanuganina 'waineye 'eba koi ufa bwaikidi matatabuna 6 i yatodi, 'aitamogana 'waineye 'ana fata dalamu siaidi matatabuna 5 'alo 7 ta

§ 1:45 VeL 18:18; Ais 7:14 † 1:46 Ion 7:41,52 ‡ 1:49 Mad 14:33; Mad 16:16; Ion 12:13
 v 1:51 Nag 28:12 w 2:4 Ion 7:30

iwagi i adaga. 'Eba koinidi kileu i 'eavidi. ⁷Iesu i vona 'ani'ani 'adi to'idewadewa 'waidie i vo, Nuanuaku 'eba koinidi ufa 'wa na veliliwadi." 'Eba koinidi i veliliwadi i ve'alafelefeledi. ⁸I 'a'avana i vonedi i vo, 'Eba koi siainega 'wa na koia 'wa na naweni tonisakali 'wa na veleni i na yemu." ⁹I 'ewai i naweni i veleni ufanina i yemutonoviga 'akonadi i ve-oine. Tonisakalinina kebu i da 'asetai. ¹⁰Bega tonisakali tomogonina i nagiga i goleni i mai i voneni i vo, Tomotoga fuei yadi sauluva nagami oine 'ana lautonova 'atumaina i na 'anivelenei tomotoga i na yemu, mulieta tutuyanina nuadi i na lugaugaudi, kibwana i na sivemageseni i na yemu. We'e 'omu 'u vesauluva tulina, nagami oine 'atumaina 'u sivemageseni mulieta 'atumaotogina i vemuli."

¹¹ ^x'Eba nuavogananina wata 'eba nua'ewanina bei Iesu i velamu i 'idewai 'atamana Kena 'awalawa Galili 'waineye. Yana folovanina 'wainega yana toketokena Yaubada 'wainega i sivemageseni, we'e yana tovetutuyamavo i vetumagana 'waineye taunina Yaubada 'ana Venua'ivina.

¹² Sakalinina i 'a'ava, Iesu, inana tainavo taiadi wata yana tovetutuyamavo i nagoi 'atamana Kafaneomi bei sai'afu i yogomia.

Iesu i nago vanuga 'eba velu'ui 'waineye.

¹³ ^y'Akonadi tutuya i velilivana sai'afoga me Diu yadi Sakali Uvi'agalatagona^z 'ana 'aiata i na le'wa begaidi Iesu yana tovetutuyamavo taiadi i laka Ielusalema. ¹⁴Iesu i luku vanuga 'eba velu'ui 'waineye tomotoga i 'isedi yadi 'aisaya i vevekimwaneyedi 'ifwaidi tomotoga 'waidie bega i na nikedi i na velomuyedi Yaubada 'waineye. 'Aisayanidi bulumakau, sifi, wata bunebune, we'e 'ifwaidi tomotoga mani tulina tulina 'adi tosivedavedamana^a i miabui i miamiani 'adi talalia 'waidie. ¹⁵Iesu ma yana nuasako bulava i 'ewadi i metani yana 'eba 'aifitala. Sifi wata bulumakau matatabudi i luveyavulidi, tosivedavedamana 'adi talalia i tutuviladi yadi mani i 'etoiwaga. ¹⁶We'e bunebune 'ana tovekimwane i lukakadedi i vo, Yami manuga 'wa 'ewadi 'wa souyemi. Tamaku yana vanuga 'ana wagava vanuga 'eba velu'ui, kebu yami 'eba sivedavedamanaga." ¹⁷ ^bYana tovetutuyamavo i 'iseni i nuani tamu vona basenadiotoga i kilumi Yaubada yana Buki 'waineye i vo,

Yaubada, nuanuaku bwaikina tomotoga yamu vanuga i na ve'ililibuyeni faifaina a 'i'ikasikasisi, begaidi vita a na veluagai."

^x 2:11 Ion 1:14, 4:54, 11:4 ^y 2:13 Sou 12:1-27 ^z 2:13 Me Diu yadi 'eba tolinuata'i basenadiotoga Yaubada tubudiavo i 'ita'ita'iedi Itifita 'wainega, anelose me Diu i uvi'agalatagonidi we'e me Itifita i nikedi. ^a 2:14 Me Loma yadi mani kebu 'ana fata 'wainega i na 'aniveleni-maimaiga bega i sisivedamana nuanuadi me Diu yadi mani. ^b 2:17 Same 69:9

¹⁸Fai Iesu tomotoga i sogiedi faifainanina me Diu to'edakumetavo i maia Iesu 'waineye i velutoli i vo, Awale? Aitoi veimea i velemu tomotoga 'u luveyavulidi? Nuanuama tamu 'eba nuavogana wata 'eba nua'ewa 'u na 'idewai 'a na 'iseni wata 'a na 'asetai 'omu ma yamu veimea Yaubada 'wainega.” ¹⁹eIesu i vonedi i vo, 'Atumaina, 'eba nuavogana wata 'eba nua'ewa tamu a na 'idewai 'wa na 'iseni. Vanuga 'eba velu'ui de'e 'wa da geuyaga, 'aiata 'aitonu nagedie wata a da vetovoi-vaitugani.” ²⁰I voneni i vo, De'e vanuga 'eba velu'uinina i yogoyogoni malamala 46 nagedie, we'e 'omu igodi 'aiata 'aitonu nagedie 'u na yogona-vaitugani.”

²¹Siwe Iesu kebu mogitana i da vonavona vanuga 'eba velu'ui faifaina, i vonavona taunina faifaina. ²²dTutuyanina Iesu i tovoi-vaitugana wafa 'wainega nika bei yana tovetutuyamavo yana vonanina i nuani bega Yaubada yana Buki wata Iesu yana vonanina faifaidi ma yadi vetumagana i ve'awamogitana.

Tomotoga matatabuda yada nuanua Iesu i 'asetadi.

²³Sakali Uvi'agalatagona 'ana tutuye Iesu i miamia Ielusalema 'eba nuavogana wata 'eba nua'ewa i 'idewadi. Tomotoga fuedi i 'iseni i vo, 'A vetumagana, mogitana i mai Yaubada 'wainega.” ²⁴Siwe Iesu 'aitamogana 'aitamogana yadi nuanua i 'asetadi begaidi yadi vetumagananina faifaina wata kebu Iesu i da ve'awamogitana. ²⁵Fai Iesu matatabuda i 'aset'a'avada, begaidi 'ai'edi tamu aitoi iana yana sauluva faifaidi i na lu'ivona Iesu 'waineye kebu i da lubwaineniga.

Iesu i veifufu Nikodimo taiadi.

3 ¹eIelusalema 'waineye tamu Diu totafalolo Falisi 'ana wagava Nikodimo i miamia, we'e taunina tamu me Diu to'edakumeta bwaikina. ²Tamu lovana i mai Iesu 'waineye i voneni i vo, 'Auvea, 'a 'asetamu 'omu Tove 'u mai Yaubada 'wainega. Kebu tamu aitoi 'ana fata 'eba nuavogana wata 'eba nua'ewa 'u 'i'idewadiga wata bani'odi i na 'idewadi 'ai'edi Yaubada kebu toketokena i na veleni.” ³Siwe Iesu i voneni i vo, A vona mogitana 'waimuye 'ai'edi aitoi kebu i na tubeve'ivau, kebu 'ana fata i na luku Yaubada yana 'Eba Veimea 'waineye.” ⁴Nikodimo i velutoli i vo, Tulaidi bani'odi i na munega i na tubuga-vaitugana? Kebu 'ana fata tamu tomogo i na luku inana umwadie wata i na tubuga-vaitugana.” ⁵⁻⁶gIesu i vona i vo, Tomotoga inadiavo 'waidiega i tubuga taunidi 'asa'aiana 'adi wagava tomotoga, fwayafwaya 'ana nuanua 'waidie bwaikina. Siwe egavo i na tubeve'ivau 'Anu'anunu 'Atumaina 'wainega, 'Anu'anununina 'akonadi i agedi i 'ive'ivaudi. A

c 2:19 Mad 26:61 d 2:22 Luk 24:6-8; Ion 12:16 e 3:1 Ion 7:50-51, 19:39 f 3:3 1 Fit 1:23 g 3:5 Tai 3:5; 3:6 Ion 1:13

vona mogitana 'waimuye, 'ai'edi tamu aitoi kebu i na tubuve'ivau ufa wata 'Anu'anunu 'Atumaina 'waidiega 'ako kebu 'ana fata i na luku Yaubada yana 'Aila'a nageneye bega i na veimeyeni. ⁷Kebu nuamu i na vogani fai a vo, I lubwainemu 'u na tubuve'ivau.” ⁸Kaukau taunina yana nunuga i veimeyeni. Butu'aina ta noganogai siwe yana 'eba toa kebu ta da 'asetaigna wata kebu ta da 'asetai ava'aibe bei i nunago. Wata bani'odi egavo i na tubuve'ivau 'Anu'anunu 'Atumainega, yadi sauluva 'ivauna ta na 'iseni ta na 'asetai 'Anu'anunu 'Atumaina i agedi siwe kebu ta da 'asetaigna bani'odi i munega 'alo ma'avai i agedi.” ⁹Nikodimo i velutoli Iesu 'waineye i vo, Yamu vona 'ana 'asetai bani'odi? A bavuyeni.” ¹⁰Iesu i vo, 'Omu me Isileli yama tove bwaikimu, awale naninidi a veveifufuyediga 'u bavuyedi? ¹¹A vona mogitana 'waimuye, ava'ai 'a 'isedi wata 'a 'asetadi 'a veveifufuyedi 'waimuye, siwe kebu tamu aitoi 'waimiega yama vona faifaidi i da ve'awamogitana. ¹²Naninidi a veifufuyediga fwayafwayayega siwe kebu 'u da vetumagana. We'e 'ai'edi naninidi abamega a na veifufuyediga, mogitana 'u na bavu-'afo'afo. ¹³Kebu tamu aitoi i da laka abame wata i da vila-vaitugani i da obuma, yau a vetomotogaotoga 'aiseotogiku abamega a obuma begaidi ma yaku 'asetai a veveifufu.

¹⁴⁻¹⁵^hBasenadiotoga sali'avu'avuye Mosese kumaea 'o'olo bani'odi i silakai bega egavo i 'isalaka 'waineye kebu i da wafagaⁱ.” Yau wata bani'odi, i lubwaineni 'awaie yau a vetomotogaotoga tomotoga i na silakaiku 'ai lagalagana 'waineye bega egavo ma yadi vetumagana i na tauyedi 'waikuye mia 'atumaina wata miamia-vagaina i na veluagai.

Yaubada i nuakalikalieda bwaikina.

¹⁶^jFai Yaubada tomia fwayafwaya matatabumi i nuakalialiemi bwaikina, begaidi yau natuna yana tamogana i 'aniveleneku 'waimie bega egavo taunidi ma yadi vetumagana i na tauyedi 'waikuye kebu i na wafa mogitana, mia 'atumaina wata miamia-vagaina i na veluagai. ¹⁷^kWe'e Yaubada kebu i da vo, Natuku a na vetunei bega yana veimea 'wainega tomia fwayafwaya vematavuloga i na veluagai,” kebu, i vetunekuga tomia fwayafwaya a na 'ita'ita'iemie sakona 'waidiega.

¹⁸^lEgavo ma yadi vetumagana taunidi i na tauyedi Yaubada Natuna 'waikuye kebu vematavuloga i na veluagai, siwe egavo i baila 'akonadi Yaubada i veimea vematavuloga i na veluagai fai kebu i da vetumagana Yaubada Natuotogina tubu'eaku 'waikuye. ¹⁹^mYau Yaubada Natunanina a

^h 3:14 Num 21:9; Ion 12:32 ⁱ 3:14-15 Me Isileli Yaubada i vedumwe'ai'aieni bega Yaubada 'o'olo i vetunedi 'waidie, egavo i ovadi i wafa-matayo'o. Yaubada Mosese i voneni kainumu i dabia 'o'olo bani'odi i silakai bega egavo i 'isalaka 'waineye 'aivaita i veluagai. ^j 3:16 Lom 5:8; 1 Ion 4:9-10 ^k 3:17 Luk 19:10; Ion 12:47 ^l 3:18 Ion 3:36 ^m 3:19 Ion 1:5

maiga bani'odi mageta tomia fwayafwaya 'waimie, siwe tomotoga fueidi nuanuadi dudubala fai i vevesauluva sakoidi, begaidi kebu nuanuadi mageta, faifainanina vematavuloga i na veluagai Yaubada 'wainega. ²⁰Tomotoganidi yadi sauluva sakoidi mageta i baila, fai kebu nuanuadi yadi sauluvanidi sakoidi i na sivemagesedi. ²¹We'e egavo yadi sauluva tonovidi, ma yadi sosoana i na maia magetanina 'waikuye bega tomotoga fueidi i na 'isedi i na 'asetadi Yaubada yana nuanua 'ana todumwebika.”

Ioni Tobafitaiso i veifufu Iesu faifaina.

²²Iesu i veifufu'a'ava Nikodimo 'waineye, mulieta yana tovetutuyamavo taiadi i nagoi 'awalawa Iudia 'waineye. Bei sai'afu i yogomia wata bei yana tovetutuyamavo tomotoga fueidi i bafitaisodi Iesu yana veimea 'wainega. ²³⁻²⁴”Bola Ioni Tobafitaiso kebu i da lukuga vanuga 'eba yogona 'waineye i nago 'atamana Ainoni, Selimi lilivaneye. Bei tomotoga fueidi i nunagoi 'waineye i bafitaisodi ufanina bwaikina 'waineye.

²⁵Tamu 'aiata, tamu tomogo Diu i nago Ioni Tobafitaiso yana tovetutuyamavo 'waidie taiadi i ve'ikwayekwayega i vo, Aitoi yana bafitaiso 'atumaiotogina bega 'ana fata tomotoga i na ve'atumai Yaubada mataneye?” ²⁶”Begaidi yana tovetutuyamanidi i nagoi Ioni i voneni i vo, Tove, 'u na nuani, tomogonina taiadi 'wa miamia Ufa Iolidani we'e no'o bega wata kumanina faifaina 'u veveifufuga, valana 'a nogai tomotoga fueidi i baibailemu i nunagoi 'waineye bafitaiso faifaina.” ²⁷”Ioni i vonedi i vo, Yaubada abame tomotoga 'aitamogana 'aitamogana yada folova i veleda. ²⁸”Wa na nuani basenadi a vonemi a vo, Yau kebu kumaniku Keliso, yau a na vetomata'aulelemo faifaina.” ²⁹Side bani'odi. Nagi 'ana tutuye tonagi nani fueidi i veveluagadi, 'ani'ani, kukua wata tomotoga i veve'ililibuyeni i sososoana faifaina, we'e iana tosigeugeu kebu 'ana fata i na nuavita i na sosoanamo. Wata yau bani'odi, kebu 'ana fata nuaku i na vita fai iaku Iesu tomotoga fueidi i veve'ililibuyeni wata i sososoana faifaina. Tomotoga i baibaila 'waikuyega i nunagoi Iesu 'waineye, faifaina a sosoana bwaikina. ³⁰I lubwaineni Iesu i na vetomogo-bwaika, yau ma'itufa a na obu.”

Kumanina i mai abamega.

³¹”Aitoi i tubuga fwayefwayeye bei i miamia, begaidi tutuya fueidi i veveifufu nani fwayefwayeye faifaidi, we'e Yaubada Natuna i mai tabwanega kebu bani'odi tomotoga, taunina bwaikaotogina wata nani matatabuna 'adi toveimea. ³²Kumanina i obuma tabwanega naninidi bei i 'isediga wata i nogaidi i lulu'ivoneyedi tomotoga 'waidie, siwe

kebu fueidi bonana i da 'ewai. ³³Egavo Yaubada Natuna yana vona i vetumaganeni, taunidi wata Yaubada yana vona i ve'awamogitaneni. ³⁴'Kumanina Yaubada i vetunei 'waideye Yaubada yana Vona 'ana tolu'ivona fai 'Anu'anununa mogitana i agei. ³⁵'Yaubada Natuna i nuakalikalieni bwaikina, begaidi nani matatabuna i 'anivelenedi 'waineye i na veveimeyedi. ³⁶'Egavo ma yadi vetumagana taunidi i tauyedi Yaubada Natuna 'waineye mia 'atumaina wata miamia-vagaina 'akonadi i veluagai, we'e egavo i vedumwe'ai'aieni kebu mia-vagatanina i na veluagai, Yaubada yana nuasako i na 'eno-vagata 'waidie.

Iesu i veifufu vavine Samelia 'waidie.

4 ¹Me Diu totafalolo 'adi wagava Falisi vala i nogai Iesu yana bafitaisoyega yana tovetutuyamavo fueidi i veveluagadi, we'e Ioni Tobafitaiso kebu fueidiga. ²We'e Iesu kebu i da bafitaisodi tomotoga, yana tovetutuyamavo 'aisedi bafitaiso i 'i'idewai. ³Fai Falisi i vonaga i vo, Iesu tovetutuyamavo fueidi i veveluagadi," begaidi Iesu yana tovetutuyamavo i vonedi ma fueidi i tovoi Iudia i 'iaweni wata i viladi i na nagoi 'awalawa Galili. ⁴Fai Iesu nuanuana, i yogodaba 'awalawa Samelia kamwaneamo.

⁵"I nunagoi Samelia kamwaneamo i souyedi tamu 'atamana 'ana wagava Saika 'waineye. 'Atamananina lilivaneye Iakobo yana fwayafwaya basenadiotoga i 'anivelenedi natuna Iosefa 'waineye. ⁶Tanoganina 'waineye bei Iakobo ufa i alai. Fai 'akonadi 'aiata 'ana utukamwana, wata Iesu i 'abiawa 'eda manamanawena begaidi i miabui ufanina lilivaneye i na veawai.

⁷⁻⁸We'e yana tovetutuyamavo i nagoi 'atamana bwaikina 'waineye 'adi'adi i na kimwane. Iesu i veveawai nika tamu vavine Samelia i le'wa ufa koi faifaina. Iesu i vona vavine 'waidie i vo, Ufa 'wa koia 'wa veleku a na yemu." ⁹"Me Diu wata me Samelia kebu taiadi i da veveiana, wata yadi 'eba yemu wata 'eba 'ani 'waidiega kebu 'ana fata me Diu bega i na yemu 'alo i na 'ani. Faifainanina vavinenidi i vo, Yau vavine Samelia, awale 'waimeye ufa 'u vevelu'ui?" ¹⁰Iesu i vonedi i vo, 'Ai'edi 'wa da 'asetai ava'ai Yaubada nuanuana i na velemini, wata yau aitoi, 'wa da velu'uikeu bega ufa a da velemini, ufanina 'wainega mia 'ivauna wata 'atumaina 'wa da veluagai." ¹¹"Vavine i voneni i vo, 'Auvea, yamu 'eba koi ufa kebu, wata ufa va'ebeiotoga ovu manamanawena, we'e 'omu ava'aiega ufa 'u na 'ewai bega mia 'ivauna wata 'atumaina 'a na veluagai?" ¹²Wata vavinenidi i vo, Tubuda Iakobo ufa de'e i alai, taunina wata ma natunavo yadi 'aisaya taiadi bega i yemu, wata 'asiau 'ima bei 'a yemuyemu. Iakobo tomogo bwaikina, we'e 'omu igodi 'u na vebwaika-

† 3:34 Ion 1:32-34 § 3:35 Mad 11:27; Ion 5:20 † 3:36 Ion 3:16-18; 1 Ion 5:12

u 4:5 Nag 33:19 v 4:9 Luk 10:33 w 4:11 Ion 7:37-39; Ve 21:6

'iaweni bega tamu ufa 'atumaotogina 'u na velema.”¹³⁻¹⁴ x Iesu vavine yadi vona i tutuli i vo, 'Ai'edi aitoi de'e ovuyega ufanina i na yemu bola wata i na veufa'ani'anigoku, we'e aitoi ufa a na veleni i na yemuga, i na yemu-vagata kebu wata i na yemuyemu. Ufanina nuana 'waineye i na veufa-luluvuala bega mia 'atumaina wata miamia-vagaina i na veluagai.”¹⁵ Vavine i vo, 'Auvea, ufanina nuanuama 'u na velema bega 'anigoma kebu i na lalala wata de'e bei kebu 'a na mimai 'a na koikoi.”

¹⁶ Iesu i vonedi i vo, 'Wa nago yami lamoga 'wa vagavaia 'wa mai.”
¹⁷⁻¹⁸ Vavine i vo, Yau kebu tamu yama lamoga.” Iesu yadi vona i tutuli i vo, 'Wa vonaga 'wa vo, Kebu yama lamoga,” 'wa vona mogitana, siwe 'akonadi yami lalamogavo ⁵ 'wa sa'iledi we'e tomogonina taiadi 'wa miamiaga, kebu mogitana yami lamoga.”¹⁹ Vavine i vo, Yamu vona 'ana nogaya 'a 'asetamu 'omu tamu Yaubada yana tolu'ivona. ²⁰ Tubumavo Samelia tamu vanuga 'eba velu'ui i yogoni 'oya de'e 'waineye bega Yaubada 'waineye i subisubia, we'e 'omi me Diu 'wa vonaga 'wa vo, Matatabuda i lubwaineda Ielusalema 'aitamogana 'waineye ta na subisubia.”²¹ Iesu i vonedi i vo, Vavine, a vona mogitana 'waimie, 'awaie de'e 'oyanina 'waineye wata Ielusalema 'waineye kebu bei 'aise'avadi 'waidie tomotoga i na subisubia, 'awalawa matatabuna 'waidie bei Tamada i na subisubiai. ²² Omi me Samelia Yaubada 'wa 'asetai 'waineye 'wa subisubia, siwe kebu 'wa da 'asetai-atumaia, we'e 'ima me Diu 'a 'asetai-atumaia wata Yaubada i venua'ivinema 'waimie To'ita'ita' i na souyeni. ²³ z 'Awaie wata tutuya de'e 'akonadi i velamu tomotoga kebu vanuga 'eba velu'ui 'aise'avadi 'waidie Tamada i na subisubiai, siwe wata yadi nuanua 'waidiega i na subisubia mogitana. Tamada nuanuana tomotoga side bani'odi i na subisubia. ²⁴ a Yaubada taunina 'Anu'anunu kebu ma tomogona, begaidi i lubwaineda ta na subisubia mogitana nuadega.”

²⁵ Vavine i vona Iesu 'waineye i vo, Yau 'a 'asetai Yaubada 'ana Venua'ivina Keliso 'awaie i na mai fwayefwayeye. Tutuyanina i na mai nani fuei i na veifufuyedi matatabuda 'waideye.”²⁶ Iesu i vo, Yau 'asa'aiana kumaniku Keliso, a veveifufu 'waimie.”

Iesu Yaubada i vevematayakeyakeni, 'asa'aiana 'ana'ana.

²⁷ Tutuyanina 'waineye Iesu yana tovetutuyamavo i viladi i maia. I le'wai i 'iseni vavine taiadi i veveifufu nuadi i voganidi bwaikina. Siwe kebu tamu aitoi 'waidiega i da velutoli vavine 'waidie i da vo, Ava'ai nuanuami?” 'alo i da velutoli Iesu 'waineye i da vo, Awale 'u veveifufu vavine taiadi?”

²⁸ Vavinenidi yadi 'eba koi ufa i baileni i 'eno'eno, i viladi i nago 'atamane. ²⁹ Tomotoga i vonedi i vo, Tomogo no'o 'asiauna be'ama 'a

x 4:14 Ion 6:35 y 4:20 Same 122:1-4 z 4:23 Ion 15:26 a 4:24 Lom 12:1

veluagai, yama sauluva matatabuna i lu'ivoneyedi. 'Wa maia ta na nagoi 'wa na 'iseni. Voke kumanina Yaubada 'ana Venua'ivina.”³⁰ Tomotoga matatabudi 'atamana i 'iaweni i maia Iesu 'waineye 'ana 'isa faifaina.

³¹Bola tomotoga i mimaia yana tovetutuyamavo Iesu i lukakadeni i vo, Tove, 'ai'edi sai'afu 'u da 'ani.”³² Yadi vona i tutuli i vo, Yau ma 'aku'aku 'ai'edi nuanuaku 'ani, a na 'ani siwe 'ani'andinina kebu 'wa da 'asetai.”³³ Begaidi yana tovetutuyamavo 'aise'avadi i veifufu i vo, Voke 'ai'edi tamu aitoi 'akonadi 'ani'ani i miedi i 'ani?”³⁴ Iesu yadi veifufu i nogai i vonedi i vo, Yaubada kumanina i vetunekuga yana nuanua matatabuna a vevematayakeyakedi, wata folova i velekuga a na ve'a'avadi, 'asa'aiana kumanidi 'aku'aku.

³⁵ Tutuya fueidi 'wa vonavona 'wa vo, Bola weta'i wata 4 i na 'a'ava, mulieta 'aiala, siwe a na vonemi. 'Wa 'isanawedi sino tomotoga i mimaia, sai'afoga i na vetumagana 'waikuye, taunidi bani'odi 'ani'ani 'akonadi i kumaga, tutuya 'aiala. ³⁶ Yaku tofolovavo tomotoga i na miedi 'waikuye a na tutulidi, taunidi bani'odi to'aiala, wata tomotoganidi i na maiaga 'waikuye mia 'atumaina wata miamia-vagaina i na veluagai. Yaku tofolovavo taunidi basenadi yaku vona i bakulidi tomotoga nuadie, tutuyanina i na 'isedi tomotoganidi ma yadi vetumagana i na mimaia 'waikuye to'aialanidi taiadi i na sosoana. ³⁷ Tamu yada vona 'akonadi 'ana mogitana i souyeni ta vo, Tamu tomogo 'ani'ani i bakuli we'e tamu tomogo i 'aiala.”³⁸ Basenadi yaku tofolovavo yaku vona i bakulidi tomotoga nuadie we'e a vetunemi nonogina 'wa 'a'aialamo tomotoga ma yadi vetumagana 'wa na mimaiedi 'waikuye.”

Me Samelia fueidi i vetumagana Iesu 'waineye.

³⁹ Me Samelia fueidi 'atamananina 'wainega i vetumagana Iesu 'waineye fai vavine i vo, Iesu yama sauluva matatabuna i veifufuyedi.”⁴⁰ Begaidi tutuyanina me Samelia i maia Iesu i 'iseni i voneni i vo, Nuanuama bwaikina taiadi ta na yogomia.” Iesu i nogayedi bei taiadi i miamia 'aiata 'ailuga.

⁴¹⁻⁴² ^dYana lau'age 'wainega wata tomotoga fueidi i vetumagana Iesu 'waineye, tomotoganidi vavine i vonedi i vo, Kebu yami vona 'aisena 'wainega 'a da vetumagana, 'ima taunima yana vona 'a nogai wata 'a 'asetai taunina mogitana tomia fwayafwaya 'ada To'ita'ita'i.”

Iesu tamu toveimea natuna i 'ive'atumaia.

⁴³ Samelia 'waineye 'aiata 'ailuga 'akonadi i 'a'ava, Iesu wata yana tovetutuyamavo taiadi i tovoi i nagoi 'awalawa Galili. ⁴⁴ Basenadi Iesu i vo, Yaubada yana tolu'ivonavo taunidi 'adi tuvadeye kebu ma 'adi

^b 4:34 Ion 6:38, 17:4 ^c 4:35 Luk 10:2 ^d 4:42 1 Ion 4:14

ve'ililibu yadi tomotoga 'waidie.”⁴⁵ Siwe tutuyanina i le'wai Galili Iesu 'ana tuvadeye, tomotoga ma yadi sosoana Iesu i ve'ililibuyeni fai basenadi taunidi i lakaga Ielusalema Sakali Uvi'agalatagona faifaina, bei i 'iseni 'eba nuavogana wata 'eba nua'ewa i 'idewadi.

⁴⁶ Iesu wata yana tovetutuyamavo i viladi i nagoi 'atamana Kena 'awalawa Galili 'waineye, bei basenadi Iesu i vona ufa i ve-oine. Bei Kena 'waineye i miamiani tamu toveimea Kafaneomi 'waineye natuna i viga. ⁴⁷ Tutuyanina vala i nogai Iesu i mai Galili, 'awalawa Iudia 'wainega, i nago 'waineye i voneni i vo, 'Aueva, nuanuaku bwaikina ta na nago Kafaneomi, natuku sai'afoga i na wafa 'u na 'ivaiseni.”
⁴⁸ Iesu i vona toveimeanina 'waineye i vo, 'Omi nuanuami nagami 'eba nuavogana wata 'eba nua'ewa a na 'idewadi 'wa na 'isedi mulieta 'wa na vetumagana 'waikuye, we'e kebu nuanuami nagami 'wa na vetumagana.”
⁴⁹ Toveimeanina i vo, 'Aueva 'ai'edi ta na vemumuna natuku i na wafa, ta na lilide ta na nagoi.”⁵⁰ Iesu i voneni i vo, 'U nago, natumu kebu i na wafaga i na ve'atumai.” Toveimeanina Iesu yana vona i vetumaganeni nika i tauya. ⁵¹ I nunago 'edeye yana tofolovavo i veluagadi yana vala i mimaieni natuna i ve'atumaiga faifaina. ⁵² Begaidi i velutoliedi i vo, Ava'ai 'awasasaga i ve'atumai?” I vo, Bogi 'aiata-'wane'waneye bani'odi 1 kiloki yana luyauyauta i 'awatagoni.”⁵³ Nika tamana i nuani 'awasanina 'waineye Iesu i voneni i vo, Natumu i na ve'atumai.” Begaidi ma yana 'aila'a i vetumagana Iesu 'waineye.

⁵⁴ Iesu yana mai Iudia 'wainega, 'awalawa Galili 'waineye, yana folova toketokena 'ana veluga de'e i 'idewai.

Tamu tomogo Iesu i 'ive'atumaia ufa lilivaneye.

5 ¹ Iesu, toveimea natuna i 'ive'atumaia i 'a'ava, mulieta me Diu totafalolo sakali tamu tulina, i 'idewai Ielusalema 'waineye begaidi Iesu i laka. ² Ielusalema kalikalina we'e tamu 'awa i 'idewai 'ana wagava Sifi-'adi-'Awa, fai beidimo 'aisaya sifi i lukulukuvedi. 'Awanina lilivaneye tamu awana iulaula, awananina me Diu bonadiega i goleni Bedeseida, wata bei 'eba veawai 5 i didigidi. ³⁻⁴ 'Eba veawainidi 'waidie tovinga fuei i miamiani taunidi tomatasako, tubusakosakoidi, wata bwalobwaloko. [Toviganidi bei i lulukamata fai tutuya 'ifwaidi tamu 'Aueva yana anelose i obuobuma ufanina i lulunekwanekwai. I na lunekwanekwai i 'a'avana, aitoi i na kumeta i na obu-matayo'o, kumanina i na ve'atumai 'ana viganina 'wainega.] ⁵ Toviganidi 'waidiega tamu iadi i viga i miamia malamala 38. ⁶ Iesu i mai tomogonina i 'iseni, i 'asetai 'ana viga i 'eno'eno tutuya manamanawena begaidi i velutolieni i vo, Nuanuamu

é 4:46 Ion 2:1-11 f 4:48 Ion 2:18 g 4:50 Mad 8:13; Mak 7:29 h 4:53 Fol 16:31
 i 4:54 Ion 2:11

'u na ve'atumai?" ⁷Toviganina Iesu yana vona i tutuli i vo, 'Auvea, siwe kebu tamu aitoi i na siobuyeku tutuyanina ufanina i na lunekwanekwai. Igodi a da obuobu nika iaku tamu i kumeta i obu i ve'atumai." ⁸Iesu i voneni i vo, 'U tovoi, 'amu 'ivi 'u 'ewai 'u nago." ⁹Iesu yana voneye nika tomogo i ve'atumai 'ana 'ivi i evai i nago.

'Aiatanina 'waineye tomogo i ve'atumaiga, me Diu yadi 'Aiata Veawai 'waineye. ¹⁰^kMe Diu to'edakumetavo i 'iseni tomogonina 'ana 'ivi i evai i nunago begaidi i voneni i vo, Eva wata folova, awale 'Aiata Veawai 'waineye 'amu 'ivi 'u evaeva, yada ve'etoboda 'u geugeuya." ¹¹I vonedi i vo, Tomogonina i 'ive'atumaikuga i voneku i vo, 'Amu 'ivi 'u 'ewai 'u nago." ¹²Me Diu i velutolieni i vo, Aitoi tomogoga bani'odi i voneyedi 'waimuye?" ¹³Siwe tomogo i ve'atumaiga Iesu 'ana wagava kebu i da 'asetaiiga wata 'akonadi Iesu ava'aibe i nago 'aila'a bwaikina 'waidie i vetuwanawana.

¹⁴'Mulieta Iesu tomogonina i lualeni i veluagai vanuga 'eba velu'ui 'waineye i voneni i vo, 'U 'iseni, 'akonadi 'u ve'atumai, kebu wata 'u na sakonaga. 'Ai'edi 'u na sakona-vaitugana, bola tamu nani vitaotogina i na souyeni 'waimuye." ¹⁵Iesu i vona'a'ava, mulieta tomogonina i nago Diu to'edakumetavo 'waidie i vonedi i vo, Tomogonina i 'ive'atumaikuga 'ana wagava Iesu."

¹⁶Begaidi tutuyanina 'waineye me Diu to'edakumetavo i velamu Iesu i vegavieni fai yadi nuanua igodi i vo, Iesu i folofolova 'Aiata Veawai 'waineye." ¹⁷Iesu i vonedi i vo, 'Aiata matatabuna wata 'Aiata Veawai taiadi Tamaku i folofolova, yau wata bani'odi a folofolovaga i lubwaineku." ¹⁸^mYana vonanina de'e 'wainega me Diu to'edakumetavo i kamogala nuanuadi Iesu i na luvewafai fai yadi nuanua i vo, Yada ve'etoboda 'Aiata Veawai faifaina i geugeuya, wata yana sakona i 'imoso'ieni i ve'awa-Tamaku Yaubada 'waineye, igodi nuanuana i na vesala Yaubada taiadi."

Yaubada Natuna ma yana veimea.

¹⁹ⁿBegaidi Iesu me Diu i vonedi i vo, A vona mogitana 'waimie, yau Yaubada Natuna kebu tamu nani yaku nuanuayega a da 'idewai, ava'ai a 'i'idewadiga Tamada 'wainega a 'isa'ewadi. Ava'ai Tamada i 'i'idewadiga, yau wata bani'odi a 'i'idewadi. ²⁰Tamada, yau Natuna i nuakalikalieku bwaikina, wata nani matatabuna i 'i'idewadiga, i veveku. I voneku begaidi toviganina a 'ive'atumaia 'wa 'iseni, siwe sai'afo nani siaina. We'e 'awaie folova toketokeotogidi i na veku a na 'idewadi, 'wa na 'isedi nuami i na voganidi. ²¹^oBani'odi Tamada towafa i sisivetovoidi, yau wata

j 5:8 Mad 9:6 k 5:10 Iel 17:21; Luk 13:14 l 5:14 Ion 8:11 m 5:18 Ion 10:30,33
n 5:19 Ion 8:29 o 5:21 Ion 5:26

egavo nuanuaku mia 'ivauna wata 'atumaina a veveledi. ²²⁻²³^pTomotoga 'adi vematavuloga faifaina kebu Tamada i da veveimea. Yau Natuna veimeanina i veleku tomotoga a na veimeyemi 'ami vematavuloga faifaina, begaidi tomia fwayafwaya matatabumi 'wa na ve'ililibuyeku bani'odi Tamada 'wa veve'ililibuyeni. We'e egavo yau Yaubada Natuna kebu i da veve'ililibuyeku, wata bani'odi Tamada i vetunekuga kebu i da veve'ililibuyeni.

²⁴^qA vona mogitana 'waimie egavo yaku vona i na nogaidi wata i na vetumagana Yaubada 'aku tovetune 'waineye, 'akonadi mia 'atumaina wata miamia-vagaina i veluagai. Tovetumagananidi kebu vematavuloga i na veluagai fai 'akonadi wafaotoga 'ana 'eda i baileni mia-vagatanina i veluagai. ²⁵Wata a vona mogitana 'waimie 'awaie wata tutuya de'e 'akonadi i sousouyeni, tomotoganidi i nunagoi wafaotoga 'ana 'edeamo yaku vona i na nogai. 'Ai'edi tomotoganidi yau Yaubada Natuna yaku vona i na nogai i na vematayakeyakedi mia 'atumaina wata miamia-vagaina i na veluagai. ²⁶Tamada miamia-vagaina yawaimi lamuna, yau wata 'akonadi i tauyeku bega 'ana fata mia-vagatanina 'wa na veluagai 'waikuyega. ²⁷Fai yau a vetomotogaotoga Tamada i tauyeku bega tomia fwayafwaya matatabumi 'wa na vonayavuga matakuye a na veimeyemi. ²⁸⁻²⁹^rYaku vonanidi faifaiddi kebu nuami i na voganidi. 'Awaie wafawafadi taumatayega yaku vona i na nogai, matatabudi i na souyedi. Towafa fuedi, siwe egavo basenadi yadi sauluva 'atumaiddi mia 'atumaina wata miamia-vagaina i na veluagai, we'e egavo yadi sauluva sakoidi yaku veimea 'wainega vematavuloga i na veluagai. ³⁰^sKebu 'ana fata tauniku yaku nuanuayega wata 'aise'avaku a na 'idewai. Ava'ai Yaubada i vonekuga, bani'odi a veveimea, we'e yaku veimeanidi tonovidi fai 'aku tovetunenina yana nuanua a 'i'idewadi, kebu yau yaku nuanua."

Tolu'ivona 'ifwaidi Iesu faifaina.

³¹Wata Iesu i vonedi i vo, 'Ai'edi tauniku faifaiku a na lu'ivona, bola kebu 'wa na ve'awamogitana. ³²^tSiwe tamu tomogo i lu'ivona faifaiku. Taunina Tamaku yana lu'ivonanina vona mogitana. ³³^uBasenadi tomotoga 'ifwaidi 'wa vetunedi i nagoi Ioni Tobafitaiso 'waineye i velutoli faifaiku. Naninidi faifaiku i veifufuyediga, vona mogitana. ³⁴'Ai'edi kebu tamu aitoi i na lu'ivonaga faifaiku kebu tamu ava'ai, siwe nuami a tolinuata'idi Ioni yana lu'ivona faifaina. Yana lu'ivonanina faifaiku 'wa na nuani bega 'ita'itali 'wa na veluagai. ³⁵Ioni bani'odi mageta 'awaiaina, nani fuedi i kiavemagetadi. Yana vona nuanuami, faifaina 'wa sosoana siwe kebu tutuya manamanawenaga wata 'wa baila. ³⁶^vIoni

^p 5:22 Fol 10:42; ^q 5:23 Fil 2:10 ^r 5:24 Ion 3:16 ^s 5:29 Fol 24:15 ^t 5:30 Ion 6:38
^u 5:32 1 Ion 5:9 ^v 5:33 Ion 1:19-27 ^w 5:36 Ion 14:11

yana lu'ivona faifaiku nani bwaikina, we'e nani bwaikaotogina 'eba nuavogana wata 'eba nua'ewa a 'i'idewadi. Folovanidi basenadi Tamada i veleku, 'wa na 'isedi bega 'ana fata 'wa na 'asetai Tamada Yaubada i vetuneku. ³⁷⁻³⁸ "Tamadanina wata taunina 'aku tolu'ivona, siwe kebu tamu tutuya bonana 'wa da nogaiga wata maigina kebu 'wa da 'iseniga, wata kebu nuanuami yana vona, faifainanina yau i vetunekuga kebu 'wa da vetumagana 'waikuye. ³⁹ "Nuanuami mia-vagata 'wa na veluagai, begaidi Yaubada yana Buki 'wa lulu'iawawa-vebogi. Bukinina wata faifaiku i lulu'ivona, siwe 'wa bavuyeni. ⁴⁰ Nuanuami mia-vagata siwe kebu nuanuami 'wa na tauyemi 'waikuye bega 'wa na veluagai.

⁴¹⁻⁴² Yau kebu a da nuanua tauniku 'aku subia tomotoga 'waimiega faifaina, fai a 'asetami kebu Yaubada 'wa da nuakalikalieni. ⁴³ Yau Tamaku yana veimea 'wainega a mai, siwe kebu faifaiku 'wa da sosoana 'wa baila, we'e 'ai'edi tamu aitoi taunina yana nuanuayega i na mai, faifaina 'wa na sosoana. ⁴⁴ Kebu 'ami fata 'wa na vetumaganeku fai nuanuami tauni'avami 'wa na subisubiami we'e kebu nuanuami 'ami subia Yaubada 'wainega. Yaubadanina toketokeotogina, kebu tamu wata aitoi bani'odi. ⁴⁵ 'Awaie tomia fwayafwaya matatabumi 'wa na vonayavuga Tamada mataneyeye siwe kebu a na vevitami yami sakona faifaiki. 'Omi igodi 'wa nuaniga 'wa vo, 'A na luku abame, fai ve'etoboda Mosesa 'wainega 'a veve'ililibuyedi." Siwe Mosesenina 'awaie i na lumatanimi Yaubada mataneyeye fai i kiluma faifaiku siwe kebu 'wa da vetumaganekuga. ⁴⁶ "Ai'edi mogitana Mosesa yana vona Yaubada yana Buki nageneye 'wa da vetumaganediga, yau wata 'wa da vetumaganeku fai faifaiku i kiluma. ⁴⁷ "Vonanina Mosesa i kilumiga faifaiku kebu 'wa da vetumaganediga, bani'odi 'wa na munega 'wa na vetumaganeku?"

'Aila'a 5,000 Iesu i ve'anidi.

6 ¹⁻⁴ Mulieta me Diu yadi Sakali Uvi'agalatagona sai'afoga 'ana tutuya i na veluagai, Iesu wata yana tovetutuyamavo i viladi i damana Lavu Galili, me Loma bonadiega Lavu Taibilia. 'Aila'a bwaikina Iesu i yoyogo'waili fai 'akonadi yana folova toketokena i 'isedi tovigga 'waidie. Iesu wata yana tovetutuyamavo taiadi i laka 'oyeye bei i miabui. ⁵ Iesu i 'isanago 'aila'a bwaikina i 'isedi i mimai 'waidie begaidi i velutoli Filifi 'waineye i vo, Bani'odi ta na munega 'ani'ani sai'afo moso'ina ta na kimwanei 'aila'a no'o ta na ve'anidi?" ⁶ Iesu 'akonadi i 'asetai 'ako bani'odi i na munega bega 'aila'a i na ve'anidi, siwe nuanuana Filifi yana vetumagana i na sitonovi begaidi i velutoli. ⁷ Filifi Iesu yana velutoli i tutuli i vo, 'Ai'edi de'e tomotoganidi 'ani'ani siaina siaina i na 'aniga, tutulina lubulubu 200^a igodi ta kimwaneyeniga 'ana fata." ⁸⁻⁹ Saimoni Fita taina, tamu Iesu yana

^w 5:37 Luk 3:22 ^x 5:39 Luk 24:27 ^y 5:46 Fol 3:22 ^z 5:47 Luk 16:31 ^a 6:7 Me Diu yadi mani Denali 200. Denali 'aitamogana, 'aiata 'aitamogana 'ana folova tutulina.

tovetutuyama 'ana wagava Anidulu, i vona Iesu 'waineye i vo, Sino tamu kwamana nimaneye 'ani'ani mwadodoudi 5 wata igana vakavakalidi 'ailuga. Siwe ava'ai 'ana 'atumaina? 'Ani'ani siaina we'e 'aila'a bwaikina.”¹⁰ Bei mosomoso bikadi wata 'ale'usadi bega Iesu yana tovetutuyamavo i vonedi i vo, Tomotoga 'wa vemiabuidi mosomoso tabwadie.” Bega tomotoga i miabui iaveta tulai'avadi 'adi 'aila'a 5,000, siwe wata vevine yavayavava taiadi.¹¹ Iesu 'ani'ani mwadodoudi i 'ewadi, Yaubada 'waineye i vekaiwa, mulieta yana tovetutuyamavo i veledi i veusedi tomotoganidi i miabuiga 'waidie. Wata bani'odi igana i munegidi, matatabudi i 'ani kamodi i aidi.¹² I 'ani'a'ava Iesu yana tovetutuyamavo i vonedi i vo, Nuanuaku 'ani'ani 'wa veuseni we'e 'ifwaidi 'wa luvegelelediga 'wa na kwakwadi bega kebu tamu ta na 'ivekokovi.”¹³ Matatabuna i kwakwadi bayawa 12 i vedodogidi i adaga.¹⁴ ^bTomotoganidi Iesu yana folova toketokena i 'iseni i vo, Vona mogitana, Iesu kumanina tolu'ivonanina basenadiotoga Yaubada i vona'awaufaufa i vo, I na mai.”¹⁵ ^cIesu tomotoga yadi nuanua i 'asetai nuanuadi i na 'ive'avini i na naweni i na ve-kini faifaiddi, begaidi i tovoi wata 'aisena i vilai i laka 'oyeye fai kebu nuanuana.

Iesu ufa tabwaneamo i nago.

¹⁶ ^dIesu i laka 'oyeye, we'e lavilavie yana tovetutuyamavo i obu balebaleye.¹⁷ Bei Iesu i lulukamaseni nika 'akonadi i lovani begaidi i dodoga i na nagoi Kafaneomi.¹⁸ I damadamana nika kaukau wata yagina bwaikidi i veluagadi.¹⁹ I tokemaigedi i voi i nago sai'afo manamanawena^e nika Iesu i 'iseni ufa tabwaneamo i mimai waka lilivaneye, matatabudi i kololo-'afo'afo.²⁰ Iesu i vonedi i vo, Kebu 'wa na kolologa, yau taunida.”²¹ Tutuyanina i 'asetai mogitana Iesu, i voneni i dodoga nika waka i lilide i duduna-matayo'o Kafaneomi.

Tomotoga nuanuadi Iesu.

²² I 'atai, we'e tomotoga bei i ve'anidiga no'o bei i miamiani, igodi Iesu i lulukamaseni balebaleye, fai yadi 'asetai i vo, Wakanina i mieniga 'akonadi tovetutuyamavo 'aisedi 'wainega i viladi.”²³ We'e waka tulidi 'atamana Taibilia 'wainega i nagoi i luku bei Iesu 'aila'a i ve'anidiga lilivaneye.²⁴ Tutuyanina 'aila'a Iesu i 'isa'avai wata yana tovetutuyamavo, wakanidi 'waidie i dodoga i lualedi i maia Kafaneomi.

Iesu taunina 'ani'ani yada mia 'ivauna wata 'atumaina faifaina.

²⁵ Tomotoga Iesu i lulualeni nika i veluagai Kafaneomi 'eba miava'auta nageneye, i velutolieni i vo, Tove, ma'avai 'u mai de'e bei?”²⁶ Iesu i

^b 6:14 Fol 3:22 ^c 6:15 Mad 14:23 ^d 6:16-17 Mak 6:46 ^e 6:19 'Ana mogitana bani'odi 5 'alo 6 kilomita.

voned i vo, A vona mogitana 'waimie, yaku folova toketokena 'wa 'iseni siwe kebu faifaina 'wa da vetumagana 'waikuye 'wa da yoyogo'wai'waila, a ve'animiga faifaina 'wa yoyogo'wai'waila. ²⁷Kebu i da lubwainemi 'ani'ani 'ana nuanua i na vebwaika 'waimie, fai bola 'ani'andinidi i na koga wata i na 'anikudadi. 'Ani'andinina kumanina 'wainega mia 'atumaina wata miamia-vagaina 'wa na veluagaiga, i lubwainemi faifaina 'wa na nuanua. Yau a vetomotogaotoga Tamada Yaubada i venua'ivineku 'aku fata 'ani'andinina 'atumaina a na vele mi.” ²⁸Tomotoga i velutoli Iesu 'waineye i vo, Bani'odi 'a na munega Yaubada yana folova 'a na 'idewadi?” ²⁹Iesu i vo, Yaubada nuanuana yami folova side bani'odi. Yau i vetunekuga 'wa na vetumaganekumo. Siwe 'asa'aiana yami folova.”

³⁰Yana vona i tutuli i vo, Nuanuama yamu folova toketokena ma 'ana 'eba 'isa 'u na 'idewai, bega 'a na 'iseni 'a na 'asetai Yaubada i vetunemu, 'waimuye 'a na vetumagana. Siwe ava'ai folovaga toketokena 'u na 'idewai? ³¹^hBasenadiotoga sali'avu'avuye tubudavo i yabayaba 'adi'adi kebu, bega Yaubada 'ani'ani tamu 'ana wagava mana i veledi abamega, wata bani'odi basenadiotoga i kilumi Yaubada yana Buki 'waineye i vo, 'Ani'ani abamega i veledi i 'ani.” 'Auvea, nuanuama 'omu wata bani'odi 'aiata 'aitamogana 'aitamogana 'ani'ani 'u na velelema.” ³²Iesu i vonedi i vo, A vona mogitana 'waimie, we'e 'ani'andinina kebu Mosese yana 'anivelenaga, Tamaku yana 'anivelenaga abamega, siwe 'asiau nuanuana tamu 'ani'ani i na vele mi, 'ani'andinina 'ani'ani mogitana. ³³'Ani'andinina mogitana tamu tomogo, siwe 'asa'aiana taunina 'ani'ani. Tomogonina abamega i obuma bega tomia fwayafwaya mia 'ivauna wata 'atumaina 'wa na veluagai.” ³⁴Tomotoganidi i vo, 'Auvea, 'ani'andinina nuanuama tutuya fuedi 'u na velelema.” ³⁵ⁱIesu i vonedi i vo, Yau 'asa'aiana kumaniku 'ani'ani. Yau mia 'ivauna wata 'atumaina 'ana to'anivelenaga tomotoga 'waimie. 'Ai'edi egavo i na mai 'waikuye kebu i na lasega, wata 'ai'edi egavo i na vetumagana 'waikuye kebu 'anigodi i na lala.

³⁶'Akonadi a vonemi, matamie yaku folova toketokena a 'idewai 'wa 'iseni siwe kebu 'wa da vetumagana 'waikuye. ³⁷^jTomotoganidi Tamada i na 'anivelenedi, matatabudi i na maia 'waikuye wata kebu tamu sai'afu a na vedumwe'ai'ai'edi. ³⁸Yau a maiga abamega 'aku tovetune yana nuanua a na 'idewadi, kebu tauniku yaku nuanuaga. ³⁹^kAku tovetunenina yana nuanua side bani'odi. Nuanuana tomotoganidi i 'anivelenedi 'waikuye a na 'ita'ita'iedi, kebu tamu aitoi a na baileniga, wata tutuyanina tomotoga 'wa na vonayavuga Yaubada mataneye, yaku tomotoga yawaidi a na veledi i na tovoi-vaitugana. ⁴⁰^lSide bani'odi. Tamaku nuanuana tomotoga matatabumi taunimi 'wa na tauyemi 'waikuye 'wa na vetumagana,

^f 6:27 Ion 6:48-51 ^g 6:29 1 Ion 3:23 ^h 6:31 Sou 16:4,14-15 ⁱ 6:35 Ion 4:14
^j 6:37 Ion 17:6-8 ^k 6:39 Ion 10:28-29, 17:12 ^l 6:40 Ion 11:25-26

mia 'atumaina wata miamia-vagaina 'wa na veluagai wata tutuyanina tomotoga 'wa na vonayavuga Yaubada mataneyeye a na sivetovoimi.”

Iesu 'asa'aiana 'ada'ada mogitana.

⁴¹Me Diu ma yadi nuasako i vebonavoluvolu fai Iesu i vo, Yau 'ami'ami a mai abamega.” ⁴²Begaidi i vo, Awale igodi bani'odi i voneyedi i vo, A obuma abamega”? Tamana wata inana ta 'asetadi. Iesu tomotogaotoga, Iosefa natuna.” ⁴³Iesu i vonedi i vo, Kebu 'aise'avami 'wa na vebonavoluvoluga. ⁴⁴Kebu tamu aitoi 'ana fata taunina yana nuanuayega i na mai 'waikuye, Tamada 'aku tovetune nagami i na 'ivaiseni yana nuanua i na sivilai bega 'ana fata taunina i na tauyeni 'waikuye wata tutuyanina tomotoga 'wa na vonayavuga Yaubada mataneyeye a na sivetovoia. ⁴⁵^mBasenadiotoga yaku vonanina faifaina Yaubada yana tolu'ivonavo i kilumi i vo,

Tomotoga matatabudi Yaubada i na 'ivaisedi wata i na ve 'waidie.”

Begaidi egavo Tamada yana vona i na nogai bega i na ve 'waidie, 'adi fata i na maia 'waikuye. ⁴⁶ⁿWe'e 'omi kebu tamu aitoi Tamada i da 'iseniga, yau 'aiseotogiku a 'iseni fai a mai taunina Yaubada 'wainega. ⁴⁷^oA vona mogitana 'waimie, egavo ma yadi vetumagana taunidi i tauyedi 'waikuye, 'akonadi mia 'atumaina wata miamia-vagaina i veluagai. ⁴⁸^pYau 'asa'aiana kumaniku 'ani'ani. Yau mia 'ivauna wata 'atumaina 'ana to'anivelena tomotoga 'waidie. ⁴⁹Basenadiotoga sali'avu'avuye tubudavo 'ani'ani abamega i 'ani siwe kebu i da mia-vagata i wafa. ⁵⁰We'e 'ani'ani mogitana i obuma abamega egavo i na 'ani, kebu i na wafaotoga. ⁵¹Yau 'asa'aiana kumaniku 'ani'ani abamega a obuma. 'Ai'edi egavo 'ani'andinina i na 'aniaga kebu i na wafaotoga i na mia-vagata. 'Ani'andinina a vonevoneyeniga tomogoku a na tauyeni bega tomia fwayafwaya matatabumi 'ami fata mia 'ivauna wata 'atumaina 'wa na veluagai.”

⁵²Me Diu Iesu yana vona i nogai ma yadi nuasako 'aise'avadi i ve'ikwayekwayega i vo, No'o tomogo bani'odi i na munega tomogona i na veleda ta na 'ania? Kebu tamu sai'afu i da lubwaineni.” ⁵³Iesu i vonedi i vo, A vona mogitana 'waimie, yau a vetomotogaotoga 'ai'edi egavo kebu tomogoku i na 'aniaga wata dayagiku i na yemuyaga, kebu 'adi fata mia 'ivauna wata 'atumaina i na veluagai. ⁵⁴^qEgavo tomogoku i na 'aniaga wata dayagiku i na yemuga 'akonadi mia 'atumaina wata miamia-vagaina i veluagai wata tutuyanina tomotoga 'wa na vonayavuga Yaubada mataneyeye a na sivetovoidi. ⁵⁵Fai, tomogoku 'ani'ani mogitana, wata dayagiku alu'ai mogitana. ⁵⁶Egavo tomogoku i na 'ania wata

^m 6:45 Ais 54:13 ⁿ 6:46 Ion 1:18 ^o 6:47 Ion 3:16 ^p 6:48 Ion 6:58
^q 6:54-56 Mad 26:26-28

dayagiku i na yemuyaga a na miamia nagedie yau 'adi labilabina wata i na miamiani nagekuye. ⁵⁷Tamada 'aku tovetune miamia-vagaina kebu yana 'a'avaga begaidi yana toketokena 'wainega a miamia. Wata bani'odi egavo i na 'anikuga yaku toketokena 'wainega i na mia-vagata. ⁵⁸Basenadiotoga tubudavo sali'avu'avuye 'ani'ani abamega i 'ani, siwe kebu 'ani'ani mogitana begaidi kebu i da mia-vagata i wafa. We'e yau 'ani'ani mogitana, abamega a mai 'ai'edi egavo 'ani'aninina i na 'aniaga i na mia-vagata.”

⁵⁹De'e Iesu yana ve, i lau'age tomotoga 'waidie 'atamana Kafaneomi, 'eba miava'auta nageneye.

Tovetutuyamavo 'ifwaidi Iesu i baileni.

⁶⁰Tovetutuyamavo fuedi Iesu yana vona i nogai 'aise'avadi i veifufu i vo, Iesu yana ve 'waideye 'ana nogaya vitana, kebu nuanuada. Kebu tamu aitoi 'ana fata i na 'asetai.” ⁶¹Iesu i 'asetai yana tovetutuyamavo i vevebonavoluvolu yana ve faifaina begaidi i vonedi i vo, Yaku ve faifaina voke bunumi i mayaga. ⁶²Yaku venina vitana 'waimie kebu nuanuami, siwe 'ai'edi 'wa na 'iseku yau a vetomotogaotoga a na vilaku a na laka abame, 'waimie vitaotogina.’ ⁶³⁻⁶⁴^s'Anu'anunu 'Atumaina 'aiseotogina 'ana fata mia 'ivauna wata 'atumaina i na velempi, kebu tamu wata aitoi 'ana fata i na 'ivaisemi bega mianina 'ivauna wata 'atumaina 'wa na veluagai. Yaku vonanidi 'akonadi a voneyediga 'anu'anunumi 'adi 'aivaita, 'waidiega 'ami fata mianina 'ivauna 'wa na veluagai, siwe 'ifwaimi kebu 'wa da vetumagana.”

Iesu de'e bani'odi i voneyediga fai nagami i 'asetai egavo kebu i da vetumagana, wata 'waidiega kumanina 'awaie i na 'etogiluvuni i 'asetai. ⁶⁵‘Wata Iesu i vona tomotoga 'waidie i vo, Yaku ve 'ana nogaya vitana 'waimie, faifainanina basenadi a vonemi a vo, Kebu tamu aitoi 'ana fata taunina yana nuanuanayega i na mai 'waikuye, Tamada nagami i na 'ivaiseni yana nuanua i na sivilai bega 'ana fata taunina i na tauyeni 'waikuye.”

⁶⁶Yana vonanina faifaina yana tovetutuyamavo 'ifwaidi i baileni, kebu nuanuadi wata i na vevetutuyameni. ⁶⁷Begaidi Iesu yana tovetutuyamavo 'adi 12 i velutoliedi i vo, We'e 'omi bani'odi? Nuanuami 'wa na baileku 'wa na nagoi?” ⁶⁸Saimoni Fita yana velutoli i tutuli i vo, 'Auvea, kebu 'ana fata tamu wata aitoi 'waineye 'a na nagoi. Yamu vona 'waidiega 'ama fata mia 'atumaina wata miamia-vagaina 'a na veluagai. ⁶⁹“Tutuya de'e 'a 'asetamu wata 'a vetumagana 'omu Yaubada Natuna Magemagetamu.”

^r 6:62 Iesu i veifufu yana laka abame wata yana wafa faifaidi. Yana wafa 'waineye yana tovetutuyamavo i bunumayaga i ve'aladegadega. ^s 6:63 2 Kol 3:6 ^t 6:65 Ion 6:44
^u 6:69 Mad 14:33, 16:16

70 Iesu i vonedi i vo, Vona mogitana 'ami 12 a venua'ivinemi, siwe 'waimiega tamu Seitani iana.” 71 Iesu i vonavona Iudasa faifaina, taunina Saimoni Isakaliota natuna wata tamu 'adi 'aila'a 12 'wainega, siwe taunina Iesu 'ana to'etogiluva.

Iesu tainavo kebu i da vetumagana 'waineye.

7 ¹ Mulieta Iesu i folova-vuvua 'awalawa Galili nageneye, kebu i da nago Iudia, fai me Diu to'edakumetavo nuanuadi i na luwewafai. ²⁻³ ^w Me Diu yadi Sakali 'Ayavau^x sai'afoga 'ana tutuya i na veluagai, bega Iesu tainavo i voneni i vo, Yada 'awalawa 'u na baileni 'u na nago 'awalawa Iudia, 'u na folofolova yamu tovetutuyamavo i miamiani 'waidie, 'eba nuavogana wata 'eba nua'ewa 'u na 'i'idewadiga i na 'ise'isedi. ⁴ Egavo nuanuadi tomotoga i na subisubiadi kebu i da folovagivagiva, 'ai'edi nuanuamu fuedi i na subiamu 'u na vemageta, 'eba nuavogana wata 'eba nua'ewa 'u na 'i'idewadi 'aila'a bwaikina matadie.” ⁵ ^y Tainavo bani'odi i voneyediga fai taunidi wata kebu i da vetumagana 'waineye. ⁶ Iesu i vonedi i vo, 'Ai'edi nuanuami, 'omi i lubwainemi 'ami fata 'wa na nagoi Iudia we'e yau yaku tutuya bei a na sivemagesekuga bola. ⁷ ^z Kebu 'ana fata 'omi tomia fwayafwaya i na vedumwe'ai'aiemi, we'e mogitana yau 'akonadi i vevedumwe'ai'aieku fai tutuya fuedi a vonevoned i vo, 'Omi yami sauluva sakoidi.” ⁸ ^a Asa'aiana, 'wa kumeta ta waia sakalinina 'waineye. Tutuya de'e kebu i da lubwaineku.” ⁹ Iesu i vona'a'ava, bei Galili i miamia.

Iesu i nago 'Ayavau 'ana Sakali 'waineye.

¹⁰ Iesu tainavo i kumeta i nagoi Ielusalema sakalinina faifaina, mulieta Iesu i vemuli, givagivayega i nago kebu i da vemageta. ¹¹ Sakali nageneye me Diu to'edakumetavo Iesu i lualeni i vo, Ava'aibe bei Iesu taunina.” ¹² Tomotoga fuedi i ve'awayaya Iesu faifaina, 'ifwaidi i vo, Tomogo 'atumaina,” we'e 'ifwaidi i vo, Kebu, we'e i vevekalieda.” ¹³ ^c Siwe kebu tamu aitoi mageseye i da veveifufu fai me Diu to'edakumetavo i kololoyedi.

¹⁴ Sakalinina 'ana 'aiata sai'afoga i da 'a'ava, nika Iesu i vemageta i luku vanuga 'eba velu'ui nageneye, bei i velamu i veve tomotoga 'waidie. ¹⁵ ^b Me Diu nuadi i voganidi yana ve faifaina i vo, Tomogo no'o kebu i da nago sikulu 'waineye. Bani'odi i munega yana 'aset a bwaikina?” ¹⁶ ^c Begaidi Iesu tomotoganidi i vonedi i vo, Yau kebu tauniku yaku nuanuayega a da veve, venidi Yaubada 'aku tovetune 'wainega i mai.

v 7:1 Ion 5:18 w 7:2 VeL 16:13 x 7:2-3 Sakalinina 'waineye me Diu yadi vanuga i baibaile di tulidie i lalau'weta begaidi i goleni Lau'weta 'ana Sakali. y 7:5 Fol 1:14 z 7:7 Ion 15:18 a 7:13 Ion 12:42, 19:38 b 7:15 Mad 13:54 c 7:16 Ion 12:49, 14:10

¹⁷Egavo nuanuadi Yaubada yana nuanua i na 'i'idewadi, i na 'asetai kebu a da veve yaku nuanuayega, Yaubada 'wainega i mai. ¹⁸Aitoi yana nuanuayega i na veveifufu, kumanina nuanuana tomotoga i na subisubiai, we'e aitoi nuanuana tomotoga 'ana tovetune i na subisubiai, yana sauluva tonovidi wata kebu tamu tutuya i da vekali. ¹⁹Basenadiotoga Mosese ve'etoboda i velemini, siwe 'wa da vo kebu i da velemiga fai ve'etobodanidi matatabumi 'wa geugeudi, bega igodi nuanuami 'wa na luvewafaku.” ²⁰^dAila'anidi Iesu yana vona i tutuli i vo, 'Omu yaiaina i agemu bega 'wawa'wavamu, kebu tamu aitoi 'amu 'ainike i da voneyeni.” ²¹Iesu i vonedi i vo, 'Omi nuami i voganidi fai 'Aiata Veawai 'waineye tomogo a 'ive'atumaia Ufa Bedeseida 'waineye. ²²^eSiwe 'omi wata 'wa folofolova 'Aiata Veawai 'waidie, fai veimea Mosese 'wainega bunu 'aibobo faifaina 'wa vevematayakeyakeni 'Aiata Veawai 'waidie 'wa 'i'idewai. We'e bunu 'aibobo kebu mogitana Mosese 'wainega i da maiga, i velamu tubuda Ebelamo yana tutuye. ²³^fVeimeanina natumiavo iavetadi 'adi 'aiata 8 i veveluagadi bunudi 'wa bobobodi, siwe wata 'ai'edi tamu kwamana 'ana 'aiata 8 i na veluagai 'Aiata Veawai 'waineye 'wa 'i'idewaimo, nika 'asa'aiana bei 'wa folofolova. Fai 'omi 'wa folofolova 'Aiata Veawai 'waidie, awale 'wa nuasako-maimaiga 'waikuye tomogo a 'ive'atumaotogi 'Aiata Veawai 'waineye faifaina? ²⁴^gKebu 'isa'ava 'wainega 'wa na 'amalakibuyeku, nagami 'wa na venuma'ivina-'atumai mulieta 'wa na vona.”

Tomotoga Iesu i ve'ikwayekwayegeni.

²⁵Ifwaidi Ielulema 'ana tomotoga i vo, Voke no'o tomogonina yada to'edakumetavo nuanuadi i na luvewafai. ²⁶'Wa 'iseni? 'Aila'a matadeye i veveifufu siwe kebu tamu aitoi Iesu i da talabodeni. Voke yada to'edakumetavo 'akonadi i 'asetai taunina Keliso, Yaubada 'ana Venuma'ivina. ²⁷^hSiwe 'ida 'akonadi ta 'asetai 'ai'edi Keliso i na souyeni, kebu tamu aitoi i na 'asetai yana 'eba mai. We'e 'atamananina 'wainega Iesu i maiga 'akonadi matatabuda ta 'asetai.”

²⁸ⁱIesu i veve vanuga 'eba velu'ui nageneye bonana bwaikinega tomotoga i vonedi i vo, 'Omi 'wa da vo 'wa da 'asetai yaku 'eba mai wata 'wa da vo 'wa da 'asetaku. Yau a maiga, kebu tauniku yaku nuanuayega, 'aku tovetune nuanuana begaidi a mai. 'Aku tovetunenina yana nuanua 'atumai'avadi wata tonovidi, siwe 'omi kebu 'wa da 'asetai. ²⁹We'e yau a 'asetai fai 'wainega a mai wata i vetuneku.”

³⁰^jYana vonanina faifaina nuanuadi i da 'ive'avini siwe kebu tamu aitoi 'ana fata, fai 'ana tutuya i lubwaineni 'waineye i na 'ive'aviniga,

^d 7:20 Ion 8:48-52 ^e 7:22 Vei 12:3 ^f 7:23 Ion 5:8-10,16 ^g 7:24 Ion 8:15
^h 7:27 Ion 7:41-42 ⁱ 7:28-29 Mad 11:27 ^j 7:30 Ion 8:20, 13:1

bola. ³¹ ^k Awinodi tomotoga fue di i vedumwe'ai'aieni, siwe wata tomotoga fue di 'aila'anina nageneye i vetumagana Iesu 'waineye i vo, Ta 'asetai tutuyanina Keliso i na mai 'eba nuavogana wata 'eba nua'ewa fue di i na 'idewadi. Vona mogitana de'e taunina Keliso, Yaubada 'ana Venua'ivina. Kebu tamu aitoi 'ana fata Iesu i na salai 'alo i na 'iaweni.”

Igodi Iesu i da 'ive'avini.

³² Diu totafalolo Falisi i nogai tomotoga 'ifwaidi i veve'awayaya i vo, Voke Iesu taunina Keliso,” begaidi Falisinidi wata tovelomu 'adi to'edakumetavo, vanuga 'eba velu'ui 'ana to'isave'avinavo i vetunedi i nagoi Iesu i na 'ive'avini. ³³ Siwe Iesu i vona to'ive'avinanidi wata 'aila'a 'waidie i vo, Tutuya 'ale'usana yau taiadi ta na miamia, mulieta a na nago 'aku tovetune 'waineye. ³⁴ ^l Wa na lualeku siwe kebu 'wa na veluagaku, wata kebu 'ana fata 'wa na waia yaku 'eba mia 'waineye.” ³⁵ Me Diu to'edakumetavo 'aise'avadi i veifufu i vo, Ava'aibe bei igodi i na nago bega kebu 'ada fata ta na veluagai? Voke i na nago me Guliki yadi 'atamana 'waidie, bei me Diu i miamiani bega tomotoga taunidi kebu Diu i na veve 'waidie? ³⁶ Fai i vo, 'Wa na lualeku siwe kebu 'wa na veluagaku,” wata i vo, Kebu 'ami fata 'wa na wai yaku 'eba mia 'waineye.” Awale bani'odi i voneyedi?”

Ufa-luluvuala mia 'ivauna wata 'atumaina faifaina.

³⁷ ^m Me Diu yadi Sakali 'Ayavau 'ana 'aiata 'eba ve'a'ava, 'aiata bwaikina. 'Aiatanina 'waineye Iesu i tovoi i vegolegole i vo, Egavo nuanuami bwaikina mia 'ivauna wata 'atumaina bani'odi 'anigomi i lala, i lubwainemi 'wa na maia 'waikuye 'wa na yemu. ³⁸ Yaubada yana Buki 'waineye, faifaiku side bani'odi i voneyedi. I vo, Egavo ma yami vetumagana taunimi 'wa na tauyemi 'waikuye, yami nuanua nagedie bani'odi ufa i na luluvuala-vebogi. Ufanina 'wainega mia 'ivauna wata 'atumaina i sousouyeni.” ³⁹ ⁿ De'e bani'odi Iesu i voneyediga, bola 'Anu'anunu 'Atumaina tovetumaganavo i na agedi. Iesu i vonavona fai bola kebu i da wafa bega i da lakaga abame yana 'ai'aiwabu 'waineye, begaidi 'Anu'anununina kebu i da 'aniveleneni tomotoga 'waidie bega i na agedi.

Tomotoga 'waidiega 'idi i souyeni.

⁴⁰ ^o Aila'anidi Iesu yana vona i nogai, 'ifwaidi i vo, Taunina mogitana tolu'ivonanina faifaina basenadiotoga Yaubada i vona'awaufaufa i na mai nika 'akonadi i mai.” ⁴¹ We'e 'ifwaidi i vo, Kebu, no'o Keliso,

^k 7:31 Ion 2:23, 11:45 ^l 7:34 Ion 8:21 ^m 7:37-38 Ion 4:10,14 ⁿ 7:39 Ion 15:26; Fol 2:4
^o 7:40 Fol 3:22

Yaubada 'ana Venua'ivina.” Siwe 'ifwaidi i vo, Ta 'asetai Keliso kebu i na maiga 'awalawa Galili 'wainega, siwe 'awalawanina 'wainega Iesu i mai. ⁴²Basenadiotoga i kilumiga Yaubada yana Buki 'waineye Kelisonina i na souyeni Kini Devida 'ana wauma 'wainega wata i na tubuga 'ana tuvadeye, 'atamana Bedeliema.” ⁴³Bega 'aila'a i 'idia Iesu faifaina. ⁴⁴Ifwaidi nuanuadi i na 'ive'avini, siwe kebu tamu aitoi i da 'abi tomogoneye.

Me Diu yadi to'edakumetavo kebu i da vetumagana Iesu 'waineye.

⁴⁵To'isave'avinanidi i maia igodi Iesu 'ana 'ive'avina faifaina i viladi i nagoi Falisi wata tovelomu 'adi to'edakumetavo 'waidie. To'edakumetanidi i velutoli i vo, Awale kebu Iesu 'wa da mieniga?” ⁴⁶To'isave'avinanidi i vo, Tomogo no'o yana vona 'adi nogaya 'atumaiotogidi, kebu tamu aitoi bani'odiga.” ⁴⁷Falisi i velutoli i vo, Voke 'omi wata yana vona nuami i 'ewadi? ⁴⁸'Kebu tamu sai'afo 'ima yami to'edakumetavo 'waimega, 'alo Falisi i da vetumagana tomogonina 'waineye. ⁴⁹Aila'anidi Iesu yana vona i noganogaiga, ve'etoboda Mosese 'wainega i bavuyedi, 'awaie 'adi vematavuloga i na veluagai Yaubada 'wainega.” ⁵⁰⁻⁵¹To'edakumetanidi 'waidiega tamu 'ana wagava Nikodimo, kumanina basenadi i nago Iesu taiadi i veifufu. Enavo i vonedi i vo, Kebu i da lubwaineda yada ve'etoboda ta na geudi. Nagami Iesu i na vonayavuga matadeye, 'ai'edi ma yana sakona, mulieta 'ana fata ta na veimea vematavuloga i na veluagai.” ⁵²⁻⁵³I voneni i vo, Voke 'omu wata 'u mai Galiliega, Iesu taiadi ma fuemi sakoimi. 'Ai'edi Yaubada yana Buki 'u da lu'iawawaga, 'u da 'asetai kebu tamu Yaubada yana tolu'ivona i da souyeni 'awalawa Galili 'wainega.”

Nuanuadi igodi tamu vavine i da lukileudi.

8 [1 Me Diu yadi ve'ikwayekwayega i 'a'ava, i nagoi yadi vanuge, we'e Iesu i laka 'Oya Olive. ²I 'atai 'awa'awaiogose i vilai i mai vanuga 'eba velu'ui nageneye. 'Aila'a bwaikina i maia 'waineye bega Iesu i miabui i ve 'waidie. ³We'e ve'etoboda 'adi tovevo wata totafalolo Falisi, tamu vavine i miedi Iesu 'waineye. Vavinenidi 'ifwaidi tomotoga i veluagadi tamu tomogo tulina taiadi i veve'avula bega i miedi Iesu wata 'aila'a bwaikina matadie. ⁴To'edakumetanidi Iesu i voneni i vo, Tove, vavine de'e 'a miediga, mogitana i 'isedi tamu tomogo taiadi i veve'avula. ⁵Basenadiotoga Mosese yada ve'etoboda i kilumi i vo 'ai'edi de'e sauluvanina, i lubwaineni kileuyega ta na tutuvewafadi. We'e 'omu yamu nuanua bani'odi?” ⁶De'e bani'odi i voneyediga Iesu i sisiloloi, nuanuadi

P 7:42 Mai 5:2; Mad 2:4-6 ¶ 7:43 Ion 9:16 † 7:45 Ion 7:32 § 7:46 Mak 1:22
 † 7:48 Ion 12:42 ¨ 7:50-51 Ion 3:1-2 † 8:5 Vei 20:10

bonana i na nogai, 'ai'edi i na vekaliga i na 'ive'avini i na naweni 'eba vonayavuga 'waineye. Siwe Iesu kebu tamu ava'ai i da voneyeniga, i 'odumo fwayefwayeye nimanega i kilukiluma. ⁷Bola i kilukiluma wata tovevitanidi i lulukwayegeni nuanuadi Iesu yadi vona i na tutuli, mulieta Iesu i tovoi i vonedi i vo, 'Atumaina, siwe aitoi 'waimiega kebu yana sakonaga, kumanina nagami kileu i na 'ewai vavine i na nikedi.” ⁸Wata i 'odu-vaitugana, i kilukiluma fwayefwayeye. ⁹Tomotoga Iesu yana vonanina i nogai, 'aitamogana 'aitamogana i sousouyedi i degadega, we'e 'au'auveadi kumanidiavo nagami i souyedi. Tovevitanidi i nagoi we'e Iesu wata vavine taiadi i miamia. ¹⁰Mulieta Iesu i tovoi vavine i vonedi i vo, Tomotoganidi i miemiga 'akonadi i tauya? Tomotoga nuanuadi i na nikemi yami sakona faifaina aitoina tamu i 'ainike?” ¹¹”Vavine i vo, 'Auvea kebu tamu aitoi i da nikema.” Iesu i vonedi i vo, Yau wata, kebu a na veimea vematavuloga 'wa na veluagai. 'Asa'aiana 'wa souyemi 'wa nago, siwe kebu wata 'wa na sakosakona.”]

Iesu tomia fwayafwaya yada mageta.

¹² ^xTomotoganidi i miamiani vanuga 'eba velu'ui nageneye Iesu i vonedi i vo, Yau 'omi tomia fwayafwaya yami mageta, wata yau kumaniku tomotoga nuami 'adi tokiavemageta. Egavo i na vetumagana 'waikuye yadi nuanua kebu dududubalidiga siwe mia 'ivauna wata 'atumaina i na veluagai magetanina 'wainega.” ¹³Totafalolo Falisi i voneni i vo, Taunimu 'u awa'ai'aimu, kebu 'a na ve'awamogitana yamu vona faifaidi.” ¹⁴Wata Iesu i vonedi i vo, A vonaga tauniku faifaiku vona mogitana, fai a 'asetai ava'aiega a mai wata 'awaie a na nago 'waineye, we'e 'omi bega a maiga wata bei a na nagoga kebu 'wa da 'asetai. ¹⁵⁻¹⁶”^yOmi 'isa'ava 'wainega 'wa 'a'amalakibu, kebu 'asetai mogitana 'wainega 'wa da vevenua'ivina. Yau kebu a da vevenua'ivinaga yami sakona faifaina, we'e 'ai'edi a na venua'ivinaga yaku venua'ivinanina mogitana wata tonovina, fai kebu 'aiseku yaku nuanuayega, Tamada 'aku tovetune i 'i'ivaiseku wata i labilabiniku. ¹⁷Yami veimea kilukilumina i 'eno'eno i vo, 'Ai'edi tomotoga 'adi 'ailuga yadi lu'ivona i na vesala, i vona mogitana.” ¹⁸”^zWata bani'odi yau tauniku faifaiku a vonavona, wata Tamada, 'aku tovetune i vonavona faifaiku, 'ama 'ailuga yama vona i vesala bega vona mogitana.” ¹⁹”^aFalisinidi i velutolieni Iesu i vo, Ava'aibe bei tamamu?” Iesu i vo, 'Wa bavuyekuga, wata Tamaku 'wa bavuyeni. 'Ai'edi 'wa da 'asetakuga, Tamaku wata 'wa da 'asetai.”

^w 8:11 Ion 5:14 ^x 8:12 Ion 1:4-9, 12:46 ^y 8:15 Ion 7:24; 8:16 Ion 5:30 ^z 8:18 1 Ion 5:9
^a 8:19 Ion 14:7

²⁰ ^bIesu yana ve de'e 'aila'a bwaikina matadie, vanuga 'eba velu'ui nageneye, 'anivelenamaimaiga 'ana 'eba yato lilivaneye. Kebu tamu aitoi i da 'ive'avinini, i lubwaineni bei i na 'ive'aviniga 'ana tutuya bola.

Egavo kebu i na vetumagana yadi sakona i na

'eno-vagata.

²¹ ^c'Aila'anidi wata Iesu i vonedi i vo, A na tauya a na nago siwe 'wa na luala-wayogeku, 'wa na wafa yami sakona i na 'eno-vagata Yaubada kebu i na nuatavunidi. Bei a na nagoga kebu 'ami fata 'wa na waia 'waineye.”
²² Vonanina me Diu to'edakumetavo i nogaiga 'aise'avadi i vona i vo, Voke taunina i na luvewafai fai i vo, Bei a na nagoga kebu 'ami fata 'wa na waia.”

²³ Wata Iesu i vonedi i vo, 'Omi de'e bega 'wa souyemi, we'e yau tabwanega a mai. Yami 'eba mia fwayafwaya yau abamega a obuma.
²⁴ Faifainanina a vo, 'Wa na wafa yami sakona i na 'eno-vagata kebu Yaubada i na nuatavunidi.” Yau Yaubada 'ana Venua'ivina, 'ai'edi kebu 'wa na vetumagana 'waikuye, tutuyanina 'wa na wafa, yami sakona i na 'eno-vagata.”
²⁵ Begaidi i velutolien i vo, Nuanuama 'a na 'asetamu, 'omu aitoi?” Iesu yadi velutoli i tutuli i vo, Tutuya fuedi a lulu'ivoneyeku 'waimie, siwe 'asa'aiana bani'odi. ²⁶ 'Ai'edi nuanuaku, 'aku fata nani fuedi yami sakona faifaidi a da lu'ivoneyedi wata a da awavesakoyemi, siwe 'aku tovetune ava'ai i vonekuga 'aisedi a lulu'ivoneyedi tomia fwayafwaya matatabumi 'waimie. 'Aku tovetunenina yana nuanua wata yana sauluva tonovidi, 'ada fata ta na vetumagana yana vona 'waidie.”

²⁷ Siwe tomotoganidi kebu i da 'asetai, Iesu i vonavona Tamana faifaina, taunina 'ana tovetune. ²⁸ ^dBegaidi wata Iesu i vonedi i vo, De'e 'wa bavuyeku, siwe tutuyanina yau a vetomotogaotoga 'wa na silakaiku 'ai lagalagana 'waineye bei 'wa na 'asetaku yau Yaubada 'ana Venua'ivina. Wata bei 'wa na 'asetai kebu tamu sai'afu tauniku yaku nuanuayega a da folofolova, siwe ava'ai 'akonadi Tamada i vonekuga bani'odi a vonevoneyedi. ²⁹ ^eFai tutuya fuedi 'aku tovetunenina yana nuanua a 'i'idewadi i sososoana faifaiku, begaidi kebu tamu tutuya i da bailekuga i labilabiniku.” ³⁰ Tomotoga fuedi Iesu yana vona i nogai i vetumagana 'waineye.

Iesu yana vona i na 'etoyavuda.

³¹ Me Diu fuedi i vetumagana Iesu 'waineye begaidi i vonedi i vo, 'Ai'edi yaku ve 'wa na vevematayakeyakedi, 'omi yaku tovetutuyamavo mogitana.
³² Sakona i veveimeyemi 'wa da vo bani'odi 'omi yana tofolovavo, siwe

yaku ve tonovidi 'wa nogaidiga 'wa na vevematayakeyakedi, 'wa na 'asetai yaku ve, vona mogitana, vonanidi i na 'etoyavumi.”³³ Me Diu to'edakumetavo i vona Iesu 'waineye i vo, 'Ima Ebelamo tubunavo, kebu tamu tutuya 'a da vetofolova-maimaiga tamu tomogo 'waineye. Awale 'u vo, Yaku vona i na 'etoyavumi?”³⁴ Wata Iesu i vonedi i vo, A vona mogitana 'waimie, egavo i sakosakonaga, sakananina i veveimeyedi.³⁵ 'Ai'edi tamu tomogo yana tofolova-maimaiga i na kimwanei, tofologanina kebu ma yana veimea wata kebu i na mia-vagata tomogonina yana 'aila'a nageneye, mogitana tomogonina natuotogina ma yana veimea wata yana 'aila'a nageneye i na mia-vagata.³⁶ 'Omi sakona yana tofolova-maimaiga, siwe 'ai'edi yau, Yaubada Natuna a na 'etoyavumi 'omi mogitana yavuyavumi.³⁷ Mogitana a 'asetai 'omi Ebelamo tubunavo, siwe 'ifwaimi nuanuami 'wa na luvewafaku fai yaku ve 'wa vedumwe'ai'aiedi.³⁸ 'Naninidi a 'isedi Tamaku 'waineye a veveifufuyedi 'waimie, we'e 'omi ava'ai nuanuami 'wa na 'idewaiga 'waikuye fai tamamaki sakoina i vonemi.”

³⁹ Me Diu to'edakumetavo Iesu yana vona i tutuli i vo, 'Ima tamama Ebelamo.” Iesu i vo, 'Ai'edi 'omi natunavo mogitanaga, yana sauluva 'atumaidi 'wa da vevetutuyamede.⁴⁰ Siwe yami sauluva tulina, kebu Ebelamo bani'odi. Nuanuami 'wa na luvewafaku fai tutuya fueidi Yaubada yana vona mogitana, 'wainega a nogai, a lulu'ivona 'waimie.⁴¹ 'Omi kebu mogitana Ebelamo natunavo. Tamami yana sauluva sakoidi 'wa 'ewadi.” To'edakumetanidi i vo, 'Ima kebu 'eda natunavoga. Matatabuma tamama 'aitamogana, taunina Yaubada.”⁴² 'Iesu i vonedi i vo, 'Ai'edi mogitana Yaubada tamamiga, 'wa da nuakalikalieku fai yau Yaubada 'wainega a mai, taiadi ta miamiani. Kebu tauniku yaku nuanuayega a da mai, Yaubada i vetuneku.⁴³ Fai kebu nuanuami yaku vona 'wa na nogai, begaidi ava'ai a voneyediga 'wa bavuyedi.⁴⁴ 'Omi Seitani^k natunavo, nuanuami yana nuanuana sakoidi 'waidie 'wa na nunagoi. Tutuya 'eba velamu 'wainega i maiga 'asiau Seitaninina toluvewafa, kebu tamu sai'afo yana vona tonovidi, naninidi tonovidi matatabuna i vevedumwe'ai'aiedi. Tutuya fueidi vekaliga i vonavona fai 'asa'aiana bani'odi yana sauluva wata vekali matatabuna taunina lamudi.⁴⁵ A vona tonovina 'waimie kebu a da vekaliga, siwe fai Seitani yana sauluva-vekavekali 'wa 'ewadi begaidi kebu 'wa da vetumaganekuga.⁴⁶ 'Kebu tamu aitoi 'ana fata i na vona mogitana 'waikuye i na vo, 'Omu tosakona.” Tutuya fueidi a vonavona tonovina 'waimie, siwe kebu tamu sai'afo 'wa da vetumagana 'waikuye.⁴⁷ Egavo tamadi Yaubada, Yaubadanina yana vona i noganogai, siwe 'omi kebu Yaubada yana 'Aila'a nageneye, faifainanina kebu nuanuami yana vona 'wa na nogai.”

^f 8:34 Lom 6:16; 2 Fit 2:19 ^g 8:36 Gal 5:1 ^h 8:38 Ion 8:44 ⁱ 8:42 Ion 16:28
^j 8:44 1 Ion 3:8; Nag 3:4 ^k 8:44 Seitani yaiaina 'adi to'edakumeta. ^l 8:46 1 Fit 2:22

Iesu yana 'eba souyagi lamuna faifaina i veifufu.

⁴⁸ Me Diu to'edakumetanidi Iesu yana vona i tutuli i vo, Yama vona basenadi, 'akonadi 'ana mogitana i souyeni 'a vo, 'Omu yaiaina i agemu bega 'wava'wavamu wata 'omu bani'odi tomogo Samelia sakoina." ⁴⁹ Iesu i vonedi i vo, Yau kebu yaiaina i da agekuga. Tamaku a veve'ililibuyeni, we'e 'omi kebu 'wa da veve'ililibuyekuga. ⁵⁰ Kebu tauniku 'aku awa'ai'ai faifaina a da folofolova, a folofolovaga Yaubada i na awa'ai'aiku, we'e tomotoganidi i vedumwe'ai'aiekuga i na vematavulogidi. ⁵¹ A vona mogitana 'waimie, egavo yaku vona i na vevematayakeyakediga kebu i na wafaotoga, i na mia-vagata." ⁵² Me Diu i voneni i vo, 'U vevekali, vona mogitana yaiaina i agemu. Basenadiotoga Ebelamo i wafa, wata Yaubada yana tolu'ivonavo taiadi, we'e igodi 'omu 'u vo, 'Ai'edi egavo yaku vona i na vevematayakeyakediga kebu i na wafaotoga, i na mia-vagata." ⁵³ Tubuda Ebelamo 'omu kebu bani'odiga, taunina tomogo bwaikina siwe i wafa tolu'ivonavo taiadi. 'Omu 'wa da vo bwaikaotogimu begaidi bani'odi 'u vonevoneyedi." ⁵⁴ Iesu i vonedi i vo, 'Ai'edi tauniku a da awa'ai'aiku 'ana nogaya nani-'avo'avovo. Tamaku, kumanina igodi 'wa vo, Yama Yaubada," taunina 'aku toawa'ai'ai. ⁵⁵ Kebu tamu sai'afu Yaubadanina 'wa da 'asetatoni, yau a 'asetai. 'Ai'edi a da vo, Kebu a da 'asetai," a da vekali, bani'odi 'omi yami sauluva. Siwe a 'asetai, wata yana vona a vevematayakeyakedi. ⁵⁶ Basenadiotoga yaku mai 'ana tutuya tubumi Ebelamo i nuanimo nika i sosoana, siwe 'akonadi i 'iseni i sosoana bwaikina." ⁵⁷ Me Diu Iesu i voneni i vo, 'Omu bola kebu 'amu malamala 50 i da veluagai, voke 'u 'iseni Ebelamo? 'A nuani kebu tamu sai'afu 'u da 'isatonovi." ⁵⁸ Iesu i vo, A vona mogitana 'waimie, Bola Ebelamo kebu i da tubugaga, yau a mia-vagata." ⁵⁹ Me Diu yana vona i nogai, i nuasako, kileu i 'ewadi igodi nuanuadi i da luvewafai, siwe Iesu i giva tomotoga nagedie mulieta vanuga 'eba velu'ui 'wainega i souyeni i nago.

Tomatasako inana kamodiega Iesu i 'ive'atumaia.

9 ¹ Tamu tutuya Iesu wata yana tovetutuyamavo taiadi i nunagoi, tamu tomogo ma mata-sakoina inana kamodiega i mieniga i 'iseni. ² Begaidi Iesu yana tovetutuyamavo i velutolieni i vo, Tove, aitoi yana sakona 'wainega ma mata-sakoina i tubuga? Taunina 'alo inana tamana taiadi?" ³ Iesu i vonedi i vo, Yana matasako kebu yana sakona 'wainega, 'alo inana tamana taiadi yadi sakona 'waidiega. I matasakoga bega Yaubada yana toketokena 'wainega i na ve'atumaia tomotoga i na 'iseni.

^m 8:48 Ion 7:20 ⁿ 8:51 Ion 5:24 ^o 8:55 Ion 7:28-29 ^p 8:58 Ion 1:1 ^q 8:59 Ion 10:31
^r 9:2 Sou 20:5 ^s 9:3 Ion 11:4

4 I lubwaineda tutuya safailina 'waineye 'aku tovetune yana folova ta na 'i'idewadi, we'e tutuya vitana i na souyeniga, bani'odi dudubala, kebu tamu aitoi 'ana fata i na folova. 5 "Tutuyanina a na miamia fwayefwayeye, yau tomia fwayafwaya yami mageta." 6 Iesu i vona'a'ava, i kiwala fwayefwayeye, fwayafwayanina i 'ewai nimaneye i luogoi mulieta tomatasako matana i 'abidi. 7 I voneni i vo, Nuanuaku 'u na nago Ufa Sailoama 'waineye maigimu 'u na lekoai." Ufanina Sailoama 'ana saivila, Vetune. Bega tomogonina i nago maigina i lekoai, nika i 'isadewa, i vilai i mai.

8 Tomogonina matana i ve'atumaiga, enavo wata 'ifwaidi tomotoga i 'asetai tomogonina taunina totalavelu'ui, 'aise'avadi i velutolitolu i vo, 'Wa da nuani, voke kumanina totalavelu'uinina?" 9 Tomotoga 'ifwaidi i vo, 'Asa'aiana kumanina," we'e 'ifwaidi i vo, Kebu, no'o tulina siwe 'ana 'isa'isa." Tomogonina matana i ve'atumaiga i vo, 'Asa'aiana kumaniku yau." 10 Tomotoga i velutolieni i vo, Bani'odi matamu i munega i ve'atumai?" 11 I vonedi i vo, Tamu tomogo 'ana wagava Iesu dobwadobwana i 'idewai matak i 'abidi i 'a'avana i voneku i vo, Nuanuaku 'u na nago Ufa Sailoama 'waineye, bei maigimu 'u na lekoai." Bega a nago maigiku a lekolekoai nika a 'isadewa." 12 Wata i velutolieni i vo, Tomogonina matamu i 'ive'atumaigida, ava'aibe?" I vo, Aigodi."

Falisi i velutolitolu tomatasako yana ve'atumai faifaina.

13 Bega tomotoga iadinina matana i ve'atumaiga i vagavaia i naweni totafalolo Falisi 'waidie. 14 We'e 'aiatanina 'waineye Iesu dobwadobwana i 'idewai tomogo i 'ive'atumaigida me Diu yadi 'Aiata Veawai 'waineye. 15 Bega Falisinidi tomogo i velutolieni i vo, Bani'odi matamu i munega i ve'atumai?" I vonedi i vo, Iesu dobwadobwanayega matak i 'abidi, mulieta maigiku a lekoai nika a 'i'isadewa." 16 "Falisi 'ifwaidi i vo, Tomogo de'e bani'odi i folovediga 'ana 'isa kebu taunina Yaubada 'wainega, fai i folova 'Aiata Veawai 'waineye yada ve'etoboda i geuya." Siwe 'ifwaidi i vo, 'Ai'edi taunina tosakonaga kebu tamu sai'afo 'ana fata folova toketokedi i da 'i'idewadi." Nika 'aise'avadi 'aila'a i 'idia.

17 Wata Falisi i velutoli-vaitugana tomogo 'waineye i vo, 'U vonaga Iesu matamu i 'ive'atumaigi, we'e 'u da nuaniga yana toketokena ava'aiega i veluagai?" Yadi velutoli i tutuli i vo, Taunina tamu Yaubada yana tolu'ivona." 18-19 Me Diu to'edakumetavo kebu i da vetumagana fai i nuani igodina basenadi matana kebu i da sakoga, faifainanina inana wata tamana taiadi i vonedi i maia i velutoliedi i vo, De'e natumi? Mogitana ma mata-sakoina i tubuga? Bani'odi i munega 'ana fata i 'i'isadewa?" 20 Inana wata tamana i vo, Mogitana de'e 'ima natuma, wata 'a 'asetai

† 9:5 Ion 8:23 † 9:16 Ion 3:2, 9:31-33

ma mata'uluna i tubuga. ²¹ Siwe matana yadi ve'atumai wata aitoi i 'ive'atumaigida kebu ta da 'asetadiga. Taunina 'wa velutolieni, tulaina 'ana fata i na vonemi.” ²² 'Inana wata tamana bani'odi i voneyediga fai i kololo me Diu to'edakumetavo 'waidie. Basenadi yadi veimea i kiavefa'ali i vo, 'Ai'edi aitoi i na vo, Iesu taunina Yaubada 'ana Venua'ivina,” 'a na talabodeni kebu taiadi 'a na lukuluku 'eba miava'auta nageneye tafalolo faifaina.” ²³ Faifainanina inana wata tamana i vonaga i vo, Taunina 'wa na velutolieni, tulaina 'ana fata i na vonemi.”

²⁴ Wata me Diu i vona-vaitugana tomogonina matana i ve'atumaiga i mai i voneni i vo, Nuanuama 'u na vona Yaubada mataneye kebu 'u na vekaliga, fai 'a 'asetai tomogonina Iesu, tosakona.” ²⁵ Tomogo i vo, Aigodi tosakona 'alo kebu, siwe tamu nani a 'asetai, basenadi matakū sakoidi, siwe 'asiau a 'isa'isa.” ²⁶ Wata i velutolieni i vo, Bani'odi i munegimu? Wata bani'odi i munega matamu i siayegidi?” ²⁷ I voned i vo, 'Akonadi a lu'ivona 'waimie, siwe kebu nuanuami bonaku 'wa na nogai. Awale nuanuami a na vona-vaivaitugana? 'Alo nuanuami 'omi wata Iesu yana tovetutuyamavo?” ²⁸ Ma yadi nuasako i yagaia i vo, 'Omu 'aisemu kumanina 'ana tovetutuyama, 'ima Mosese yana tovetutuyamavo. ²⁹ 'A 'asetai Yaubada i vona Mosese 'waineye, we'e tomogonina kebu tamu sai'afo 'a da 'asetai ava'aiega i mai.” ³⁰ Tomogonina matana i ve'atumaiga i voned i vo, Nuaku i vogani yami bavu faifaina. Yana toketokena 'wainega matakū i ve'atumai siwe kebu 'wa da 'asetai ava'aiega i mai. ³¹ 'Fai ta 'asetai Yaubada tosakona bonadi kebu i na nogai, siwe egavo i veve'ililibuyeni wata i vevematayakeyakeni bonadi i noganogaidi. ³² Fwayafwaya 'ana 'idewadewavau 'wainega i maiga 'asiau, kebu tamu aitoi 'ana fata de'e bei tomatasako inana kamodiega i na 'ive'atumaia. ³³ 'Ai'edi Iesu kebu i da maiga Yaubada 'wainega wata 'ako kebu bani'odi i da folovediga.” ³⁴ Yana vona i tutuli i vo, 'Omu tosakona, inamu wata tamamu yadi sakona 'wainega 'u tubuga, igodi nuanuamu 'u na ve 'waimeye.” De'e bani'odi i voneyedi i 'a'ava, i 'ive'avini i tufelefeleni i souyeni 'eba miava'auta 'wainega.

Tomotoga yadi nuanua bani'odi i vematasako.

³⁵ Iesu vala i nogai Falisi tomogonina matana i ve'atumaiga i bifelefeleni 'eba miava'auta 'wainega bega i nago i veluagai i velutolieni i vo, Kumanina i vetomotogaotoga, 'waineye 'u vetumagana 'alo kebu?” ³⁶ Tomogo i vo, 'Auvea, ava'ai tomogoga? 'U voneku bega a na vetumagana 'waineye.” ³⁷ Iesu i voneni i vo, 'Akonadi 'u 'iseni, 'asa'aiana taunina taiadi 'wa veveifufu.” ³⁸ Tomogo i vona Iesu 'waineye i vo, 'Auvea, a vetumagana 'waimuye.” I vona nika ma yana subia i 'odu mataneye.

³⁹ Iesu i vo, Yau a maiga fwayefwayeye tomotoga a na 'ididi, bega egavo yadi nuanua dudubalidi 'wa da vo i da vematasako, 'anu'anunudi matadi a na 'ive'atumaidi, we'e egavo igodina 'anu'anunudi matadi 'atumaidi a na 'ive'uludi.” ⁴⁰ “Falisi ma fuedie i tovtovoi i nogai Iesu yana vona begaidi i velutolieni i vo, 'U vonavonaga 'ima wata matama 'uludi?” ⁴¹ Iesu i vonedi i vo, 'Ai'edi mogitana yami nuanua i vematasako, Yaubada kebu 'ana fata i na vematavulogimi yami sakona faifaidi fai bavubavumi. Siwe fai 'wa vonaga 'wa vo, Matama 'atumaidi nani matatabuna 'a 'asetadi,” begaidi yami sakananidi i na 'eno'eno.”

Iesu i vona-awatabai 'aisaya sifi 'adi kali faifaina.

10 ¹⁻² Wata Iesu i vonedi i vo, A vona mogitana 'waimie, to'isave'avina sifi 'aiaseye yana 'aisaya i veve'anidi 'adi mosomoso, lovana i sisilukurvedi 'adi kalie, bei wata i 'i'isave'avinidi. 'Ai'edi to'isave'avinanina nuanuana i na lukuga, 'awa 'waineamo i lukuluku, we'e 'ai'edi tamu aitoi kebu 'awa 'waineamo i na lukuga kali amo i na nakikila, taunina to'ainike wata tovainago. ³ Tutuyanina to'isave'avina nuanuana yana 'aisaya i na nawedi, 'awa 'ana to'isave'avina i vonevoneni saiboda i sisibaleni, mulieta to'isave'avinanina yana sifi 'aitamogana 'aitamogana 'adi wagaveamo i tayatayamidi. ⁴ ^b Tutuyanina i sousouyedi to'isave'avina i kumekumeta we'e yana 'aisaya mulineye i delideli fai bonana i nogaya'inanai. ⁵ 'Aisayanidi kebu 'adi fata tamu tomogo mulineye i na nagoi, bola bonana i na bavuyeni i na ve'aladegadega.”

⁶ De'e vona-awatabainina 'wainega Iesu i veifufu 'waidie, siwe kebu nuadi i da magetadi. ⁷ Tomotoga kebu nuadi i da magetadiga faifainanina Iesu i vona-vaitugana 'waidie i vo, A vona mogitana 'waimie, yau sifi 'adi kali 'ana 'awa. ⁸ Basenadi mali tomotoga nuanuadi i na veto'isave'avina igodina taunidi i da mai Yaubada 'wainega, tomotoganidi tovainago wata to'ainike, siwe yaku sifi kebu bonadi i da nogaya'inanadi. ⁹ ^c 'Asa'aiana kumaniku 'awa. Egavo i na vetumagana 'waikuye, i na luku 'waikuyamo a na 'ita'ita'iedi wata a na 'i'isave'avinidi bani'odi to'isave'avina sifi yana 'aisaya i nunawedi i veve'anidi wata i mimaiedi 'adi kalie. ¹⁰ Tovainago i na maiga, vainago'ava, 'ainike'ava, 'ivesako 'aisedi faifaidi i na mai. Yau a maiga tomotoga mia 'ivauna wata 'atumaina a na veledi bega i na sososoana wata kebu tamu nani faifaina i na vevenuafouviga.”

Iesu to'isave'avina sifi 'atumaina.

¹¹ ^d Wata Iesu i vonedi i vo, Yau to'isave'avina sifi 'atumaiku, faifainanina yawaiku a na tauyeni a na wafa yaku sifi 'adi 'ita'ita'i

^z 9:39 Ion 8:15-16 ^a 9:40 Mad 15:14 ^b 10:4 Ion 10:27 ^c 10:9 Ion 14:16

^d 10:11 Same 23:1; Ion 15:13

faifaina. ¹² 'Ai'edi tamu tomogo i na vetofolova sifi i na 'i'isave'avinidi, fai taunina kebu tonisifi 'ai'edi 'ou'ou kasikasisina i na 'iseni i na mimaiga bola i na degalovedi, 'ou'ounina kasikasisina sifi i na ovadi i na ve'aladegadega. ¹³ Tofolovanina i dega fai taunina kebu tonisifi, begaidi kebu faifaiddi da vetafewa i folovamo tutula faifaina. ¹⁴⁻¹⁵ ^eYau to'isave'avina sifi 'atumaiku. Tamada i 'asetaku wata yau a 'asetai, wata bani'odi yaku sifi a 'asetadi, wata i 'asetaku. Fai taunidi yaku sifi, yawaiku a na tauyeni a na wafa 'adi 'ita'ita'i faifaina. ¹⁶ ^fWe'e wata 'ifwaidi yaku sifi tulidie i miamiani, kebu de'e kalinina nageneye. I lubwaineku taunidi wata a na miedi, 'adi fata wata bonaku i na nogai, a na luvetubamidi 'aila'a 'aitamogana we'e 'adi to'isave'avina 'aitamogana.

¹⁷ ^gTamaku i nuakalikalieku bwaikina fai tauniku a tauyeku 'awaie a na wafa siwe wafanina 'wainega wata yawaiku a na veluaga-vaitugani. ¹⁸ ^hKebu tamu aitoi 'ana fata yawaiku i na dabai, yau taunikuna a na tauyeni. Fai ma yaku veimea wata ma yaku toketokena 'aku fata yawaiku a na tauyeni, wata 'aku fata yawaikunina a na veluaga-vaitugani. Tamaku yana veimea 'waikuye side bani'odi."

¹⁹ Iesu i vona'a'ava, mulieta vonanina faifaina me Diu 'aila'a wata i 'idia. ²⁰ Fuedi i vona i vo, Vona mogitana yaiaina i agei i ve'wawa'wawa. Kebu bonana 'wa na nogai." ²¹ We'e 'ifwaidi i vo, Iesu yana vona 'ana nogaya kebu bani'odi tomogo yaiaina i ageiga yana vona. Yaiaina kebu 'ana fata tomatasako i na 'ive'atumaia Iesu i 'idewaiga bani'odi."

Me Diu Iesu i vedumwe'ai'aieni.

²² Malayaubanie me Diu fuedi i va'auta Ielusalema tamu sakali i 'idewai. Sakalinina 'adi 'eba tolinuata'i wata yadi 'eba nuave'avina basenadi mali tomotoga yadi vanuga 'eba velu'ui i 'ivesakoi we'e i 'idewa-vaitugani faifaina. ²³ Tutuyanina 'waineye Iesu i nago vanuga 'eba velu'ui 'waineye, i yabayaba Kini Solomoni yana Masi'eda 'waineye. ²⁴ Me Diu i 'iseni i maia i tovififineni i voneni i vo, Tutuya manamanawena 'a vevenuanaluga yamu vona faifaiddi. 'Asiauotoga nuanuama 'u na vona tonovina 'waimeye, mogitana 'omu Keliso Yaubada 'ana Venua'ivina 'alo kebu?" ²⁵⁻²⁶ ⁱIesu i vo, 'Akonadi a vonemi siwe kebu 'wa da vetumaganekuga. Folovanidi toketokedi a 'i'idewadiga Tamaku yana veimea 'wainega, 'wa da 'isedi 'wa da 'asetai yau a mai Yaubada 'wainega, siwe kebu 'wa da vetumagana fai 'omi kebu yaku sifi. ²⁷ ^jYaku sifi mogitana bonaku i noganogai, 'aitamogana 'aitamogana a 'asetadi wata i yoyogo'wailiku. ²⁸ ^kMia 'atumaina wata miamia-vagaina a veveleledi bega kebu i na wafaotoga wata kebu tamu aitoi 'ana fata i

^e 10:14-15 Ion 10:27; 10:15 1 Ion 3:16 ^f 10:16 Ion 11:52 ^g 10:17 Fil 2:8-9

^h 10:18 Ion 19:11 ⁱ 10:25 Ion 5:36, 10:38 ^j 10:27 Ion 10:3 ^k 10:28 Ion 3:16, 6:39

na sieloeloku. ²⁹Tomotoganidi Tamaku i velekuḡa nani bwaikaotogina mataneyey, nani 'ifwaidi sai'afo, faifainanina kebu tamu aitoi 'ana fata i na vunugidi Tamada yana 'isave'avina 'wainega. ³⁰Tamada wata yau 'aitamogana. Yama nuanua, yama sauluva, wata lamuma 'aitamogana.”

³¹Vonanina faifaina me Diu kileu i 'ewadi igodi i da luwewafai basenadi bani'odi. ³²Siwe Iesu i vonedi i vo, Folova fueḡi, 'atumaidi wata toketokedi matamie a 'i'idewadi Tamada yana veimea 'wainega. Folovanidi 'waidiega ava'ai folovaga faifaina nuanuami 'wa na nikeku?” ³³Me Diu Iesu yana vona i tutuli i vo, Yamu folova 'atumaidi faifaidi 'ako kebu 'a na nikemuga, siwe fai 'u vona-uv'i'agala Yaubada 'waineyey. 'Omu tomogo-'avo'avovo siwe igodi 'u vo, Yau Yaubada.” ³⁴'Wata Iesu i vonedi i vo, Basenadiotoga i kilumi Yaubada yana Buki 'waineyey, bukinina 'wa veve'ililibuyeni bwaikina, Yaubada i vona toveimea i venua'ivinediga 'waidie i vo, 'Omi tomotoga 'asa'aiana taunimi yaubadanimi.” ³⁵'Akonadi ta 'asetai Yaubada yana Buki i na 'eno-vagata wata kebu tamu sai'afo vekali nageneyey, we'e toveimeanidi Yaubada yana Vona i nogai, Yaubada i goledi yaubadavo. ³⁶”Fai Yaubada tomotoga i fali-yaubadedi, yau wata a vo, Yau Yaubada Natuna,” i lubwaineku fai i venua'ivineku i vetuneku a mai tomia fwayafwaya 'waimie, begaidi kebu Yaubada a da awaobuobuyeni. ³⁷'Ai'edi Tamaku yana folova kebu a da 'i'idewadiga, i lubwainemi kebu 'wa da vetumagana 'waikuyey, siwe fai Tamaku yana folova a 'i'idewadi i lubwainemi 'wa na vetumagana 'waikuyey. ³⁸”Kebu nuanuami 'wa na vetumagana 'waikuyey, siwe fai folovanidi toketokedi a 'i'idewadiga i lubwainemi 'wa na vetumaganedi bega 'wa na 'aseta-'atumaia yau Tamada 'ana labilabina wata Tamadanina i labilabiniku.”

³⁹Fai Iesu i vo, Yau Tamada 'ana labilabina wata Tamadanina i labilabiniku,” begaidi to'edakumetavo wata igodi i da 'ive'avini, nika i 'iawedi i nago.

⁴⁰Iesu wata yana tovetutuyamavo taiadi wata i viladi Ufa Iolidani i damana no'o bega i miamiani, basenadi bei Ioni tomotoga i bafitaisodi. ⁴¹Tomotoga fueḡi i maia Iesu 'waineyey tomotoganidi 'aise'avadi i veifufu i vo, Ioni kebu tamu folova toketokena i da 'idewai, siwe nani matatabuna basenadi i veifufuyedigaga Iesu faifaina, 'akonadi 'adi mogitana i souyedi.” ⁴²Begaidi tomotoga fueḡi i vetumagana Iesu taunina Yaubada 'ana Venua'ivina.

Lasalo yana wafa ifufuna.

11 ¹⁻³°Tamu 'atamana 'ana wagava Bedani bei Lasalo i miamia ma novunavo, Meli wata Malida. Melinina kumanina 'Auvea Iesu

¹ 10:34 Same 82:6 ^m 10:36 Ion 5:17-20 ⁿ 10:38 Ion 14:10-11 ^o 11:1 Luk 10:38-39; 11:2 Ion 12:3; 11:3 Ion 11:36

'agena i iwagi bunama magaina 'atumaina 'wainega, wata nava'aunega i tamavelavelalai. Tamu tutuya Lasalo i viga bwaikina begaidi novunavo vala i vetunei Iesu 'waineye i vo, 'Auvea, iamu kumanina 'u nuakalikalieni bwaikina i viga." 4^pTutuyanina Iesu valana i nogai i vona i vo, Viganina i souyeniga Lasalo 'waineye kebu wafaotoga faifaina, siwe i souyeni bega tomotoga fuei Yaubada i na subiai wata 'wainega, yau Natuna i na awa'ai'aiku."

5-6 Lasalo ma novunavo Iesu i nuakalikaliedi bwaikina, siwe tutuyanina i nogai Lasalo i viga kebu i da nago 'waineye, 'atamananina 'waineye i valenogaya bei wata 'aiata 'ailuga i mia. 7^lAiatanidi 'adi 'ailuga i 'a'avana, mulieta yana tovetutuyamavo i vonedi i vo, Ta na vilada ta na nagoi Iudia." 8^qYana tovetutuyamavo i vo, Tove, basenadi bei me Diu igodi i da luvewafamu, wata igodi nuanuamu bei 'u na nago." 9 Iesu i vonedi i vo, 'Akonadi 'wa 'asetai 'aiata 'ana 'awasasa matatabuna 12. 'Awasasanidi 'waidie ta na yabaga kebu 'ana fata ta na nikeyeda fai fwayafwaya 'ana mageta 'wainega ta 'i'isadewa. 10 Siwe 'ai'edi ta na yaba-vuvua lovane, bola ta na nikeyeda fai mageta kebu. Bola yaku tutuya 'atumaina i 'eno'eno, 'aku fata a na folofolova. 11 'Tada Lasalo i 'enomwadumwadu, siwe ta na nagoi a na luvagoni i na 'isa." 12 Yana tovetutuyamavo i vo, 'Auvea, 'ai'edi i na 'eno'enovamo 'ana fata i na ve'atumai." 13 Siwe Iesu i vonavona i wafaga faifaina, we'e yana tovetutuyamavo yadi nuanua i vo, 'Eno mogitana faifaina i vonavona." 14-15 Begaidi Iesu i vonaotoga 'waidie i vo, Lasalo i wafa, siwe 'ai'edi 'waineye taiadi ta da miamiani a da 'ive'atumaia viga 'aisena 'wainega bola yami vetumagana mweadi. 'Atumaina, ta na nagoi 'waineye yaku folova 'wa na 'iseni bega yami vetumagana i na vetoketoke." 16^sTomasi, tamu 'ana 'eba 'ainana Natulugaluga tovetutuyamavo 'ifwaidi i vonedi i vo, Ekwavo, ta na nagoi yada 'Auvea taiadi bega ma fueda ta na wafa."

Isu tosivetovoi wata yawai-vagata 'ana to'anivelena.

17 Tutuyanina Iesu yana tovetutuyamavo taiadi i le'wai sai'afo Bedani lilivaneye, tomotoga i vonedi i vo, Lasalo yawaina i 'a'ava, i 'eno'eno taumaseye 'akonadi 'aiata 4 i veluagai." 18-19 Ielusalemega ta na nago Bedani kebu 'ani'iega, vivideye^t begaidi me Diu fuei i maia Bedani Malida ma taina Meli nuadi i na 'iveagiagidi, novudi i 'iawediga faifaina.

20 Tutuyanina Malida i nogai Iesu i nunago, begaidi i mai i yogo'ede'edeni, we'e Meli i miamia vanuge. 21^uMalida i veluagai nika i vona Iesu 'waineye i vo, 'Auvea, 'ai'edi 'omu taiadi ta da miamiaga 'ako novuku kebu i da wafaga. 22 Mogitana novuku i wafa, siwe a 'asetai ava'ai

^p 11:4 Ion 9:3 ^q 11:8 Ion 10:31 ^r 11:11 Mad 9:24 ^s 11:16 Ion 20:25 ^t 11:18-19 'Ana mogitana bani'odi 3 kilomita. ^u 11:21 Ion 11:32

nuanuamu 'u na velu'ui Yaubada 'waineye i na velemu bega 'aivaita 'a na veluagai." 23 Iesu i voneni i vo, Novumu i na tovoi-vaitugana." 24 "Malida i vo, E'e 'akonadi a 'asetai 'awaie fwayafwaya 'ana 'eba ve'a'ava 'waineye i na tovoi-vaitugana." 25 Wata Iesu i voneni i vo, Yau kumaniku towafa 'adi tosivetovoi wata mia-vagata 'ana to'anivelena. 'Ai'edi egavo i na vetumagana 'waikuye mulieta i na wafa, siwe mia 'atumaina wata miamia-vagaina i na veluagai. 26 Egavo i na vetumagana 'waikuye kebu tamu sai'afo i na wafaotoga. Malida, yaku vona de'e 'u da nuani, 'u vetumagana 'alo kebu?" 27 "Malida i vo E'e 'Aueva yamu vonanina faifaina a vetumagana, wata a 'asetai 'omu Keliso, Yaubada Natuna wata 'ana Venua'ivina, kuanimu basenadi Yaubada i vona'awaufaufa yamu mai fwayefwayeye faifaina."

Iesu i lumatageu.

28 Malida i vona'a'ava, mulieta i vilai i nago Meli 'waineye 'aise'avadi i veifufu i vo, Tove 'akonadi i mai, nuanuana 'u na nago i na vonemu." 29 Bega Meli i tovoi i lilide i mai Iesu 'waineye.

30 Iesu bola kebu i da souyeni 'atamane, ava'aibe bei Malida i veluagaiga bei bola i tovtovoi. 31 Me Diu i maiaga Meli ma iana 'adi 'ivenuagiagi faifaina, tutuyanina i 'iseni Meli i tovoi i souyeni i lilide i mimai yadi nuanua igodi i vo, I nunago taumaseye bei i na vemogai," begaidi i yogo'waili.

32 Tutuyanina Meli i le'wa ma yana ve'ililibu i be'u Iesu mataneye i voneni i vo, 'Aueva, 'ai'edi 'omu taiadi ta da miamiaga, 'ako kebu novuku i da wafaga." 33 Iesu Meli i 'iseni me Diu taiadi i vevemogai nuana i vekalikalia wata i nuasako wafa faifaina. 34 Begaidi i velutoliedi i vo, Ava'aibe bei iada 'wa ve'ufai?" I voneni i vo, 'Aueva 'u mai ta na nago 'a na vemu." 35 "Nika Iesu i lumatageu. 36 Me Diu i 'iseni Iesu ma matageuna begaidi i vo, Vona mogitana, iana i nuakalikalienu bwaikina." 37 "We'e 'ifwaidi i vo, Tomatasako i 'ive'atumaia bega wata iana i da 'ivaiseni yana viga 'waineye nika kebu i da wafaga."

Iesu Lasalo wafayega i sivetovoia.

38 Wata Iesu nuana i vekalikalia sai'afo i vaganago taumata 'waineye. Taumatanina ovu matumatu 'waineye, kileu bwaikinega 'awana i vetovibodai. 39 Iesu tomotoga i vonedi i vo, Kileunina 'wa 'ewai." Nika Malida towafanina novuna i vo, 'Aueva, magari fai 'aiata 4 'akonadi i 'a'ava." 40 "Siwe wata Iesu i voneni i vo, 'Wa da vo kebu a da vonemu a vo, 'Ai'edi 'u na vetumagana 'waikuye, Yaubada yana toketokena 'u na

ν 11:24 Ion 6:40 w 11:27 Ion 6:68-69; 11:27 Ion 6:58-69 x 11:35 Luk 19:41
y 11:37 Ion 9:6-7 z 11:40 Ion 11:4

'iseni.” ⁴¹Tomotoga kileu i 'ewai, mulieta Iesu i 'isalaka i velu'ui Yaubada 'waineye i vo, Tamaku, a vekaiwa bwaikina 'waimuye fai bonaku 'u noganogaidi. ⁴²^aA 'asetai mogitana tutuya matatabuna bonaku 'u noganogaidi, siwe de'e bani'odi a vevelu'uiediga fai nuanuaku tomotoga i na nogai i na vetumagana 'omu 'u vetuneku a mai.” ⁴³Iesu i velu'ui'ava, mulieta i vegole i vo, Lasalo, 'u souyemu.” ⁴⁴Iesu yana voneye nika Lasalo i tovoi i souyeni taumatayega nimana wata 'agenai taiadi fanifanidi, wata 'unu'ununa babaniumana. Iesu tomotoga i vonedi i vo, 'Wa na 'iyavuyavuya nika 'ana fata i na yaba.”

Me Diu nuanuadi Iesu i na luvewafai.

⁴⁵^bMe Diu fue di i maiga Meli 'waineye, Iesu yana folova toketokena i 'iseni i vetumagana 'waineye. ⁴⁶We'e 'ifwaidi i viladi i nagoi totafalolo Falisi 'waidie i lu'ivona ava'ai Iesu i 'idewaiga faifaina. ⁴⁷Begaidi Falisinidi, tovelomu 'adi to'edakumetavo, wata me Diu yadi Kaniselo taiadi i va'auta i veifufu Iesu faifaina i vo, Bani'odi ta na munegi? Tomogonina 'eba nuavogana wata 'eba nua'ewa fue di i 'idewadewadi. ⁴⁸'Ai'edi ta na 'ise'isenimoga, bola tomotoga matatabudi i na vetumagana 'waineye. Bega Loma gabemani tomotoga i na 'isedi i na vo, I baibailema i nunagoi Iesu 'waineye,” bega i na maia i na leoda, 'ida me Diu yada veimea i na geuya, yada vanuga 'eba velu'ui taiadi.” ⁴⁹Tamu me Diu yadi Kaniselo 'ana wagava Kaiafa, taunina tovelomu bwaikina malamalanina 'waineye, i vonedi i vo, 'Omi 'wava'wavami, we'e kebu 'wa da nuaniga. ⁵⁰I lubwainemi 'wa da 'asetai Iesu ta na luvewafai bega me Diu matatabuda ta na mia 'atumaina. 'Ai'edi kebu i na wafaga, me Loma i na leoda.”

⁵¹Vonanina Kaiafa i 'inanaiga, kebu taunina yana nuanuayega, siwe fai taunina tovelomu bwaikina malamalanina 'waineye begaidi Yaubada yana venuayato 'wainega i vona-vagata siwe kebu i da 'asetai. Yana vonanina 'ana nuanua mogitana 'awaie Iesu i na wafa me Diu matatabudi faifaidi. ⁵²^cKebu mogitana 'aise'avadi faifaidi siwe wata Yaubada natunavo faifaidi i vemiave'eve'e'elagi 'awalawa matatabuna 'waidie, Iesu yana wafa 'wainega i na va'augidi bega natunavo 'aila'a 'aitamogana. ⁵³Bega tutuyanina 'waineye me Diu to'edakumetavo i velamu 'aise'avadi i veveifufu-givagiva bani'odi i na munega Iesu i na luvewafai. ⁵⁴^dBegaidi Iesu kebu i da yogomagemageta 'awalawa Iudia nageneye, faifainanina givagivayega yana tovetutuyamavo taiadi i tauya i nagoi 'atamana Ifeleimi, sali'avu'avu lilivaneye, bei taiadi i miamiani.

⁵⁵^e'Sai'afoga me Diu i na sakali Uvi'agalatagona^f faifaina, begaidi tomotoga fue di 'awalawa tulina tulina 'waidiega i laka Ielusalema, nagami

^a 11:42 Ion 12:30 ^b 11:45 Ion 4:48 ^c 11:52 Ion 10:16, 17:21; 1 Ion 2:2 ^d 11:54 Ion 7:1
^e 11:55 Sou 12:14-20 ^f 11:55 Me Diu yadi 'eba tolinuata'i basenadiotoga Yaubada tubudiavo i 'ita'ita'iedi Itifita 'wainega, anelose me Diu i uvi'agalatagonidi we'e me Itifita i nikedu.

i na 'ilekoa-dewa wata i na tafalolo yadi sauluva bani'odi, nuanuadi i na ve'atumai Yaubada mataneyey, mulieta sakalinina i na 'idewai. ⁵⁶Tomotoganidi Iesu i lulualeniga, wata tutuyanina i va'auta vanuga 'eba velu'ui nageneyey 'aitamogana 'aitamogana i velutolitoli i vo, 'Wa da nuani, 'ako Iesu i na mai, 'alo kebu?" ⁵⁷We'e Diu totafalolo Falisi wata tovelomu 'adi to'edakumetavo taiadi veimea fa'alina i yatoi i vo, 'Ai'edi aitoy Iesu i na 'iseni ava'aibe bei i miamiaga i na lu'ivona 'waimeyey." Yadi veimeanina fa'alina i yatoiga fai nuanuadi Iesu i na 'ive'avini.

Iesu 'ana iwaga Bedani 'waineyey.

12 ¹Aiata 6 i na 'a'ava, me Diu sakalinina i na 'idewai Uvi'agalatagona faifaina begaidi Iesu yana tovetutuyamavo taiadi i nagoi Bedani, Lasalo yana 'atamane, tomogonina Iesu i sivetovoia wafayega. ²Bei 'ani'ani bwaikina i 'idewai Iesu 'ana ve'ililibu faifaina, bega Iesu wata Lasalo ediavo taiadi i miabui 'eba 'ani 'waineyey i na 'ani we'e Malida 'ani'ani i 'a'anivelena. ³Tutuyanina Iesu i 'ani'ani, Meli bunama magaina 'atumaiotogina wata 'ana tutula bwaikina ma botolina i mieni Iesu 'ageneyey i iwaga'a'aveni, mulieta nava'aunega i tamavelavelaladi. Bunamanina 'ana wagava Nadi, magaina vanuga matatabuna i susuli. ⁴⁻⁵^hTamu yana tovetutuyama 'ana wagava Iudasa Isakaliota, kumanina Iesu 'ana to'etogiluva i vo, Awale? Bunamanina tutulina bwaikina i ve'amubwadodoyeni. I lubwaineni ta da vekimwaneyeni, bani'odi lubulubu 300ⁱ ta da veluagai, bega egavo i vewekowekomaga ta da 'ivaisedi." ⁶De'e bani'odi Iudasa i vonaga, kebu mogitana wekowekoma i da nuanidi faifaiddi i da vonavona, fai taunina tovainago wata yadi mani 'ana to'isave'avina bega taunina 'ana 'aivaita faifaina i vona. ⁷^jWe'e Iesu i vo, 'Asa'aiana, vavine kebu 'u na 'ivebunumayagi. I iwagikuga i lubwaineni, tomogoku i 'idewa-vagaseni 'aku ve'ufa faifaina me Diu yada sauluva bani'odi. ⁸Tutuya fueidi 'omi wekowekoma taiadi 'wa miamiani, 'ami fata 'wa na 'i'ivaisedi, we'e yau kebu taiadi ta na mia-vagata."

⁹^kAila'a bwaikina me Diu vala i nogai Iesu i miamia Bedani, begaidi fueidi i maia nuanuadi i na 'iseni. Kebu Iesu 'aisenaga, wata nuanuadi Lasalo i na 'iseni, kumanina Iesu i sivetovoia wafayega. ¹⁰⁻¹¹Fai me Diu fueidi Lasalo i 'iseni ma yawaina i 'asetai wafayega i yawasa-vaitugana, begaidi me Diu to'edakumetavo yadi veimea i vedumwe'ai'aiedi Iesu 'waineyey i vetumagana. Faifainanina tovelomu 'adi to'edakumetavo 'aise'avadi i veifufu nuanuadi Lasalo wata Iesu taiadi i na luvewafadi.

^g 12:1 Ion 11:1,43 ^h 12:4-5 Ion 18:2-3 ⁱ 12:4-5 'Ana mogitana me Diu yadi mani Denali 300, malamala 'aitamogana 'ana folova tutulina. ^j 12:7 Ion 19:40 ^k 12:9 Ion 11:43-44

Iesu i luku Ielusalema.

¹²I 'atai, 'aila'a bwaikina i va'autaga Uvi'agalatagona 'ana sakali faifaina, vala i nogai Iesu i nunago Ielusalema. ¹³'Begaidi saisai lukudi i kinidabadi i miedi Iesu i na yogo'ede'edeni. Wata i vegolegole i vo, Kaiwa, kaiwa,^m

'Auvea 'ana wagavayega i mimai,

Wata ma yana nuakalikali i na vevesauluva 'atumaina 'waineye.

Taunina me Isileli yada Kini.”

¹⁴"Iesu tamu 'aisaya doniki i 'ewaiga kwavuneye i laka bega i nago. Nika bei Yaubada yana Buki 'ana mogitana i souyeni basenadiotoga i kilumi Iesu faifaina i vo,

¹⁵'Omi Ielusalema^o 'ana tomotogavo, kebu 'wa na kolologa,

'Akonadi yami Kini i viwai 'waimie,

Doniki tubuvauvauna 'wainega.”

¹⁶Tutuyanina 'waineye yana tovetutuyamavo kebu i da 'asetat'atumaiaga Yaubada yana Buki 'ana mogitana i sousouyeni, siwe tutuyanina Iesu i laka abame yana 'ai'aiwabu 'waineye, nika bei i nuani vonanina i kilumiga Iesu faifaina vona mogitana, wata tomotoganidi ma yadi sosoana i subiai wata i awave-Kini 'waineye.

¹⁷⁻¹⁸Tomotoganidi matadie Iesu i goleni Lasalo taumatayega i souyeniga ma yawaina, i nagoi Iesu yana folovanina toketokena i lu'ivoneyeni bega mali tomotoga taiadi i maia Iesu i yogo'ede'edeni. ¹⁹We'e Falisi i 'isedi 'aila'a bwaikina i nunagoi Iesu 'waineye begaidi 'aise'avadi i veifufu i vo, 'Wa 'iseni, 'ida ta 'i'ivemwemweadaga. Tomotoga matatabudi 'akonadi i nunagoi Iesu 'waineye.”

Me Guliki 'ifwaidi nuanuadi i na veifufu Iesu 'waineye.

²⁰'Aila'anidi i nagoiga Ielusalema Yaubada i na subiai wata i na sakali, 'ifwaidi tomotoga me Guliki. ²¹Tomotoganidi me Guliki i maia Filifi 'waineye, taunina tomogo Bedasaida 'awalawa Galili nageneye, i voneni i vo, 'Auvea, nuanuama Iesu taiadi 'a na veifufu.” ²²Bega Filifi i nago Anidulu i voneni, mulieta 'adi 'ailuga i nagoi i lu'ivona Iesu 'waineye. ²³Iesu yadi vona i nogai i vonedi i vo, 'Akonadi yaku tutuya i vevelilivana, Yaubada i na silakaiku bega tomotoga i na 'iseku yau a vetomotogaotoga i na ve'ililibuyeku wata i na subiaiku. ²⁴A vona mogitana 'waimie, 'ai'edi waifei bubuwakeye i na 'eno'eno kebu 'ana fata i na vefue. We'e ta na koyoviga tubutubuna i na 'anikudai, i na tabo,

^l 12:13 Same 118:25-26 ^m 12:13 'Ana mogitana Osana, me Diu bonadiega.

ⁿ 12:14-15 Sek 9:9 ^o 12:15 'Ana mogitana Saioni. Ielusalema tamu 'ana wagava.

^p 12:23 Ion 17:1

'wainega 'ani'ani fuedi i na souyedi. Yau wata bani'odi a na wafa bega yaku 'aila'a i na vefue. ²⁵ ^qWata side bani'odi. 'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku, mia 'atumaina wata miamia-vagaina i na velugai. ²⁶ ^rAitoi nuanuana i na vetofolova 'waikuye i lubwaineni i na vetutuyameku, bega ava'aibe bei a na nunago yaku tofolovanidi taiadi. 'Awaie yaku tofolovava matatabudi Tamaku i na silakaidi tomotoga matadie i na subiadi.”

Iesu i veifufu yana wafa faifaina.

²⁷ ^sWata Iesu i vo, Tutuya de'e nuafouku i veveviga bwaikina, bega 'wa da nuani bani'odi a na voneyedi? Voke a na velu'ui a na vo, Tamaku, nuanuaku vita wata wafa 'waidiega 'u na 'ita'ita'ieku.” Siwe kebu i da lubwainekuga 'ai'edi bani'odi a na velu'ui, fai vitanina faifaina a mai. ²⁸ ^A nuani side bani'odi a na velu'ui a na vo, Tamaku, nuanuaku yamu toketokena tomotoga 'u na vedi bega i na subisubiamu.” Iesu i vona'a'ava nika tamu bona i souyeni abamega i vo, 'Akonadi yaku toketokena a vedi wata 'awaie a na vedi.”

²⁹ ^Aila'a i tovoovoi lilivadie bonananina i nogai 'ifwaidi i vo, Tomuyoana i duduya,” we'e 'ifwaidi i vo, Tamu anelose i vona Iesu 'waineye.” ³⁰ ^Nika Iesu i vo, Bonananina ta nogaiga, yau kebu 'aku 'aivaita faifaina, 'omi 'ami 'aivaita faifaina. ³¹ ^tutuya de'e Yaubada i na velamu tomia fwayafwaya i na veveimeyedi vematavuloga faifaina wata Seitani ma enavo i na leodi, taunina tomia fwayafwaya 'ami toveimea sakoina. ³² ^uWe'e yau tomotoga i na silakaiku 'ai lagalagana 'waineye bega tomotoga matatabumi a na vemwadami 'wa na maia 'waikuye.” ³³ ^Iesu yana vona de'e i vonavona yana wafa faifaina ava'ai 'wainega tomotoga i na luvewafai. ³⁴ ^vAila'a yana vonanina i nogai i vo, Yada veimea basenadiotoga i kilumi i vo, Keliso kebu i na wafaga i na mia-vagata.” We'e awale 'u vo, Yau a vetomotogaotoga tomotoga i na silakaiku 'ai lagalagana 'waineye?” Aitoi kumanina i vetomotogaotoga?” ³⁵ ^wBega Iesu i vonedi i vo, Tutuya 'ale'usana 'waineye taiadi ta na miamia a na vevemi, yau yami mageta. Yaku venina nuami i na magetadi bega 'ai'edi 'wa na vetumaganeku dudubala kebu i na mimai 'waimie. Egavo i vededumwe'ai'aieku taunidi bani'odi i yabayaba dudubala 'waineye, kebu i da 'asetai ava'aibe bei i nunagoi. ³⁶ ^xTutuyanina taiadi ta na miamia i lubwainemi 'wa na vetumagana 'waikuye, yau yami mageta, bega ma yami sosoana 'wa na miamia yaku 'aila'a nageneye.”

^q 12:25 Luk 9:24 ^r 12:26 Mad 28:20; Ion 14:3 ^s 12:27 Mad 26:38 ^t 12:31 Ion 16:11
^u 12:32 Ion 3:14-15 ^v 12:34 Dan 7:13-14 ^w 12:35 Ion 8:12 ^x 12:36 Efe 5:8

Me Diu Iesu kebu i da vetumaganeni.

Iesu i vona'a'ava, i tovoi 'aila'a i 'iawedi givayega i nago tulineye. ³⁷Avinodi Iesu 'eba nuavogana wata 'eba nua'ewa fueidi i 'i'idewadi tomotoga matadie, siwe kebu i da vetumagana 'waineye. ³⁸ʹNika ava'ai basenadiotoga Yaubada yana tolu'ivona 'ana wagava Aisea i kilumi 'ana mogitana i souyeni. Side bani'odi i kilumedi i vo, 'Auvea, valamu 'a lulu'ivoneyeni siwe kebu tamu aitoi i da ve'awamogitana.

Tomotoga 'Auvea yana toketokena i 'iseni, siwe kebu i da 'asetai wata i da vetumagana.”

³⁹⁻⁴⁰ʹFai tomotoganidi Yaubada yana vona i vevedumwe'ai'aiedi, begaidi kebu 'adi fata i na vetumagana. Bega wata Aisea i kilumi faifaidi i vo, Yaubada matadi i 'ive'uludi, Bega kebu 'adi fata i na 'isa. Nuadi i kiavevuyovuyodi, Bega kebu 'adi fata i na 'asetai. Begaidi kebu nuanuadi i na nuaviladi 'waikuye, a na 'ive'atumaidi.”

⁴¹ʹVona de'e Aisea i kilumiga fai basenadiotoga Yaubada i veni, Iesu ma yana 'ai'aiwabu magemagetadi, wata i veni tomotoga fueidi i na vedumwe'ai'aieni.

⁴²ʹWe'e tutuyanina 'waineye me Diu fueidi, yadi to'edakumetavo 'ifwaidi taiadi i vetumagana Iesu 'waineye, siwe kebu i da lu'ivona fai Falisi i kololoyedi yadi veimea fa'alina faifaina i vo, Egavo i na vetumagana Iesu 'waineye 'a na talabodedi kebu taiadi 'a na lukuluku 'eba miava'auta nageneye tafalolo faifaina.” ⁴³ʹFai nuanuadi tomotoga i na awave'atumaiedi, we'e kebu nuanuadi 'adi awave'atumai Yaubada 'wainega, begaidi i ve'wadamo kebu i da lu'ivona.

Iesu yana vona tomotoga i na veimeyeda.

⁴⁴Iesu bonana bwaikinega i veifufu tomotoga 'waidie i vo, Egavo i na vetumagana 'waikuye, siwe 'asa'aiana 'akonadi i vetumagana Yaubada 'aku tovetune 'waineye. ⁴⁵ʹWata bani'odi, egavo i na 'iseku wata 'akonadi Yaubada 'aku tovetune i 'iseni. ⁴⁶ʹYau a maiga fwayefwayeye bega egavo i na vetumagana 'waikuye nuadi a na kiavemagetadi kebu yadi nuanua i na dududubalidi.

⁴⁷ʹWata a maiga tomia fwayafwaya a na 'ita'ita'iemii, kebu a da mai bega yaku veimea 'wainega vemataavuloga 'wa na veluagai. Begaidi egavo

ʸ 12:38 Ais 53:1 ʒ 12:40 Ais 6:10; Fol 28:26-27 ʹ 12:41 Ais 6:1 ʹ 12:42 Ion 9:22
 ʸ 12:43 Ion 5:44 ʹ 12:45 Ion 14:9 ʹ 12:46 Ion 1:9, 8:12

yaku vona i na nogaidi, siwe kebu i na vematayakeyakedi, yau kebu a na veimeyedi vematavuloga i na veluagai. ⁴⁸Siwe tutuyanina tomotoga 'wa na vonayavuga Yaubada mataneye, yaku vonanidi tovedumwe'ai'ainidi i na veimeyedi bega vematavuloga i na veluagai. 'Adi vematavuloga lamuna, yaku vonanidi kebu nuanuadi, wata i vedumwe'ai'aieku. ⁴⁹Kebu yaku nuanuayega a da veveifufu, fai Tamada 'aku tovetune ava'ai i vonekuga, wata bani'odi a vonavona. ⁵⁰^hA 'asetai 'ami fata mia 'atumaina wata miamia-vagaina 'wa na veluagai Yaubada yana Vona 'waidiega, faifainanina ava'ai a vonevoneyediga, fai 'akonadi Tamada i voneku."

Iesu yana tovetutuyamavo 'agedi i lekoadi.

13 ¹'Awa'awai bani'odi Uvi'agalatagona sakalina i na 'idewai, Iesu 'akonadi i 'asetai yana tutuya, fwayafwaya i na 'iaweni i na vilai i na nago Tamana 'waineye. Iesu yana 'aila'a fwayefwayeye i nuakalikaliedi bwaikina, 'eba velamu 'wainega i nagoga wata yana wafa 'waineye. ²JLovananina 'waineye, Iesu wata yana tovetutuyamavo taiadi i 'ani'ani we'e Seitani^k 'akonadi tamu nuanua i yatoi Iudasa 'waineye Iesu i na 'etogiluvuni. Iudasanina, Saimoni Isakaliota natuna. ³Iesu i 'asetai taunina i mai Yaubada 'wainega, wata i na vilai i na nago 'waineye, wata i 'asetai Yaubada nani matatabuna i 'anivelenedi 'waineye i na veimeyedi. ⁴Fai naninidi Iesu i 'asetadi, begaidi 'eba 'ani 'wainega i tovoi 'ana talauma tabwaneye i ta'ia, mulieta tamatama i 'ewai tolobwaneye i yogoneni, 'wa da vo bani'odi tofolova-maimaiga. ⁵Iesu 'aivoe i 'ewai, bei ufa i iwagi bega yana tovetutuyamavo 'aitamogana 'aitamogana 'agedi i lekoadi, mulieta i tamavelavelaladi. ⁶Tutuyanina i le'wa Saimoni Fita 'waineye i talaboda i vo, 'Auvea, yau kebu nuanuaku 'ageku 'u na lekoadi, 'ana 'isa kebu 'atumainaga." ⁷Iesu i voneni i vo, Yaku folova a 'i'idewaiga 'ana nuanua 'u bavuyeni, we'e 'awaie 'u na 'asetai." ⁸Fita i ve'awafatafata i vo, Kebu tamu tutuya 'ageku 'u na lekoadi." Iesu i vo, 'Ai'edi kebu a na lekoamuga, 'omu kebu wata 'aku 'auga." ⁹Wata Saimoni Fita i vo, Vetuma kebu 'age'avaku 'u na lekoadiga, nuanuaku 'unu'unuku wata nimaku taiadi 'u na lekoadi." ¹⁰Iesu i voneni i vo, Egavo i toaga, tomogodi matatabuna vunavunagidi, 'age'avadi i veyokega i na lekoadi. 'Omi matatabumi vunavunagimi, we'e 'aitamogana 'waimiega kebu." ¹¹Fai Iesu 'akonadi i 'asetai 'ana to'etogiluva, taunina tosakona, begaidi i vo, 'Omi matatabumi vunavunagimi, we'e 'aitamogana 'waimiega kebu."

¹²Iesu 'agedi i lekoa'avadi, wata 'ana talauma i silakaveni i vilai i nago 'ana 'ivie i miabui. I velutoliedi i vo, 'Asiautoga de'e yaku folova

^f 12:47 Ion 3:17 ^g 12:48 Ibu 4:12 ^h 12:50 Ion 8:28 ⁱ 13:1 Ion 15:13 ^j 13:2 Ion 13:27
^k 13:2 Seitani yaiaina 'adi to'edakumeta. ^l 13:3 Ion 16:28

a 'idewaiga 'waimie, 'ana nuanua 'wa 'asetai, 'alo kebu? ¹³Tutuya fueidi 'wa goleku 'wa vo, 'Auvea,” wata 'wa vo, Tove,” we'e 'wa vonaga vona mogitana fai yau yami 'Auvea wata yami Tove. ¹⁴Yau yami 'Auvea wata yami Tove, siwe 'asiauotoga 'agemi a lekoadi, 'omi wata bani'odi i lubwainemi ma yami nuaobu 'wa na vetofolova 'aitamogana 'aitamogana. ¹⁵Yau 'eba 'isa a 'idewai 'waimie, bega bani'odi 'wa na vetutuyameku. ¹⁶A vona mogitana 'waimie, tofolova kebu 'ana toveimea i da vebwaika-'iaweni, 'alo tomata'aulele 'ana tovetune i da vebwaika-'iaweni. Kebu i da lubwaineni tofolova i na vona 'ana toveimea 'wayneye i na vo, Folovanina nuanuamu a na 'idewai, we'e nani-'avo'avovo a baila.” ¹⁷Naninidi a voneyediga, 'akonadi 'wa 'asetadi. 'Ai'edi ma yami nuaobu 'wa na vetofolova, 'wa na sososoana.

Iesu i vona-vagata tamu tomogo i na 'etogiluvani faifaina.

¹⁸Kebu a da vonavona 'omi matatabumi faifaimi, fai a venua'ivinemi begaidi 'aitamogana 'aitamogana yami nuanua a 'asetadi. Siwe Yaubada yana Buki i vona tonovina 'ana mogitana 'akonadi i na souyeni i vo,

Tamu tomogo taiadi 'ama'ama 'aitamogana siwe i sivilai i vegavieku.”

¹⁹PA vovona-vagasemi tamu tomogo i na 'etogiluveku, bega tutuyanina i na souyeni 'wa na vetumagana yau Yaubada 'ana Venua'ivina. ²⁰A vona mogitana 'waimie, egavo ma yadi nuakalikali yaku tofolovavo i na 'ivaisedi, siwe 'asa'aiana yau i 'ivaiseku. Wata bani'odi egavo ma yadi nuakalikali i na 'ivaiseku siwe 'asa'aiana Yaubada 'aku tovetune i 'ivaiseni.”

²¹Iesu i veifufu'a'ava nika i nuavita bwaikina, yana tovetutuyamavo i vonedi i vo, A vona mogitana 'waimie, tamu iami i na 'etogiluveku a na wafa.” ²²Matatabudi i ve'isa'isa yadi nuanua i ve'ale'usa aitoi faifaina i vonavona. ²³⁻²⁴¶Iadi tamu kumanina Iesu i nuakalikali bwaikina, lilivaotogineye i miabui begaidi Saimoni Fita i lu'wai i voneni i vo, 'U velutolieni Iesu, aitoi mogitana faifaina i vonavona.” ²⁵Bega i sivilai Iesu i ve'awayayai i vo, 'Auvea, aitoi kumanaga?” ²⁶Iesu i voneni i vo, Tomogonina a na ve'ililibuyeni, 'ani'ani a na 'ewai a na lu'utuvi a na veleveleni taunina tomogonina 'aku to'etogiluva.” Bega Iesu 'ani'ani tamu i 'ewai, i lu'utuvi Iudasa, Saimoni Isakaliota natuna, i veleni. ²⁷Iudasa i 'anielo i 'ania, mulieta Seitani i agei. Iesu i voneni i vo, 'Ai'edi ava'ai nuanuamu 'u na 'idewaiga, 'u souye-matayo'oyemu 'u nago.” ²⁸Iesu i vonavona Iudasa 'wayneye we'e yana tovetutuyamavo 'ifwaidi kebu i da 'asetai'ava'ai i vonevoneyeni. ²⁹¶Fai Iudasa yadi mani 'ana to'isave'avina, 'ifwaidi yadi nuanua i vo, Voke i vetunei i na nago 'ada'ada

ᵐ 13:14 Luk 22:27 ᵑ 13:15 Fil 2:5; 1 Fit 2:21 ° 13:17 Iem 1:25 ᵑ 13:19 Ion 14:29
 ¶ 13:23 Ion 21:7,20

i na kimwane sakali faifaina,” we'e 'ifwaidi yadi nuanua i vo, Voke i vetunei, mani i na naweni egavo i vewekowekomaga i na 'ivaisedi.”
³⁰Iudasa 'ani'aninina i 'ani'a'avai, i souye-matayo'oyeni i nago, siwe 'akonadi i lovani dudubala.

Iesu veimea 'ivauna i yatoi.

³¹Iudasa i tauya i nunago Iesu i vonedi i vo, Tutuya de'e yau a vetomotogaotoga yaku toketokena i na sivemageseni, bega tomotoga Yaubada i na subiai ava'ai i na souyeniga 'waikuye faifaina. ³²'Fai tomotoga Yaubada i na subiai ava'ai i na souyeniga 'waikuye faifaina, begaidi yau Natuna i na silakaiku wata yana 'ai'aiwabu magemagetadi i na veleku bega tomotoga i na subiaiku. Sai'afoga Yaubada i na 'idewamatayo'oi 'waikuye. ³³'Ekwavo a nuakalikiemi bwaikina, yau sai'afoga a na 'iawemi 'wa na lualeku. Siwe a na vonemi, basenadi bani'odi me Diu yada to'edakumetavo a vonedi a vo, A nunagoga bei kebu 'ami fata 'wa na waiga.” ³⁴“Veimea 'ivauna a na velemi, side bani'odi. Ma emiavo 'wa na venuakaliki. Fai yau a nuakalikiemi bwaikina, 'omi wata bani'odi ma emiavo 'wa na venuakaliki. ³⁵“Ai'edi ma emiavo 'aitamogana 'aitamogana 'wa na venuakalikaliga, mali tomotoga i na 'isemi i na 'asetai 'omi yaku tovetutuyamavo.”

Iesu i vona-vagata Fita i na ve'eweniga faifaina.

³⁶Fai Iesu i vonaga i vo, A na nago bei kebu 'ami fata 'wa na waia,” begaidi Fita i velutoli 'waineye i vo, 'Auvea, ava'aibe 'u na nago?” Iesu Fita yana velutoli i tutuli i vo, Bei a na nagoga kebu 'amu fata tutuya de'e 'u na yogo'wailiku, we'e bola mulikuye 'u na wai.” ³⁷Wata Fita i velutoli i vo, 'Auvea, awale kebu 'aku fata a na yogo'wailimuga tutuya de'e 'waineye? We'e yau a tauyeku a na wafa faifaimu.” ³⁸Iesu i voneni i vo, Mogitanaotoga 'u tauyemu wafa 'waineye faifaiku? A vona mogitana 'waimuye, 'ako lovane bola kamukamu kebu i na kwagega, nagami tutuya 'aitonu 'u na bavusebuku.”

Iesu yada 'eda Tamada 'waineye.

14 ¹Wata Iesu i vo, Kebu nuafoumi i na vevigaga, 'wa na vetumagana Yaubada 'waineye wata yau 'waikuye. ²⁻³^{x1}Awalawanina 'waineye Tamaku i miamiaga, vanuga fuedi i to votovoi. Yau a na nago yami 'eba mia a na 'i'idedawewadi. I na 'a'ava, a na vilaku a na mai a na vagavaimiga ta na nagoi bei yau a miamiaga 'waineye. 'Ai'edi 'eba mianidi kebu i da 'eno'enoviga, 'ako kebu a da vonemiga.

† 13:29 Ion 12:6; Same 41:9 § 13:32 Ion 17:5 † 13:33 Ion 7:33-34 † 13:34 Ion 15:12; Efe 5:2 † 13:35 1 Ion 3:14; Ion 17:23 † 14:1 Ion 14:27 † 14:3 Ion 17:24

⁴Bei a na nagoga 'akonadi 'wa 'asetai, wata 'ana 'eda 'wa 'asetai.”
⁵Tomasi i voneni i vo, 'Auvea, 'ima kebu 'a da 'asetai'ga ava'aibe 'u na nago, begaidi 'ana 'eda kebu tamu sai'afo 'a da 'asetai.” ⁶'Iesu i voneni i vo, Yau 'asa'aiana kumaniku 'eda. Yau nani matatabuna tonovidi lamuna, wata 'asetai mogitana 'ana tove. Yau wata 'waikuyega mia 'ivauna wata 'atumaina i sousouyeni. Kebu tamu wata 'eda i da 'eno'eno bega 'wa na nagoi Tamaku 'waineye, 'eda 'aitamogana, ma yami vetumagana taunimi 'wa na tauyemi 'waikuye. ⁷'Ai'edi mogitana 'wa da 'asetakuga, wata bani'odi Tamaku 'wa da 'asetai. Siwe 'asiau wata 'awaie 'akonadi 'wa 'asetai'atumaia wata 'wa 'iseni.”

Iesu Yaubada 'ana labilabina.

⁸Filifi i voneni i vo, 'Auvea, nuanuama Tamada 'u na vema, 'asa'aiana kumanina yama nuanua.” ⁹Wata Iesu yana tovetutuyamavo i vonedi i vo, 'Omi, yau taiadi tutuya manamanawena ta miamia, siwe Filifi 'wa da vo kebu 'u da 'asetaku. Egavo i 'iseku, 'asa'aiana 'akonadi wata Tamada i 'iseni. Awale 'u vo, Tamada 'u na vema?” ¹⁰“Filifi, 'u da vetumagana, yau Tamada 'ana labilabina, wata Tamadanina i labilabiniku. Yaku vona a veifufuyediga 'waimie kebu tauniku yaku nuanuayega, Tamada 'aku labilabina yana folova i 'i'idewadi 'waikuyega. ¹¹^bNuanuaku 'wa na vetumagana 'waikuye, yau Tamada 'ana labilabina wata Tamadanina i labilabiniku. 'Ai'edi vitana 'waimie, 'eba nuavogana wata 'eba nua'ewa a 'idewadiga 'wa na nuanidi nika 'ami fata 'wa na vetumagana 'waikuye. ¹²^cA vona mogitana 'waimie egavo i na vetumaganaga 'waikuye folovanidi bani'odi yau a 'i'idewadiga 'adi fata i na 'idewadi. Siwe wata folova toketokeotogidi wata bwaikaotogidi 'adi fata i na 'i'idewadi fai yau a na nago Tamada 'waineye. ¹³^dAva'ai naniga nuanuami, 'aku wagavayega Tamada 'waineye 'wa na vevelu'ui, mogitana a na 'i'idewadi. Fai yami nuanua a na 'i'idewadiga, mali tomotoga i na 'iseni Tamada i na subisubiai. ¹⁴Naninidi nuanuami, 'ai'edi 'aku wagavayega 'wa na vevelu'ui 'waikuye, mogitana a na 'i'idewadi.”

Iesu i vona'awaufaua 'Anu'anunu 'Atumaina i na vetunei.

¹⁵^eWata Iesu i vo, 'Ai'edi mogitana 'wa na nuakalikalieku yaku veimea 'wa na vevematayakeyakedi. ¹⁶^fTamada 'waineye a na velu'ui bega tamu 'ami To'aivaita i na velemini, taiadi 'wa na mia-vagata. ¹⁷^gTo'aivaitanina, taunina 'Anu'anunu 'Atumaina, Yaubada yana nuanua tonovidi i na veve 'waimie. Tomotoganidi fwayafwaya 'ana nuanua 'waidie i vebwaikaga, kebu 'adi fata taunidi i na tauyedi 'Anu'anunu 'Atumaina 'waineye fai

y **14:6** Efe 2:18; Ion 11:25 z **14:9** Kol 1:15 a **14:10** Ion 12:49 b **14:11** Ion 10:38
 c **14:12** Mak 16:19-20 d **14:13** Mad 7:7; Ion 16:23-24, 15:7 e **14:15** 1 Ion 5:3
 f **14:16** Ion 14:26, 15:26 g **14:17** Ion 16:13

kebu i da 'isa'inanai wata kebu i da 'asetai. We'e 'omi 'akonadi 'wa 'asetai fai taiadi 'wa miamiani wata 'awaie i na agemi.

¹⁸A na 'iawemi siwe kebu 'wa na vo, 'Ima fovafovama, kebu tamu 'ama to'aivaitaga," fai a na vilaku a na mai 'waimie. ¹⁹Sai'afoga tomotoganidi fwayafwaya 'ana nuanua 'waidie bwaikina kebu wata i na 'ise'isekuga, we'e 'omi 'wa na 'ise'iseku. Yau a mia-vagata, begaidi 'omi wata 'wa na miamia. ²⁰^hTutuyanina 'Anu'anunu 'Atumaina i na mai, 'wa na 'asetai yau Tamaku 'ana labilabina, wata 'wa na 'asetai yau a labilabinimi wata bani'odi 'omi 'wa labilabiniku.

²¹Egavo yaku veimea i 'asetadi wata i vevematayakeyakedi, taunidi 'aku tonuakalikali. Fai i nuakalikalieku, begaidi Tamaku i na nuakalikaliedi. Yau wata a na nuakalikaliedi bega tauniku faifaiku a na lulu'ivona 'waidie." ²²Tamu Iudasa, kebu Iudasa Isakaliota, i velutoli Iesu 'waineye i vo, 'Auvea, awale taunimu faifaimu 'u na lu'ivona 'waimeye, we'e tomotoganidi fwayafwaya 'ana nuanua bwaikina 'waidie, kebu 'u na lu'ivonaga?" ²³Iesu Iudasa yana vona i tutuli i vo, Egavo i nuakalikalieku mogitana, yaku vona i na vevematayakeyakedi. Tomotoganidi Tamaku i na nuakalikaliedi bega yau wata Tamaku taiadi 'a na mai 'a na lauvila 'waidie. ²⁴Egavo kebu i da nuakalikalieku, taunidi yaku vona kebu i na vematayakeyakedi. Vonanidi a veifufuyedi 'wa nogaidiga kebu tauniku yaku nuanuayega, Tamada 'aku tovetune 'wainega i maia.

²⁵Bola taiadi ta miamiagana, vonanidi a vonevoneyedi 'waimie. ²⁶^kSiwe tutuyanina Tamada 'Anu'anunu 'Atumaina 'aku wagavayega i na vetunei 'waimie, nani matatabuna i na vemi. Fai taunina 'ami To'aivaita, wata 'ami 'Eba Tolinuata'i bega naninidi a voneyediga matatabuna kebu nuami i na fani.

Iesu nuanua bikana mia 'atumaina taiadi i veleveleda.

²⁷^lA na 'iawemi siwe a na 'ivaisemi yami nuanua i na bikadi. Tutuya fueyi yaku nuanua bikana, nuanuananina bikana a vevelelemu yau tauniku 'waikuyega bega nuami kebu i na vita, kebu 'wa na kololo, wata kebu nuafoumi i na veviga. Mali tomotoga 'adi fata i na 'ivaisemi bega nuami sai'afu i na bikadi, siwe kebu tutuya manamanawenaga i na 'a'ava, we'e nuanua bikana mia 'atumaina taiadi a vevelemiga i na 'eno-vagata 'waimie. ²⁸^mAkonadi 'wa nogai a vonemi a vo, Yau sai'afoga a na 'iawemi, siwe wata a na vilaku a na mai 'waimie." 'Ai'edi mogitana 'wa da nuakalikalieku, 'ako kebu 'wa da nuavitaga yaku tauya faifaina, 'wa da sososoana fai yau a na nago Tamada 'waineye, taunina i vebwaika-'iaweku. ²⁹Bola taiadi ta miamiagana a

^h 14:20 Ion 17:21 ⁱ 14:21 Ion 15:10 ^j 14:23 Ve 3:20 ^k 14:26 Ion 15:26, 16:7

^l 14:27 Ion 16:33; Fil 4:7 ^m 14:28 Luk 24:31-32

vona-vagasemi yaku tauya faifaina, bega tutuyanina i na souyeni 'wa na 'iseni nika 'wa na vetumagana 'waikuye. ³⁰ "Kebu a na veveifufu manamanawena 'waimie fai sai'afoga Seitani i na le'wa. Seitandinina ma yana veimea fwayefwayeye nuanuana i na nikeku siwe yana toketokena 'waikuye nani-'avo'avovo wata kebu tamu sai'afu i na vevitaku sakona faifaina. ³¹ I lubwaineni tomia fwayafwaya i da 'aseta'atumaia Tamada a nuakalikalieni wata a tauyeku 'waineye bega ava'ai nuanuana i na vonekuga a na 'idewai." Iesu i vona'a'avana, yana tovetutuyamavo i vonedi i vo, 'Wa tovoi ta na nagoi."

Iesu taunina Welavi 'Atumaina.

15 ¹ Wata Iesu i vona yana tovetutuyamavo 'waidie i vo, Yau Welavi 'Atumaiku, Tamaku tobakula. ² 'Ai'edi didiku 'ifwaidi kebu i na vuavuaga-'atumai, Tamaku i na kuyailidi, we'e didiku 'ifwaidi 'akonadi ma vuagidi, ililidi 'ifwaidi i na kinikadikadidi bega i na ve'atumai i na vuagadewa. ³ 'Omi bani'odi didiku 'atumaidi, yaku vona 'wa vetumaganedi, vonanidi i 'ive'atumaيمي. ⁴ Yau taiadi ta na miave'itubama bega yau 'ami labilabina. 'Ai'edi didina ta na kuyai, kebu 'ana fata i na vuaga, we'e 'ai'edi welavinina 'waineye i na 'eno'enoga, 'ana fata i na vuaga. 'Omi wata bani'odi, 'ai'edi 'wa na bailekuga, kebu 'ami fata yaku nuanua 'wa na 'idewadi.

⁵ °Yau Welavi, 'omi didiku. Egavo 'waikuye i na mai taiadi 'a na miave'itubamaga, yau 'adi labilabina bega 'adi fata yadi folova faifaiku 'atumaidi wata yadi sauluva tonovidi 'wa da vo i da vuaga-'atumai. 'Ai'edi yau kebu taiadiga, 'aise'avami kebu 'ami fata tamu nani 'atumaina 'wa na 'idewai. ⁶ Egavo i baileku kebu taiadi 'a na miave'itubamaga, bani'odi didi sakoidi, tobakula i na kuyailidi wata i na valo'udi, mulieta i na bwavu i na tunudi i na 'alaidi. ⁷ °'Ai'edi yau taiadi ta na miave'itubamaga, wata yaku vona nuamie i na 'eno'enoviga, ava'ai nuanuami faifaidi 'wa na vevelu'ui 'ana fata 'wa na veluagadi. ⁸ °'Ai'edi yami folova faifaiku 'atumaidi wata yami sauluva tonovidi, 'omi yaku tovetutuyama mogitana bega tomotoga i na 'isemi Tamaku yana toketokena i na subiai.

Nuakalikali mogitana.

⁹ Tamaku i nuakalikaliekue bwaikina, yau wata bani'odi a nuakalikaliemi, nuanuaku 'wa na miamiani yaku nuakalikalinina nageneye. ¹⁰ °Tamaku yana nuakalikali nageneye a miamia fai yana veimea a vevematayakeyakedi, 'omi wata bani'odi, 'ai'edi yaku veimea 'wa na vevematayakeyakediga yaku nuakalikali nageneye 'wa na miamiani.

ⁿ 14:30 Ion 12:31 ° 15:5 Ion 15:16 P 15:7 Ion 14:13 ¶ 15:8 Mad 5:16
^r 15:10 1 Ion 2:5

11 ^sAkonadi a vona'a'avemi yaku veimea 'wa na veveumatayakeyakedi, bega yaku sosoanayega 'wa na sososoana, sosoananina sosoana mogitana. 12 ^tDe'e yaku veimea bwaikina a vevelemi, yau a nuakalikaliami bwaikina, nuanuaku 'omi wata bani'odi ma emiavo 'wa na venuakalikali mogitana. 13 ^uNuakalikali side bani'odi, 'ai'edi tamu tomogo yawaina i na tauyeni wafa 'waineye enavo 'adi 'ita'ita'i faifaina, taunina mogitana nuakalikali. 14 ^v'Ai'edi yaku veimea 'wa na veveumatayakeyakediga 'omi ekwavo mogitana. 15 ^wBasenadi a vo, 'Omi yaku tofolovavo," tutuya de'e a na vo, 'Omi ekwavo." Tofolova yana 'auvea yana nuanua matatabuna kebu i da 'asetadi, we'e 'omi, nani matatabuna Tamaku i vonekuga a lu'ivoneyedi 'waimie, begaidi a vo, 'Omi ekwavo." 16 ^xWa na nuani, 'omi kebu 'wa da vo, Yada 'auvea ta na venua'ivineni," mogitana yau a venua'ivinemi wata a vetunemi 'wa na folova 'atumaina faifaiku, wata yami sauluva i na tonova, vuaganidi i na 'eno-vagata. 'Ai'edi ma vuagimi, ava'ai nuanuami 'aku wagavayega 'wa na velu'ui Tamada 'waineye i na velemi. 17 ^yAkonadi yaku veimeanina a vonemi a vo, Nuanuaku ma emiavo 'wa na venuakalikali.

Tomotoga Iesu yana tovetutuyamavo i na vedumwe'ai'aiedi.

18 ^z'Ai'edi Yaubada 'ana tobaila i na vedumwe'ai'aieimi, 'wa na nuani yau wata nagami i vedumwe'ai'aieku. 19 ^a'Ai'edi fwayafwaya 'ana nuanua 'waimie bwaikina tobailanidi bani'odi, 'ako i da nuakalikaliami wata i da veianemi. We'e 'omi tulimi fai tomia fwayafwaya 'waidiega a venua'ivinemi, bega 'omi kebu ediavo wata i vevedumwe'ai'aieimi. 20 ^bSiwe yaku vona 'wa na nuani a vo, Tofolova kebu 'ana toveimea i da vebwaika-'iaweni." Yau 'ami Toveimea siwe veviga a veveluagadi tomotoga 'waidiega, wata bani'odi 'omi yaku tofolovavo, mogitana vita 'wa na veluagadi 'aku tovedumwe'ai'ai 'waidiega. Yaku vona kebu i da vematayakeyakediga, wata bani'odi yami vona i na baila. 21 ^cVitanidi i na 'idewadiga 'waimie, fai 'omi yaku tomotoga, wata fai Yaubada 'aku tovetune kebu i da 'asetauga. 22 ^d'Ai'edi basenadi kebu a da maiga, wata 'ako kebu a da vonediga, Yaubada tosakonani kebu i da 'uvanidiga yadi sauluva sakoidi faifaiddi. 'Akonadi a mai yadi sakona a lu'ivoneyedi siwe kebu i da nuaviladi, begaidi kebu 'adi fata i na dega vematavuloga 'wainega. 23 ^eEgavo i vedumwe'ai'aieku, siwe 'asa'aiana wata Tamaku i vedumwe'ai'aieni. 24 ^fWata basenadi 'ai'edi kebu 'eba nuavogana wata 'eba nua'ewa a da 'idewadiga matadie, 'ako Yaubada kebu i da 'uvanidiga yadi sauluva sakoidi faifaiddi, siwe 'akonadi a mai folova toketokedi, kebu tamu

^s 15:11 Ion 17:13 ^t 15:12 Ion 13:34 ^u 15:13 1 Ion 3:16 ^v 15:16 Ion 15:5, 16:23

^w 15:18 1 Ion 3:13 ^x 15:19 Ion 17:14 ^y 15:20 Ion 13:16 ^z 15:21 Ion 16:2-3

^a 15:23 Luk 10:16

aitoi 'ana fata bani'odi i na 'idewadiga, a 'idewadi matadie, siwe Tamaku taiadi i vedumwe'ai'aiema. ²⁵ ^bI vedumwe'ai'aiema i lubwaineni, fai basenadiotoga i kilumi Yaubada yana Buki 'waineye faifaiku i vo, Yadi vedumwe'ai'ai 'waikuye kebu tamu lamunaga.”

Tutuya de'e 'akonadi vonanina 'ana mogitana i souyeni.

²⁶ ^c'Awaie 'Anu'anunu 'Atumaina a na vetunei 'waimie, Tamada 'wainega. Taunina 'ami To'aivaita, Tamada yana nuanua tonovidi i na veve 'waimie wata faifaiku i na lulu'ivona. ²⁷ ^dWata 'omi faifaiku 'wa na lulu'ivona tomotoga 'waidie, fai 'eba velamuyega i maiga 'asiau yau taiadi ta miamiani nani matatabuna a veve 'waimie.”

Vita 'waidie ta na vetoketoke.

16 ¹Wata Iesu i vona yana tovetutuyamavo 'waidie i vo, Naninidi 'akonadi a voneyediga 'waimie bega tutuyanina vita i na souyeni 'waimie kebu 'wa na mwea, nuanuaku 'wa na vetoketoke. ² ^eYada to'edakumetavo me Diu i na talabodemi kebu 'ami fata 'wa na lukuluku 'eba miava'auta 'waidie tafalolo faifaina. Wata 'awaie tomotoga i na luvewafami, yadi nuanua i na vo 'ako, Yaubada yana nuanua.” ³ ^fI na ve'idi'idiemiga wata i na luvewafamiga fai Tamada i bavuyeni wata yau taiadi. ⁴Naninidi faifaiddi nagami a matakiami bega tutuyanina i na souyedi 'waimie nika 'wa na nuani yaku vona.

'Anu'anunu 'Atumaina yana folova.

Vitanidi 'awaie 'wa na veluagadiga faifaiddi nagami kebu a da vonemi fai yau taiadi ta miamia. ⁵Fai sai'afoga a na tauya a na nago 'aku tovetune 'waineye bega naninidi a lulu'ivona-vagasedi 'waimie. Siwe kebu tamu aitoi 'waimiega i da velutoli 'waikuye i da vo, Ava'aibe bei 'u na nago?” ⁶Fai a vo, A na nago,” 'wa nuavita bwaikina. ⁷ ^gSiwe a vona mogitana 'waimie 'ai'edi taiadi ta na miamia, 'atumaina siwe kebu mogitana 'atumaiotogina, fai 'ami To'aivaita kebu i na maiga, we'e a na nagoga 'atumaiotogina 'waimie fai To'aivaitanina a na vetunei i na mai. ⁸Tomia fwayafwaya i vekali kebu i da nuanuadewa. Siwe tutuyanina 'Anu'anunu 'Atumaina i na mai fwayefwayeye i na vedewedewedi bega i na 'asetai matatabudi i sakona, wata sauluva tonovina i na vedi, wata i na vedi bega i na 'asetai 'awaie matatabudi i na vonayavuga Yaubada mataneye, i na veimeyedi. ⁹Tomotoga i sakosakonaga fai kebu i da vetumagana 'waikuye, i na vedi. ¹⁰Wata i na vedi, fai 'akonadi a nunago Tamada 'waineye kebu wata 'wa na 'ise'isekuga, 'eba 'isa yaku sauluva tonovidi. ¹¹ ^h'Akonadi Yaubada i veimea tosakona yadi toveimea Seitani

^b 15:25 Same 69:4 ^c 15:26 Ion 14:26 ^d 15:27 Fol 5:30-32 ^e 16:2 Mad 24:9; Luk 6:22
^f 16:3 Ion 15:21 ^g 16:7 Ion 14:16 ^h 16:11 Ion 12:31

vematavuloga i na veluagai, begaidi 'Anu'anunu 'Atumaina i na vedi tosakona matatabudi i na vonayavuga Yaubada mataneye.

¹²Fai 'wa nuavita, begaidi 'asiau kebu 'aku fata nani matatabuna a na lu'ivoneyedi 'waimie. ¹³'Siwe tutuyanina 'Anu'anunu 'Atumaina i na mai nuanua mogitana Yaubada 'wainega matatabuna i na vemi, 'Anu'anununina nani matatabuna tonovidi lamuna. Kebu 'ana fata taunina yana nuanuayega i na veifufu 'waimie, siwe ava'ai i na nogai Yaubada 'wainega, i na lu'ivona 'waimie, wata naninidi 'awaie i na souyediga faifaidi i na vona-vagasemi. ¹⁴'Awaie ava'ai nuanuaku a na vonemiga, 'Anu'anunu 'Atumaina i na lu'ivona 'waimie, bega 'wainega 'aku subia a na veluagai. ¹⁵Tamaku yana 'ai'aiwabu matatabuna i 'anivelenedi 'waikuye begaidi 'akonadi a vonemi a vo, 'Awaie ava'ai a na voneyeniga, 'Anu'anunu 'Atumaina i na lu'ivona 'waimie.”

Nuavita wata sosoana.

¹⁶Sai'afoga a na 'iawemi 'wa na 'isa'avaku, siwe kebu tutuya manamanawenaga wata 'wa na 'iseku.” ¹⁷Tovetutuyamavo 'ifwaidi 'aise'avadi i velutoli i vo, Yana vona 'ana nuanua bani'odi? I vonaga i vo, Sai'afoga a na 'iawemi 'wa na 'isa'avaku, siwe kebu tutuya manamanawenaga wata 'wa na 'iseku,” wata i vo, A na nago Tamada 'waineye.” ¹⁸Wata i vo, Kebu tutuya manamanawenaga,” 'ana nuanua ava'ai? Aigodi, kebu ta da 'asetai ava'ai i vonevoneyeni.” ¹⁹Iesu 'akonadi i 'asetai yadi nuanua, nuanuadi i na velutolieni begaidi i vonedi i vo, Voke nuanuami 'wa na 'asetai yaku vona 'ana nuanua fai a vo, Sai'afoga a na 'iawemi 'wa na 'isa'avaku, siwe kebu tutuya manamanawenaga wata 'wa na 'iseku.” ²⁰A vona mogitana 'waimie, tutuyanina a na 'iawemi, 'aku mogai 'wa na 'we'wela, we'e Yaubada 'ana tovedumwe'ai'ai i na sosoana. Mogitana 'wa na nuavita siwe tutuyanina 'wa na 'iseku igodi 'wa nunuavitaga 'wa na sosoana. ²¹Tutuyanina vavine i na vebutudi 'eba nuavita fai veviga bwaikina i vevebaedi, siwe tutuyanina kwamana i na tubuga 'eba sosoana bwaikina 'waidie, veviganina nua'ubudie i na yatoi fai natudi i na 'ise'iseni. ²²'Omi wata bani'odi, 'asiau 'wa nuavita siwe tutuyanina a na vilaku a na mai, 'wa na 'iseku 'wa na sosoana bwaikina. Yami sosoananina kebu tamu aitoi 'ana fata i na talabodeni.

²³^kA vona mogitana 'waimie, 'awaie kebu wata tauniotogiku 'waikuye 'wa na vevelu'ui, ava'ai nuanuami tonovina 'wa na vevelu'ui 'aku wagavayega Tamaku 'waineye i na vevelelele. ²⁴'Basenadi i maiga 'asiau, kebu 'aku wagavayega 'wa da vevelu'ui Tamaku 'waineye, siwe tutuya de'e i velamu bega i na nagoga 'wa na vevelu'ui 'aku wagavayega bega ava'ai nuanuami 'wa na veveluagadi, wata 'wa na sososoana mogitana.”

ⁱ 16:13 Ion 14:26; ¹ Ion 2:27 ^j 16:22 Ion 20:20 ^k 16:23 Ion 15:7; Mad 7:7

^l 16:24 Ion 15:11

Iesu i vetoketoke tomotoga matatabudi 'waidie.

²⁵Wata Iesu i veifufu yana tovetutuyamavo 'waidie i vo, Naninidi a veifufuyediga, vona-awatabaiega, siwe 'awaie kebu wata vona-awatabaiega a na veveifufu, we'e a na vo Tamaku faifaina a na veifufu 'waimie 'ana lu'eda'aiagalidi. ²⁶Tutuyanina 'waineye, ava'ai nuanuami tonovina 'wa na vevelu'ui 'aku wagavayega Tamada 'waineye i na vevelemi, we'e ava'ai yami nuanua kebu wata a na vevelu'ui faifaidi, 'omi taunimi 'wa na vevelu'ui tonovina Tamada 'waineye. ^{27^m}Fai 'wa nuakalikalienu wata 'wa vetumagana yau a mai Yaubada 'wainega, begaidi i nuakalikaliemi. Fai i nuakalikaliemiga, begaidi ava'ai nuanuami 'ami fata 'wa na vevelu'ui tonovina 'waineye. ²⁸Yau a mai fwayefwayeye Tamada 'wainega, 'akonadi a na 'iawemi a na vilaku a na nago Tamadanina 'waineye.”

²⁹Iesu yana tovetutuyamavo yana vona i nogai i vo, We'e vonanina 'ana nogaya kebu vona-awatabaiga, 'u vovonaotoga. ³⁰'Akonadi 'a 'asetamu, nani matatabuna 'u 'asetadi, kebu tamu wata aitoi 'ana fata i na awave'ede'edemu. Yamu 'asetanina 'a 'iseni 'a vetumagana 'waimuye 'a 'asetai 'omu 'u mai Yaubada 'wainega.” ³¹Iesu i vonedi i vo, 'Alo be'ama 'wa vetumagana. ³²”Siwe 'awaie wata 'akonadi i sousouyeni, matatabumi 'wa na vemiave'eve'e'elagi yami vanuga 'aitamogana 'aitamogana 'waidie, we'e yau 'wa na degaloveku. 'Wa na degaloveku siwe kebu mogitana 'aisekuga fai Tamada taiadi 'a miamia. ^{33^o}Naninidi a voneyediga bega nuanua bikana mia 'atumaina taiadi 'wa na veveluagai yau 'ami labilabina 'waikuyega. Mogitana veviga 'wa na veveluagadi Yaubada 'ana tovedumwe'ai'ai 'waidiega siwe kebu 'wa na kolologa, 'wa na vevenuafoufa'ala. 'Akonadi a vetoketoke tomotoga matatabuna 'waidie.”

Iesu i velu'ui taunina faifaina.

17 ¹Iesu i vona'a'ava, mulieta i 'isalaka abame Tamana 'waineye i velu'ui i vo, Tamaku, 'akonadi yaku tutuya i souyeni, yau Natumu nuanuaku 'u na silakaiku tomotoga matadie, bega 'waikuyega fuedi i na subiamu. ^{2^p}'Akonadi 'u tauyeku tomotoga matatabuna a veveimeyedi bega egavo 'u velekuga mia 'atumaina wata miamia-vagaina a na veledi. ^{3^q}Mia-vagatanina 'ana 'eda'eda side bani'odi. Egavo i na 'asetatatumaimu 'omu Yaubada mogitana 'aiseotogimu, wata i na 'asetatatumaiuku yau Iesu Keliso, 'amu Venua'ivina, kumaniku 'u vetuneku, bega mia-vagatanina i na veluagai. ⁴'Nani matatabuna 'u voneku a na 'idewadiga, 'akonadi a

^m 16:27 Ion 14:21,23 ⁿ 16:32 Mad 26:31,56; Ion 8:29 ^o 16:33 Ion 14:27; Ion 5:4
^p 17:2 Ion 6:39-40 ^q 17:3 1 Ion 5:20 ^r 17:4 Ion 4:34

sigoidi, wata yaku folovanidi 'waidiega tomotoga fueidi i subisubiamu. ⁵Basenadiotoga fwayafwaya bola kebu 'u da 'idewaiga, 'waimuye taiadi ta miamia ma yada 'ai'aiwabu magemagetadi. Nuanuaku matamuye 'ai'aiwabunidi 'waidiega 'asiau 'u na 'ive'ai'aiwabuku.

Iesu i velu'ui yana tovetutuyamavo faifaidi.

⁶Basenadi tomia fwayafwaya 'waidiega yamu tomotoga 'u venua'ivinedi. Tomotoganidi 'u velekuga 'waidie a sivemagesemu, bega yamu vona i vematayakeyakedi. ⁷Akonadi i 'asetai nani matatabuna 'u velekuga, 'omu 'waimuyega i maia. ⁸Vonanidi 'u velekuga a lu'ivoneyedi 'waidie ma yadi sosoana i nogai. Bega i 'aseta-'atumaia yau a mai 'omu 'waimuyega, wata i vetumagana 'omu 'u vetuneku.

⁹Tomotoganidi 'u velekuga faifaidi a vevelu'ui 'waimuye. Kebu tomia fwayafwaya matatabudi faifaidi a da vevelu'ui, siwe tomotoganidi 'u velekuga faifaidi a vevelu'ui fai 'omu yamu tomotoga. ¹⁰Tomotoganidi wata nani matatabuna a veveimeyediga 'omu yamu nani wata yamu tomotoga, wata nani matatabuna 'waimuye tomotoganidi taiadi, 'u 'anivelenedi 'waikuye bega 'waidiega ve'ililibu a veluagai. ¹¹"Akonadi a na wai 'waimuye we'e yaku tovetutuyamavo a na 'iawedi i na miamia de'e bei fwayefwayeye. Tamaku Magemagetamu, nuanuaku 'amu wagava toketokenega 'aku tovetumaganavo 'u na 'i'isave'avinidi, toketokenanina basenadi 'u velekuga 'wainega. Nuanuaku 'u na 'i'isave'avinidi bega yadi nuanua 'aitamogana bani'odi 'omu wata yau yada nuanua 'aitamogana. ¹²"Yau de'e bola taiadi 'a miamiani, 'amu wagava toketokenega a 'i'isave'avinidi, toketokenanina basenadi 'u velekuga 'wainega. 'Waidiega kebu tamu aitoi a da baileni a 'i'isave'avinidi, we'e mogitana tamu i be'u, i lubwaineni 'ai-'ala'alase i na nago, fai basenadiotoga tamu vona tomogonina faifaina i kilumi yamu Buki nageneye, nika 'ana mogitana 'akonadi i souyeni.

¹³^xTutuya de'e a na wai 'waimuye, we'e yaku tovetutuyamavo taiadi 'a miamiani, nani fueidi a veifufuyedi 'waidie bega i na sososoana bwaikina. ¹⁴^yYamu vona a lu'ivona 'waidie, i nogai begaidi tomotoganidi fwayafwaya 'ana nuanua 'waidie bwaikina, i vevedumwe'ai'aiedi. I vevedumwe'ai'aiediga fai de'e tovetutuyamavo tomotoganidi yadi sauluva sakoidi i bailedi. Yau wata tovedumwe'ai'ainidi kebu yadi 'aila'a 'waineye a da miamia. ¹⁵^zA vevelu'uiga, kebu a da vo, 'U na vagavaidi fwayafwaya de'e 'wainega," we'e mogitana a vevelu'ui bega 'u na 'i'ita'ita'iedi Seitani yana nuanua sakoidi 'waidiega. ¹⁶Tomotoganidi fwayafwaya 'ana nuanua 'waidie bwaikina, yau kebu 'adi 'aila'a nageneye a da miamia, wata bani'odi yaku tovetutuyamavo.

^s 17:5 Ion 17:24 ^t 17:8 Ion 16:30 ^u 17:9 Ion 6:37 ^v 17:11 Ion 17:21 ^w 17:12 Fol 1:18
^x 17:13 Ion 15:11 ^y 17:14 Ion 15:19 ^z 17:15 2 Tes 3:3

¹⁷Wata a velu'ui 'waimuye, yamu vona 'atumaidi wata tonovidi 'waidiega yaku tovetutuyamavo 'u na 'ive'atumaidi bega yadi sauluva tonovidi i na miamiani yamu 'aila'a nageneye. ¹⁸^aBasenadi 'u vetuneku a mai tomotoganidi fwayafwaya 'ana nuanua 'waidie bwaikina 'awasasadie, yau wata bani'odi yaku tovetutuyamavo a vevetunedi tomotoganidi 'awasasadie. ¹⁹Yaku tovetutuyamavonidi faifaidi a tauyeku 'waimuye bega tomotoganidi wata taunidi i na tauyedi mogitana 'waimuye, yamu 'aila'a.

Iesu i velu'ui 'ana tovetumaganavo faifaida.

²⁰Kebu yaku tovetutuyamavo 'aise'avadi faifaidi a da vevelu'ui, siwe yadi veifufu wata yadi lau'age 'waidiega egavo i na vetumagana 'waikuye, faifaidi a vevelu'ui. ²¹^bA vevelu'ui nuanuaku matatabudi yadi nuanua 'aitamogana. Tamaku, 'omu 'u labilabiniku wata yau 'amu labilabina, wata bani'odi nuanuaku tomotoganidi taiadi ta na miave'itubama bega yadi nuanua 'aitamogana, mali tomotoga i na 'isedi i na vetumagana yau 'u vetuneku. ²²^cBasenadi yamu toketokena magemagetana 'u veleku, yau wata bani'odi toketokenanina a veledi bega yadi nuanua 'aitamogana bani'odi 'omu wata yau 'aitamogana. ²³Yau 'adi labilabina, 'omu 'u labilabiniku, bega mogitana yadi nuanua i na luvetubama nika 'aitamogana. Mali tomotoga i na 'isedi i na 'asetai 'u nuakalikaliedi bwaikina bani'odi yau 'u nuakalikalieku, wata i na 'asetai 'u vetuneku a mai.

²⁴^dTamaku, nuanuaku tomotoganidi 'u veikuga ava'aibe bei a na miamiaga wata taunidi taiadi, bega yaku 'ai'aiwabu magemagetadi i na 'isedi. Fai 'u nuakalikalieku bwaikina, bola fwayafwaya kebu 'u da 'idewaiga 'ai'aiwabunidi 'u veleku. ²⁵Tamaku, yamu veimea tonovidi. Tomotoganidi fwayafwaya 'ana nuanua bwaikina 'waidie i bavuyemu, we'e yau a 'asetamu wata yaku tomotoga i 'asetai 'omu 'u vetuneku. ²⁶^e'Amu 'asetai faifaina a lu'ivona 'waidie, wata a na lulu'ivona 'waidie bega 'u nuakalikaliekuga wata bani'odi nuakalikalininina i na 'eno'eno nagedie, we'e yau a na labilabinidi.”

Iesu 'ana 'ive'avina.

18 ¹fIesu yana velu'ui i 'a'ava, mulieta yana tovetutuyamavo taiadi Ielusalema i 'iaweni i nagoi i obu Ufa Kidiloni i damani no'o bega i laka. Bei welavi fuei i tabo, nagedie i luku. ²Iudasa, taunina Iesu 'ana to'etogiluva, 'awalawanina i 'asetai fai tutuya fuei Iesu ma yana tovetutuyamavo bei i nunagoi. ³Mulieta Iudasa 'ifwaidi tolugaviavo taiadi i maia 'awalawanina 'waineye. Tolugavianidi

^a 17:18 Ion 20:21 ^b 17:21 Gal 3:28 ^c 17:22 Fol 4:32 ^d 17:24 Ion 14:3
^e 17:26 Ion 17:6 ^f 18:1 Mad 26:36

'lifwaidi vanuga 'eba velu'ui 'ana to'isave'avinavo, i maia tovelomu 'adi to'edakumetavo wata Falisi 'waidiega, siwe ma yadi 'ibadi wata kefata i laudukala i maia. ⁴⁻⁵Iesu 'akonadi i 'asetai ava'ai sai'afoga i na souyedi 'waineye begaidi tutuyanina Iudasa tolugaviavo taiadi i le'wai, Iesu i vaganago 'waidie i velutoliedi i vo, Aitoi 'wa lulualeni?" Tolugaviavo i vo, Tomogo Nasaledi 'ana wagava Iesu." Iesu i vo, Yau side tauniku." ⁶Tutuyanina Iesu i vonedi i vo, Yau side tauniku," tolugaviavo i vemuliuga i nagoi i be'u i ve'ufo'ufobala. ⁷Wata Iesu i velutoliedi i vo, Aitoi 'omi 'wa lulualeni?" Tolugaviavo i vo, Tomogo Nasaledi 'ana wagava Iesu." ⁸Iesu i vo, 'Akonadi a vonemi a vo, Yau side 'asa'aiana tauniku." Fai nuanuami yau, de'e yaku tovetutuyamavo 'wa na vonedi i na nagoi." ⁹Iesu i vonaga i vo, 'Wa na vonedi i na nagoi," nika yana vonanina basenadi 'ana mogitana i souyeni fai i vo, Tamaku, tomotoganidi 'u veleku 'waidiega kebu tamu aitoi a da baileni a 'i'isave'avinidi." ¹⁰Saimoni Fita ma yana kefata, i yo'ei tovelomu bwaikina yana tofolova igodi i da nikei, taniga'avana 'ana 'atagiega i tutuomuya. Tofolovanina 'ana wagava Maleko. ¹¹Iesu Fita i talabodeni i vo, 'Asa'aiana, yamu kefata 'u dodogi 'ana 'eba 'aidodoga 'waineye. I lubwaineku vita wata wafa a na veluagadi fai Tamaku nuanuana, we'e 'omu yana nuanuanina 'u tatalabodeni."

¹²Tolugaviavo ma yadi toeva biola, wata vanuga 'eba velu'ui 'ana to'isave'avinavo taiadi, Iesu i 'ive'avini i yogoni. ¹³Mulieta i 'ewai i naweni Anasa 'waineye. Anasanina natuna yadi lamoga tovelomu bwaikina malamalanina 'waineye, 'ana wagava Kaiafa. ¹⁴'Kaiafa kumanina basenadi me Diu to'edakumetavo i vonedi i vo, I lubwaineni Iesu i na wafa bega tomotoga fueda ta na mia 'atumaina."

Fita Iesu i ve'eweni.

¹⁵Saimoni Fita wata tamu tovetutuyama Iesu i yogo'waili. Ma fuedie i le'wai tovelomu bwaikina yana vanuge, vanuganina kalikalina, nageneye i luku tamu 'awasasa 'waineye. Fai tovelomu bwaikina tovetutuyamanina i 'asetai begaidi Iesu taiadi i luku. ¹⁶We'e Fita i tovo'ovoi tanotanoge kali 'ana 'awa lilivaneye bega iana, kumanina tovelomu bwaikina i 'asetai i vilai i mai vavine ne'e'elina 'awa 'ana to'isave'avina i voneni Fita i tauyeni i luku. ¹⁷Vavininina ne'e'elina Fita i voneni i vo, Voke 'omu kumanimu no'o tomogonina tamu yana tovetutuyama." Siwe Fita i ve'ewa i vo, Yau tuliku."

¹⁸Fai kaukau, tofolovavo wata tolugaviavo 'ai i levai mula'wayega bei i vevevala. Wata Fita i nago lilivadie i tovoi ma fuedie i vevevala.

Tovelomu bwaikina Iesu i velutolitolienu.

¹⁹Vanuganina nageneye tovelomu bwaikina Iesu i velutolitolienu yana tovetutuyamavo wata yana ve faifaidi. ²⁰^kYana vona Iesu i tutuli i vo, Yau tutuya fue di mageseye a veveifufu 'aila'a matadie. Kebu a da givagiva a da veve, yaku ve matatabuna vanuga 'eba velu'ui nageneye wata 'eba miava'auta 'waidie me Diu fue di matadie. ²¹Awale 'u velutolitolieku? Nuanuamu velutoli, tomotoganidi yaku vona i noganogaidi 'waidie 'u da velutoli. Ava'ai a voneyediga i 'asetadi, 'adi fata i na lu'ivona 'waimuye." ²²De'e bani'odi Iesu i vonevoneyediga, tamu tolugavia i 'ainike Iesu maigineye wata i vo, Awale we'e bani'odi 'u voneyedi yada tovelomu bwaikina 'waineye, kebu 'u da ve'ililibuyeniga." ²³Tolugavia yana vona, Iesu i tutuli i vo, 'Ai'edi a vekaliga, 'u na lu'ivona tomotoga 'waidie, we'e 'ai'edi a vona tonovina, awale 'u nikeku?"

²⁴Anasa yana velutoli i 'a'ava, Iesu yogoyogonina i vetunei i nago tovelomu bwaikina tamu 'ana wagava Kaiafa 'waineye.

Fita Iesu i ve'ewa-vaituganeni.

²⁵Fita bola i vevevala, 'ifwaidi tomotoga i voneni i vo, Voke 'omu no'o tomogonina tamu yana tovetutuyama." Siwe Fita i ve'ewa i vo, Kebu, yau tuliku." ²⁶^lTovelomu bwaikina yana tofolova, kumanina Fita tanigana i tutuomuya we'e iana tamu wata taunina tofolova i vona Fita 'waineye i vo, 'Asiau 'a waia Iesu 'a 'ive'avini voke a 'isemu Iesu taiadi." ²⁷^mWata Fita i ve'ewa i vo, Kebu," nika kamukamu i kwage.

Iesu i tovoi Failato mataneye.

²⁸'Awa'awaiogose Kaiafa yana vanugayega me Diu to'edakumetavo Iesu i vagavaia i naweni Loma gabemani 'adi to'edakumeta yana vanuga bwaikina 'waineye 'ana wagava Failato. Taunina kebu tomogo Diu, begaidi me Diu i vo, 'Ai'edi ta na luku yana vanuge, ta na veyoke Yaubada mataneye bega kebu 'ada fata Uvi'agalatagona sakalina ta na 'ani." ²⁹Fai nuanuadi i na miamiani tanotanoge, begaidi Failato i souyeni yana vanugayega i mai i velutoliedi i vo, Ava'ai faifaina tomogo de'e 'wa vevitai?" ³⁰Me Diu yana vona i tutuli i vo, 'Ai'edi kebu yana sakonaga, 'ako kebu 'a da mieniga." ³¹ⁿBega Failato i vonedi i vo, 'Wa naweni i na vonayavuga matamie. 'Ai'edi ma yana sakona taunimi yami veimea 'waidiega vematavuloga 'wa na veleni." Me Diu to'edakumetavo Failato i voneni i vo, Nuanuama i na wafa yana sakona faifaina, siwe 'omi me Loma 'wa talabodema. Nuanuama 'u na vona i na wafa 'ai lagalagana 'waineye." ³²^oBasenadi Iesu i vona-vagata 'awaie i na wafa 'ai lagalagana

^k 18:20 Mad 26:55; Ion 7:26 ^l 18:26 Ion 18:1,10 ^m 18:27 Ion 13:38 ⁿ 18:31 Ion 19:6-7
^o 18:32 Ion 12:32-33

'waineye, tutuyanina me Diu i vo, Nuanuama 'ai lagalagana 'waineye i na wafa," nika Iesu yana vonanina 'ana mogitana i souyeni. ³³Failato i vilai i luku yana vanuge, tomotoga i vonedi Iesu i naweni 'waineye i voneni i vo, 'Alo 'omu kumanimu me Diu yadi kini." ³⁴Iesu Failato i voneni i vo, Yamu vonanina, 'omu yamu nuanua 'alo mali tomotoga i vonemuna bani'odi 'u voneyedi?" ³⁵Wata Failato i vo, 'Alo yau tomotoga Diu bani'odi a da voneyedi. Taunimu yamu tomotoga wata yamu tovelomu 'adi to'edakumetavo i 'anivelenemu 'waikuye. Siwe ava'ai yamu sakonaga?" ³⁶Iesu i voneni i vo, De'e bei fwayefwayeye kebu yaku 'Eba Veimea i da 'eno'eno. We'e 'ai'edi yaku 'eba veimea fwayefwayeye i da 'eno'enoga, 'ako yaku tofolovavo i da 'ikasikasisieku me Diu yama to'edakumetavo taiadi i da vetalaga 'aku 'ita'ita'ia faifaina. Yaku veimea lamuna kebu fwayafwaya 'wainega." ³⁷Bega Failato i velutoli Iesu 'waineye i vo, 'Alo 'omu kini?" Iesu i vo, 'U vonaga yau kini, 'u vona mogitana. Faifaina yau a mai fwayefwayeye a tubuga, a vevetolu'ivona Yaubada yana nuanua tonovidi. Egavo nuanuadi sauluva tonovidi, yaku vona i noganogaidi." ³⁸Failato i vo, Ava'ai nuanuaga tonovidi?"

Mulietta Failato i vilai i obu tanotanoge me Diu i vonedi i vo, Kebu 'aku fata a na veimea i na wafa fai kebu tamu yana sakona a da veluagai. ³⁹Siwe yami sauluva malamala 'aitamogana 'aitamogana Uvi'agalatagona 'ana sakali 'waineye 'wa vonavona tamu tomogo a 'e'etoyavuya vanuga 'eba yogona 'wainega. Bega nuanuami me Diu yami kini a na 'etoyavuya?" ⁴⁰I vegolegole i vo, Kebu, kebu kumanina yama nuanuaga. Nuanuama Balaba 'u na 'etoyavuya." Balabanina taunina tovainago wata to'ainike.

Failato i veimea Iesu i na wafa.

19 ¹Failato 'aila'a bonadi i nogai, bega Iesu i 'ewai i naweni yana vanuge tolugaviavo i vonedi i toke i fitali. ²Tolugavianidi fisili ma yana 'ibadi i 'etofifini Iesu 'unu'ununeye i biuleni, wata kaleko yamoyamoinega i ve'weseni. Vaigavunidi kini 'adi vaigavu 'adi 'isa'isa, siwe Iesu 'waineye i sidibidibieni. ³Wata i ve'ililibu-vekavekali 'waineye i vo, Kaiwa, 'omu me Diu yadi kini." I 'a'avana maigineye i 'ainike.

⁴Wata Failato i vilai i obuma 'aila'a i vonedi i vo, Tomogonina a na mieni 'wa na 'iseni, 'wa na 'asetai kebu tamu sakona a da veluagai 'wainega bega kebu 'aku fata a na veimea i na wafa. ⁵Iesu i obumaga tanotanoge ma 'ivivigavuna, fisili 'etofifinina 'unu'ununeye wata kaleko yamoyamoinega i ve'weseni. Failato 'aila'a i vonedi i vo, 'Wa 'isamaieni, side tomogonina." ⁶Tutuyanina me Diu to'edakumetavo wata tovelomu 'adi to'edakumetavo Iesu i 'iseni i vegolegole i vo, 'U tutufwaseni 'ai lagalagana 'waineye, 'u tutufwaseni 'ai lagalagana 'waineye." Failato i vonedi i vo, Taunimi 'wa

'ewai 'wa tutufwaseni 'ai lagalagana 'waineye. Kebu i da lubwaineniga wafa fai kebu yana sakonaga.” 7⁹Me Diu i vo, I lubwaineni i na wafa fai yada veimea i geuya. 'A nogai igodi i vo, Yau Yaubada Natuna.”

8-9⁹Tesu yana vonanina me Diu i lu'ivoneyeni Failato i nogai i kololo bwaikina fai i nuani i vo, Voke mogitana Yaubada Natuna. Begaidi i vilai i luku vanuge Iesu i voneni i vo, Nuanuaku a na 'asetai 'omu ava'aiega 'u mai?” Siwe Iesu kebu tamu ava'ai i da voneyeniga Failato 'waineye. 10⁹Wata Failato Iesu i voneni i vo, Awale kebu bonaku 'u da tutuliga? Yau ma yaku veimea 'aku fata a na 'etoyavumu, wata 'aku fata a na veimea i na tutufwasemu 'ai lagalagana 'waineye.” 11⁹Iesu i vona i vo, 'Ako kebu 'u da veimeyekuga, siwe fai Yaubada veimea i velemu, 'amu fata 'u na veimeyeku. Yamu veimeanina 'wainega 'u sakona, siwe tomogonina i 'aniveleneku 'waimuye yana sakona bwaikaotogina.” 12⁹Vonanina Failato i nogai nuanuana bwaikina Iesu i na 'etoyavuya, siwe me Diu kebu nuanuadi. Begaidi i vegolegole i vo, 'Ai'edi aitoi taunina i na awa'ai'aia i na vo, Yau kini,” tomogonina me Loma yami to'edakumeta bwaikaotogina Sisa 'ana gavia. 'Ai'edi Iesu 'u na 'etoyavuya 'omu kebu Sisa ianaga, fai Iesu taunina i awa'ai'aia nuanuana i na ve-kini.” 13⁹Tutuyanina Failato me Diu yadi vona i nogai Iesu i vagavaia i obuyeni didige, 'eba vona yavuga 'waineye bei Failato i miabui. Didiganina 'ana wagava Didiga Bababana, me Diu bonadiega i goleni Kabada.

14⁹Akonadi 'aiata-'wana'wana, we'e 'awa'awai me Diu i na sakali Uvi'agalatagona“ faifaina. Failato me Diu i vonedi i vo, Side, yami kini.” 15⁹Me Diu i vegole-vaitugana i vo, 'U luvewafai, 'u luvewafai, 'u tutufwaseni 'ai lagalagana 'waineye.” Failato i velutoliedi i vo, Nuanuami yami kini a na tutufwaseni 'ai lagalagana 'waineye?” Tovelomu 'adi to'edakumetavo Failato yana vona i tutuli i vo, De'e Iesunina kebu yama kini. Yada kini 'aitamogana Sisa.” 16⁹Failato nuanuana nuadi i na 'iveagiagidi bega Iesu i 'aniveleneni 'waidie i na tutufwaseni 'ai lagalagana 'waineye.

Iesu 'ana tutufwatagi.

17⁹Iesu i 'ewai i naweni, we'e 'ana 'ai lagalagana taunina i eva. Ma fuedie i nagoi i le'wai tamu 'awalawa 'ana wagava 'Unu'unu Lulu'ava 'waineye, me Diu bonadiega i goleni Goligota. 18⁹'Awalawanina 'waineye bei Iesu i tutufwaseni 'ai lagalagana 'waineye. Wata tomotoga 'adi 'ailuga i tutufwasedi 'ai lagalagana 'waidie, tamu wamayega, tamu 'atagiege, we'e Iesu kamwaneye. 19⁹Failato tamu vona i kilumi tolugaviavo i veledi Iesu 'ana 'ai lagalagana 'waineye i tutufwaseni. Vonanina i kilumiga side bani'odi.

¶ 19:7 Vei 24:16; Ion 5:18 ¶ 19:9 Mad 27:12; Luk 23:9 § 19:11 Ion 10:18; Fol 2:23; Lom 13:1 † 19:12 Luk 23:2; Fol 17:7 ‡ 19:14 Me Diu yadi 'eba tolinuata'i basenadiotoga Yaubada tubudiavo i 'ita'ita'iedie Itifita 'wainega, anelose me Diu i uvi'agalatagonidi we'e me Itifita i nikedi.

DE'E TOMOGO NASALEDI 'ANA WAGAVA IESU,
ME DIU YADI KINI.”

²⁰ 'Awalawanina bei Iesu i tutufwaseniga kebu 'ani'iega Ielusalema lilivaneye, begaidi me Diu fueidi i nagoi i lu'iaawawai. Vonanina Failato i kilumiga vona 'aitonu 'waidiega, me Loma bonadiega, Me Guliki bonadiega, wata me Diu bonadiega.

²¹ Tovelomu 'adi to'edakumetavo i 'iseni i nagoi Failato i voneni i vo, Awale 'u kilumi 'u vo, Me Diu yadi kini?” Nuanuama 'u da vo, Tomogo de'e igodi i vo, Yau me Diu yadi kini.” ²² Siwe Failato i vonedi i vo, Ava'ai 'akonadi a kilumiga, 'asa'aiana bani'odi i na 'eno'eno.”

²³⁻²⁴ *Tolugaviavo Iesu i tutufwaseni i 'a'avana, mulieta tolugaviavo 4 'aise'avadi 'ana kaleko i 'ewadi, i veusedi. Wata 'ana talauma i 'ewai i 'iseni kebu 'ana tubwaga, mwadodouna i 'idewai begaidi i vo, Kebu ta na labu'iga, tamu 'wava ta na 'waveni bani'odi kate, ta na 'iseni aitoi i na kumeta kumanina i na 'ewa.” Naninina i 'idewaiga, nika tamu vona basenadiotoga Yaubada yana Buki 'waineye i kilumiga, 'ana mogitana i souyeni i vo, 'Aku kaleko i veusedi 'aitamogana 'aitamogana 'waidie, Wata 'aku talauma faifaina i 'wava bani'odi kate.”

Fai bani'odi i voneyediga, begaidi tolugaviavo bani'odi i 'idewai.

²⁵ Iesu 'ana 'ai lagalagana lilivaneye vevine 4 i tovtovoi. Side vevinenidi, Iesu inana ma taidi, Kilofa yana vavine 'adi wagava Meli, wata tamu Meli 'atamana Magidala 'wainega. ²⁶ Iesu i 'isaobu inana i 'isedi, wata yana tovtutuyama kumanina i nuakalikalieni bwaikina i tovtovoiga i 'iseni inana i vonedi i vo, Inaku, siwe natumi.” ²⁷ We'e tovtutuyamanina i voneni i vo, Siwe inaku, 'u na 'isave'avinidi.” Bei tutuyanina 'waineye i nawedi yana vanuge i 'i'isave'avinidi.

Iesu i wafa.

²⁸ *Iesu 'akonadi i 'asetai nani matatabuna i sigoidi wata fai nuanuana Yaubada yana Buki 'waineye basenadiotoga i kilumiga 'ana mogitana i na souyeni begaidi i vo, 'Anigoku i lala.” ²⁹ *Bei Iesu i tutufwaseniga tamu oine yuyuna ma 'aivoena i 'eno'eno. Tomotoga Iesu bonana i nogai, bega kikifa i 'ewai i lu'utuvi oine 'waineye, tamu 'ai 'waineye i velugaganeni i 'iyoyoeni Iesu 'waineye. ³⁰ *Iesu oine i yemuyana i vo, I 'a'ava,” mulieta i 'odu nika yawaina i tauyeni i wafa.

v 19:24 Same 22:18 w 19:28 Same 22:15 x 19:29 Same 69:21 y 19:30 Ion 4:34

Iesu lumalumaneye i 'ailovena.

^{31z}Iesu i wafa 'aiata 'idewadewa 'waineye. Me Diu to'edakumetavo kebu nuanuadi tomotoganidi tomogodi i na 'eno'eno 'ai lagalagadi 'waidie 'Aiata Veawai 'waineye, wata fai 'awa'awai bani'odi 'Aiata Veawai bwaikina Uvi'agalatagona faifaina. Begaidi to'edakumetanidi i nagoi Failato 'waineye i velu'ui nuanuadi i na tauyedi bega tomotoganidi 'ai lagalagana 'waidie 'agedi i na tutubaidi bega i na wafa matayo'o, mulieta i na ta'idi. ³²Failato i tauyedi bega tolugaviavo i vonedi i nagoi tomotoga 'adi 'ailuga kumanidiavo Iesu taiadi i tutufwasediga, 'agedi i tutubaidi. ³³Iesu 'waineye i le'wai i 'iseni 'akonadi taunina i wafa bega kebu 'agena i da tutubaidi. ³⁴We'e tamu tolugavia Iesu lumalumaneye i 'ailovena, nika dayaga wata ufa i kausewa. ³⁵^aTamu tomogo mataotogineye i 'iseni dayaga wata ufa i kausewa bega i lu'ivoneyeni, yana lu'ivonanina vona mogitana. I vona mogitana wata i 'asetai kebu i da vekali bega 'omi wata 'wa na vetumagana Iesu 'waineye. ³⁶^bTolugaviavo kebu Iesu 'agena i da tutubaidiga bega ava'ai basenadiotoga i kilumi Yaubada yana Buki 'waineye 'ana mogitana i souyeni i vo, Kebu tamu luluna i da tutubaia.”

³⁷^cWata tamu vona basenadiotoga i kilumi i vo,
Tomogonina i loveniga tomotoga i na vemata'i'i'ieni.”

Iesu 'ana ve'ufo.

³⁸^dMulieta tamu tomogo 'atamana Alimadia 'wainega 'ana wagava Iosefa, i nago i velu'ui Failato 'waineye Iesu tomogona faifaina. Iosefanina tamu Iesu yana tovetutuyama siwe kebu nuanuana i na lu'ivona fai me Diu to'edakumetavo i kololoyedi. Iosefa yana velu'ui faifaina Failato i awave'atumaieni bega i voneni i nago Iesu tomogona i ta'ia i naweni. ³⁹^eWe'e Nikodimo, basenadi kumanina lovane i nago Iesu 'waineye, bunama 'atumaidi wata bwaikidi^f i 'ewadi i mai Iosefa taiadi i nago. Bunamanidi 'adi wagava Mulo wata Aloe. ⁴⁰Tomotoganidi 'adi 'ailuga Iesu tomogona i naweni kaleko manamanawedi 'waidiega i fania bunamanidi taiadi, bani'odi me Diu yadi sauluva ve'ufo faifaina. ⁴¹⁻⁴²Fai sai'afoga me Diu yadi 'Aiata Veawai i na velamu, bega tamu taumata kebu 'ani'iega vivideye bei Iesu i silukuveni. Taumatanina basenadi i ala-vagaseni matumatu 'waineye bei kebu tamu aitoi i da ve'ufai, we'e lilivaneye welavi fuei i tovtovoi.

Iesu 'ana taumata'ava.

20 ¹Me Diu yadi 'Aiata Veawai i 'a'avana, Tafalolo bola matalovalovanineye, Meli vavine Magidala i tovoi i nago

^z 19:31 VeL 21:22-23 ^a 19:35 Ion 21:24 ^b 19:36 Sou 12:46 ^c 19:37 Ve 1:7

^d 19:38 Ion 7:13 ^e 19:39 Ion 3:1-2 ^f 19:39 Bunamanidi 'adi vita 45 kilogalamu.

taumaseye. Tutuyanina i le'wa i 'iseni kileu taumata 'awana 'ana vetoviboda 'akonadi i ketoi. ²Bega i lilide i mai Saimoni Fita wata tamu tovetutuyama, kumanina Iesu i nuakalikalieni bwaikina, i vonedi i vo, 'Auvea tomogona i 'ewai taumata 'wainega siwe kebu ta da 'asetaigna ava'aibe bei i yatoi.” ³Begaidi Fita ma iana i tovoi i nagoi taumaseye. ⁴I ve'ilililide iana i kumeta i le'wa-matayo'o taumaseye. ⁵I lukemula i 'iseni kaleko'ava bagase bega Iesu tomogona i fania, siwe kebu i da lukuga. ⁶⁻⁷Saimoni Fita i vemuli i le'wa tonovina i luku, kalekonidi i 'isedi wata Iesu 'unu'ununa 'ana fanifani. Fanifaninina nununumina siwe tulineye i 'eno'eno. ⁸Mulieta iana wata i luku Iesu i 'isa'avai, i vetumagana Iesu 'akonadi i tovoi. ⁹Siwe kebu mogitana i da 'asetai-atumaia ava'ai basenadiotoga i kilumi Yaubada yana Buki nageneye, i lubwaineni Iesu i na tovoi-vaitugana wafayega. ¹⁰Nika i viladi i nagoi vanuge.

Iesu i souyeni Meli 'waineye.

¹¹⁻¹²Melinina 'atamana Magidala 'wainega i vilai i nago taumaseye bei i tovoi i 'we'we'wela. Wata i lukemula anelose 'adi 'ailuga i 'isedi ma 'adi talauma 'avu'avudi. Bei Iesu i ve'enoviga 'waineye i miamiani, tamu 'unu'ununega, tamu 'agenega. ¹³Tomotoganidi 'adi 'ailuga Meli i velutolien i vo, Vavine, ava'ai faifaina 'u 'we'we'wela?” Yadi velutoli i tutuli i vo, Yaku 'Auvea i 'ewai, siwe kebu a da 'asetaigna ava'aibe bei i yatoi.” ¹⁴“I vona'a'ava i sivilai Iesu i 'iseni i tovoivoi, siwe kebu i da 'isa'inanaiga. ¹⁵Iesu i velutoli i vo, Vavine, ava'ai faifaina 'u 'we'we'wela? Aitoi kumanaga 'u lulualeni?” Meli yana nuanua i vo 'ako, 'Awalawanina 'ana to'isave'avina,” begaidi i vo, 'Ai'edi Iesu tomogona 'u 'ewaiga, nuanuaku 'u na voneku ava'aibe bei 'u yatoi, bega a na nago a na 'ewai.” ¹⁶Iesu i vona Meli 'waineye i vo, Meli.” Meli i sivilai i 'isanago me Diu bonadiega i vo, Labonai,” 'ana saivila Tove. ¹⁷Iesu i voneni i vo, Kebu 'u na 'abitonovikuga, yau bola kebu a da laka Tamada 'waineye. Siwe nuanuaku 'u na nago ekwavo 'waidie side bani'odi 'u na voneyedi 'u na vo, Iesu i vonaga i vo, A na vilaku a na nago Tamaku 'waineye, Tamakunina 'omi wata Tamami, yaku Yaubada wata 'omi yami Yaubada.” ¹⁸Iesu i vona'a'ava, mulieta Meli i vilai i mai tovetutuyamavo 'waidie, i vonedi i vo, Yau 'Auvea a 'iseni,” wata ava'ai i voneniga i lulivona 'waidie.

Iesu i souyeni yana tovetutuyamavo 'waidie.

¹⁹Tafalolo lovananina, Iesu yana tovetutuyamavo me Diu to'edakumetavo i kololoyedi begaidi vanuga i sibodai nageneye i miasai'auga i miamiani. I veveifufu nika Iesu 'awasasadie i souyeni i vonedi i vo, Ma yami sosoana 'wa na miamiani, kebu 'wa na kololo.”

²⁰ ^kI vona'a'ava, mulieta 'ana kini'ona i vedi, nimana 'waidie wata lumalumaneye. Matatabudi i sosoana-'afo'afo fai 'Auvea i 'iseni. ²¹ 'Wata Iesu i vona-vaitugana 'waidie i vo, Ma yami sosoana 'wa na miamiani, kebu 'wa na kololo. Basenadi Tamada i vetuneku a mai tomia fwayafwaya 'waimie, wata bani'odi 'omi a vevetunemi tomia fwayafwaya 'awasasadie.” ²²⁻²³ ^I vona'a'ava, mulieta yawaina i tauyavuleni 'waidie i vonedi i vo, De'e 'Anu'anunu 'Atumaina a velevelemi begaidi 'ai'edi tomotoga yadi sakona 'wa na nuatavunidi, wata Yaubada i na nuatavunidi. We'e 'ai'edi kebu 'wa na nuatavunidiga wata nuatavuna kebu i na veluagai Yaubada 'wainega.”

Tomasi yana vetumagana.

²⁴ ^m Tutuyanina Iesu i souyeni yana tovetutuyamavo 'waidie, Tomasi kebu taiadi i da miamiaga, taunina iadi, tamu 'ana wagava Natulugaluga. ²⁵ Iesu i tauya i nago, mulieta Tomasi i le'wa i voneni i vo, 'Ima 'Auvea 'a 'iseni.” Tomasi i vonedi i vo, Yau kebu a na vetumagana Iesu i tovoiga faifaina, nagami 'ana kini'ona a da 'isedi nimaneye, wata neli 'awa'ividi a da 'abitonovidi, wata lumalumaneye 'ibadi 'awa'ivina 'waineye nimaku a da silukuveni, mulieta a da vetumagana.”

²⁶ 'Aiata 7 i 'a'ava, mulieta wata Iesu i souyeni. Tutuyanina 'waineye yana tovetutuyamavo matatabudi Tomasi taiadi i saiboda i miamiani, nika Iesu i souyeni 'awasasadie. I vonedi i vo, Ma yami sosoana 'wa na miamiani, kebu 'wa na kololo.” ²⁷ Mulieta Tomasi i voneni i vo, Nimaku 'u 'isedi, 'u 'abitonovidi, wata nimamu 'u na 'otoi lumalumakuye 'u na silukuveni. We'e venuanaluganina 'u baileni, 'u na vetumaganamo.” ²⁸ Tomasi i vo, 'Omu yaku 'Auvea wata yaku Yaubada.” ²⁹ ⁿ Wata Iesu i voneni Tomasi i vo, Fai 'u 'iseku, begaidi 'u vetumagana. We'e egavo kebu i da 'isekuga i vetumaganamo 'eba sosoana bwaikina 'waidie.”

Side kumanina faifaina buki de'e i kilumi.

³⁰ ^o Iesu folova toketokedi fue di 'eba nuavogana wata 'eba nua'ewa i 'idewadi yana tovetutuyamavo matadie, siwe kebu matatabuna 'adi kilumaga de'e bukinina 'waineye. ³¹ ^p Naninidi 'akonadi kilukilumidi 'wa na lu'iaawadi bega 'wa na vetumagana Iesu Keliso taunina Yaubada Natuna wata 'ana Venua'ivina. Vetumagananina 'wainega mia 'ivauna wata 'atumaina 'wa na veluagai Iesu 'wainega.

Iesu i souyeni balebaleye.

21 ¹ Tamu tutuya Iesu yana tovetutuyamavo i nagoi Lavu Galili,^q wata bei Iesu i vemageta 'waidie. Yana souyagi side bani'odi. ²⁻³ Saimoni

^k 20:20 Ion 19:34, 16:22; 1 Ion 1:1 ^l 20:21 Ion 17:18 ^m 20:24 Ion 11:16, 14:5

ⁿ 20:29 1 Fit 1:8 ^o 20:30 Ion 21:25 ^p 20:31 Ion 3:15; 1 Ion 5:13 ^q 21:1 'Ana mogitana Lavu Taibilia, Lavu Galili tamu 'ana wagava.

Fita, Tomasi tamu 'ana wagava Natulugaluga, Nataniela 'ana tuvada Kena 'awalawa Galili nageneye, Sebedi natunavo wata tovetutuyamavo 'adi 'ailuga i miamiani nika Saimoni Fita i vo, A na nago a na vuata." Enavo i voneni i vo, Ma fuedeye ta na nagoi." Bega i tovoi i nagoi, waka i 'ewai i laka i vuata, siwe lovananina matatabuna kebu tamu sai'afogana i da 'onadi.

⁴Inala i vulaoga tamu tomogo i 'iseni i tovtovoi balebaleye siwe kebu i da 'isa'inanaiga, tomogonina Iesu. ⁵'I vegole 'waidie i vo, Kwakwama, igana 'wa 'onadi, 'alo kebu?" I vo, Kebu'a'avaotoga." ⁶'Wata i vegole 'waidie i vo, 'Ami 'atagiega 'wa na lelega, nika 'wa na 'onadi." Yana voneye i lelegeni, siwe kebu 'adi fata vuata i na yo'ei fai igana fueotogidi i 'ona.

⁷Tovetutuyamanina Iesu i nuakalikalieni bwaikina, Fita i voneni i vo, Fita, va'e 'Auvea." Saimoni Fita i nogai iana i vo, Va'e 'Auvea," bega 'ana kaleko i 'ewai i ve'wesena, fai 'akonadi i yavudi ma 'ana iviga'ava yaubani faifaina, i sou i kayo i obu. ⁸We'e tovetutuyamavo 'ifwaidi wakayega i voi, vuata ma iganina i yo'ei i obuyeni. Kebu 'ani'iega, bani'odi 'atagida 'ana vemanawe. ⁹Tutuyanina 'avale i obu i 'iseni mula'wa i 'ala'alata, mula'wanina 'waineye igana wata 'ani'ani i 'ala'alaidi. ¹⁰Iesu i vonedi i vo, Igana 'asiauotoga 'wa 'onadiga, 'ifwaidi 'wa na miedi." ¹¹Saimoni Fita i laka wakeye vuata ma iganina i yo'ei i lakama 'avale. Iganani bwaikidi wata matatabuna 153. Fueotogidi siwe vuata kebu i da bwekaiga. ¹²Fita igana i miedi mulieta Iesu i vonedi i vo, 'Wa maia 'wa na 'ani." Tovetutuyamavo 'waidiega kebu tamu aitoi nuanuana i na velutoli i na vo, 'Omu aitoi?" fai 'akonadi i 'asetai taunina mogitana 'Auvea. ¹³Bega Iesu i nago 'ani'ani i 'ewadi i veledi, wata igana bani'odi.

¹⁴'De'e Iesu yana souyagi 'ana vetonu yana tovetutuyamavo 'waidie tutuyanina i tovoi wafayega.

Iesu nuanuana Fita.

¹⁵"Ani i 'a'ava, mulieta Iesu i velutoli Saimoni Fita 'waineye i vo, Saimoni, 'omu Ioni natuna, nuanuaku a na 'asetai, mogitana 'u nuakalikalienu bwaikina we'e emwavo sai'afogana?" Fita i vo, E'e 'Auvea, 'akonadi 'u 'asetaku a nuakalikalienu." Iesu i vo, Egavo i vetumagana 'waikuye siwe bola mweamweadi nuanuaku 'u na veve 'waidie bega i na vetoketoke, 'wa da vo bani'odi yaku sifi siadi 'u da veve'anidi."

¹⁶'Wata 'ana veluga Iesu i velutoli Fita 'waineye i vo, Saimoni, 'omu Ioni natuna, mogitana 'u nuakalikalienu bwaikina?" Fita i vo, E'e 'Auvea, 'akonadi 'u 'asetaku a nuakalikalienu." Iesu i vo, Egavo i vetumagana

† 21:5 Luk 24:41 § 21:6 Luk 5:4-7 † 21:14 Ion 20:19,26 † 21:15 Mad 26:33
 † 21:16 1 Fit 5:2

'waikuye, nuanuaku 'u na 'i'ivaisedi, 'wa da vo bani'odi yaku sifi 'u da 'i'isave'avinidi.”¹⁷ Wata 'ana vetonu i velutolieni i vo, Saimoni, 'omu Ioni natuna, 'u nuakalikalieku?” Iesu yana velutoli 'ana vetonu 'waineye Fita nuana i vita, i voneni i vo, 'Auvea, nani matatabuna 'u 'asetadi, wata 'u 'asetaku a nuakalikaliemu.” Iesu i vo, Egavo i vetumagana 'waikuye nuanuaku 'u na veve 'waidie, 'wa da vo bani'odi yaku sifi 'u da veve'anidi.¹⁸ “A vona mogitana 'waimuye, basenadi 'omu tubuvauvaumuye, taunimu 'amu wa'ila 'u yogoyogoni, 'ai'edi ava'aibe yamu nuanua, 'ana fata bei 'u na nago, siwe tutuyanina 'u na ve'auvea, nimamu 'u na 'otoidi bega tamu tomogo i na yogonimu, ava'aibe bei kebu yamu nuanua bei i na nawemu.”¹⁹ Iesu de'e bani'odi i voneyediga fai 'awaie tosakona Fita i na 'iyogoyogoni mulieta i na luwewafai. Yana wafanina 'wainega tomotoga fue di i na 'iseni i na 'asetai taunina tovetumagana mogitana, bega Yaubada i na subiai. Iesu yana velutoli Fita 'waineye i ve'a'avadi, mulieta i voneni i vo, Nuanuaku 'u na vetutuyameku.”

Iesu i veifufu Ioni yana wafa faifaina.

²⁰ Iesu i veveifufu Fita 'waineye, Fita i sivilai tovetutuyamanina Iesu i nuakalikalienu bwaikina i 'iseni, kumanina basenadi 'Auvea yana 'ani 'waineye lilivaotogineye i miabui i velutoli Iesu 'waineye i vo, 'Auvea, aitoi kumanaga i na 'etogiluvemu?”²¹ Tutuyanina Fita tovetutuyamanina i 'iseni i velutoli Iesu 'waineye i vo, 'Auvea, de'e kumanina 'ana nuanua bani'odi? 'Awaie bani'odi i na wafayedi?”²² Iesu Fita yana velutoli i tutuli i vo, 'Ai'edi nuanuaku yaku vila-vaitugana i na 'iseni, ma yawaina i na miamia a na vilaku, we'e 'asa'aiana, kebu kumanina faifaina 'u na nuanua, siwe 'omu'e 'u na vetutuyameku.”²³ Vonanina Iesu i voneyeniga faifaina, enavo matatabudi i 'asetai, siwe yadi nuanua igodina kebu i na wafaga. Siwe Iesu kebu i da vo, I na mia-vagata kebu i na wafaga,” mogitana i vo, 'Ai'edi nuanuaku yaku vila-vaitugana i na 'iseni, ma yawaina i na miamia a na vilaku, we'e 'asa'aiana, kebu kumanina faifaina 'u na nuanua.”

²⁴ Yau kumaniku Iesu yana tovetutuyama, naninidi matatabuna a 'isedi wata faifaiddi a kiluma, bega fuema 'a 'asetai vona mogitana kebu vekali.

Veifufu 'ana 'eba ve'a'ava.

²⁵ Naninidi Iesu i 'idewadiga a kilumidi, siwe wata nani fue di i 'eno'enovi kebu a da kilumidiga. 'Ai'edi matatabuna i da kiluma'a'avadiga buki fueotogidi, siwe a nuani fwayefwayeye kebu tamu 'awasasa i da 'eno'eno bega bei bukinidi ta na yatodi.

^w 21:18-19 2 Fit 1:14; Ion 13:36 ^x 21:20 Ion 13:23-25 ^y 21:24 Ion 19:35

^z 21:25 Ion 20:30